

بئراأرواح

الكتاب : بئر الأرواح
المؤلف : نهى مجدى
تصميم الغلاف : أسامه علام
تدقيق لغوي : أحمد أسامه
رقم الإيداع : 2015/11224
الترقيم الدولي : 978-977-778-034-6
الطبعة الأولى: 2015

20 عمارات منتصر – الهرم - الجيزة
ت-011-27772007 02-35860372
Noon_publishing@yahoo.com
جميع حقوق الطبع والتوزيع محفوظة للناشر



بئر الأرواح

رواية لـ

نهي مجدي

للنشر
والتوزيع

obeikandi.com

إهداء

إلى من خفق له قلبى حين رآه ... إلى زوجى الحبيب " خالد "
إلى نصفى الثانى الذى أعشق ضمه ... إلى أمى العظيمه " آمال "
إلى طيف أستشعره ولا اراه ... إلى روح أبى الغالى " مجدى "
إلى قرة عينى وأملى المستقبلى ... إلى ابنى الحبيب " عمرو "
إلى كل من علمنى حرفاً ولا زلت أذكره وفى قلبى أشكره ..
إلى أساتذتى وقادتى ومعلمينى الأجلاء ..
إلى كل من بسط يداً ورعى فكرة , أو أطلق شرارة إبداع ..
إلى القارئ المحترم أمل استحسانك ...

obeikandi.com

زى كل باب مقفول ما تعرفش وراه إيه

زى كل حاجه غريبة خايف تفهمها

زى كل إشارة خايف تفتح لك غرفه أسرار

زى كل واحد عايش وفاكر ان حياته ماشيه بإرادته , لكن بيكتشف انه

ماشى بإرادتها

الحكاية كلها انسان رافض يشوف الحقيقة ..

obeikandi.com

من أنا؟؟

لم أعد أتذكر شيئاً....

كل شيء بدا لي ساطعاً كلؤلؤة انعكس عليها ضوء النهار فزادها تألقاً
وإبهاراً ...

النور أوشك أن يحرق مقلتيّ لكني أحبه

المكان هنا واسع , جميل , مريح , يبعث في قلبي اطمئنان عجيب كطفل
عاد الى حضن أمه بعد الفراق

اشجار وارفه تحيط بي في احتضانه صامتة , ونخل طويل يتدلى منه
تمره الزاهي وكأن مطر الشتاء - الذي أحبه - قد غسله بأتقان ...

جداول المياه أسمع خريرها فتششف أذناي وتطرب ...

طيور تحلق في السماء يكاد ذيلها يمس شعري دون خوف الاقتناص ,
ريشها أبيض ناصع كبياض الثلج , تعلق رؤوسها تيجان من الزمرد
وتغرد كأعذب شادي ...

أطفال يضحكون ويلعبون وأسمع منهم قهقهة طفولية عذبة تمس
قلبي فتسعده ..

فتيات افترشن الأرض وأخذن يهمنن لبعضهن في دلال وكأن الحسن
قد تجسد , عندما رأيتن أيقنت عمى بصرى حين عشقت غيرهن ..

أصوات الطبيعة امتزجت لتعزف سيمفونية رائعه بلا أدوات ولا
عازفين..

امضى انا في طريقى ولا أعلم اين أذهب , ولكن قلبى كاد يمزق صدرى
نشوة واستمتاعاً ..

أنا لا اعلم كيف أتيت إلى هنا ولكنى أتيقن أننى لا أريد الخروج منه
ابدأ , أحببت كل شىء فيه منذ النظرة الأولى أحببت تغريد الطيور
وغناء النساء الجميلات, أحببت هؤلاء الاطفال الذين يضحكن فى
براءة , احببت شكل السماء الزرقاء الصافية وشكل السحب الناعمة ,
أحببت شكل جداول المياه التى يسحرنى خريرها , أحببت نضاره
العشب الاخضر وزهوره الأخاذة , أحببت وجودى بين هؤلاء القوم رغم
عدم معرفتى بهم لكن فى قريهم سلواى ...

بحثت بنظرى هنا وهناك لعلى أجد مؤنسًا , نعم أحب ذلك الهيام
الذى أجده هنا ولكنى أريد جليسا يشاطرنى أحلامى ..

حتى وجدت أفضل ما تمنيت ..

أخى " هشام "

عشقى الباقى رغم زوال صاحبه , أذى هشام يكبرنى بعامين وبرغم ذلك كنت أجاهه دائماً ذلك الأب الحانى ذو الدموع القريية , تلك اليد التى تضرب وتطيب , كان دائماً مرشدى وقودتى فى الحياة .

عندما تراه للوهلة الأولى تستشعر منه مهابة ورقى , شخصية تفرض احترامها على الجميع , ذلك الشارب الذى يتباهى به رشدى أباطة لا يزن شيئاً أمام شاربه المغطى بالوقار , هيئته تشبه كثيراً تلك التى يظهر بها رجال الشرطة , تجده مبتسماً دائماً ينشر نكاته و يضى روحه المرحة على الجميع , أنفه المعقوف أضاف لمظهره رفعة وترفع .

تزوج أذى منذ عدة أعوام بحبيبته المنتظرة وأنجب ولدًا يشبهه كثيراً حتى فى هيئته وضحكته الرنانة , كان يتمنى أن ينجب عشرة أطفال يملأ بهم منزلنا الفارغ ولكن القدر لم يُعْطِهِ الا " يوسف " وفاضت روحه لخالقه .

سيارة مسرعة سائقها مخمور أنهت ماتبقى له من أحلام , ذهب طيفه لما هو أفضل وتركنا نحن نعانى الفقدان .

تشبثتُ به كمن وجد قريبًا فى الغربة :

- هشام !!!

التفت إلى اظنه لن يتذكرنى ولكنه كما هو وفياً :

- وحشتنى يا شريف

- انت فين ياهشام طولت الغيبة

- الغيبة طويلة ع الى قلبه خالى

- لسه زى ما إنت ما إتغيرتش ياهشام

- ومين قال انى هتغير

- طيب قولى احنا فين

- فى الجنه بتاعتنا

- يعنى انا كمان مت

- المفروض , بس عمر الشقى بقى

- تقصد ايه ؟

جذبني هشام من يدي و اشار إلى نقطه أسفل قدمينا لم اكن اراها , بل لم أكن مدرك أنى اقف على الهواء , وكأنى ملاك ينظر إلى الأرض من سماءه الواسعة وشرفته الكاشفة ..

- بص كدا يا شريف شايف ايه ؟؟

بدت لى النقطة بعيدة وصغيرة ولا أستطيع تبين ملامحها ولكنها بدأت تكبر وتظهر شيئاً فشيئاً

أمامي غرفة مغلقة تحوى سريرًا واحدًا وشخص نائم عليه لم أستطع في البداية تبين ملامحه ولكن كان بجانبه شخص آخر يغطى أنفه بغطاء كالكمامة ويحمل في يده أداة لا أراها جيدًا وبجانبه بعض الأجهزة الكهربائية ذات الأصوات المزعجة وسيدة تدخل وتغطى أنفها وتشاطره عمله .

اقتربت الغرفة أكثر حتى تبينتها ..

إنها غرفه عمليات كتلك الموجودة في المستشفيات المقيمة , وهذا الرجل يبدو من هيئته انه الطبيب ويجرى عليه جراحة لأحد الأشخاص وبجانبه ممرضة تناوله الأدوات وصمت مطبق في الغرفة لا يقطعها إلا صفير الآلات ورنين الأدوات المعدنية التي تمزق الصدور وتشق الأنسجة ..

فاقتربت أكثر لأرى من ذاك المسكين الراقد غائب عن الوعي , نظرت إليه وفي قلبي شفقة من حاله الرائي , هل يتألم في عالمه الغامض أم أفقدته تلك العقاقير قدرته على الإحساس ؟ ..

وبينما انا أمهد نفسي لرؤية ذاك الحاضر الغائب , شعرت بصدمة زلزلتني ...

ماهذا؟؟؟؟؟

إنه أنا ؟؟؟؟؟

أنا؟؟؟؟

أنا ذلك النائم على السرير وأنا الذى تجرى له العملية فكيف هذا ؟
كيف أرى نفسى ؟ , كيف لا أشعر بجسدى , كيف أكون مغمضاً وأرى
من حولى ؟؟

نظرت لهشام فى تساؤل يجتاح جنباتى , فابتسم فى إشفاق :

- ما تخافش يا شريف مش مكتوبلك تأنسى دلوقتى

- أنا ازاي شايف كل دا يا شريف هوا أنا فى حلم ؟

- هتفهم كل حاجة فى وقتها

نظرت للأسفل مرة أخرى لعلى أجد ما يُشبعُ ظمئى , ولكن هالنى
مارأيت ..

رأيت جهاز مراقبة النبض الذى علَّقوه فى ذراعى أطلق صفيراً كأنه
صفير إنذار والطبيب يرتبك ويسقط ما فى يده وينادى بجزع ..

- جهاز الصدمات بسرعه المريض يموت

- بموت؟؟ دارت فى عقلى مراراً

ركضت الممرضة لتحضر له طلبه لعله يفيد جسداً من الموت قد دنا ،
ومن فرط فزعها سقط منها قرطها دون أن تشعر ، انتزع الطبيب منها
الجهاز وركض به نحوى وسمعه يصرخ ..

- ابعدوا

وأطلق شحنه كهربائية أثنت ظهري بقوة ، ولكنى لم اشعر بألم , وبأنت محاولته بالفشل و مازال الصغير مستمراً ..

فسمعتة يصرخ مرة أخرى ..

- على الفولت علي ٢٢٠

وأعاد المحاولة مرة أخرى حتي ظهر ذاك التموج الذي كنت أراه في الأفلام المؤثرة ولكني حقيقة لم أكن أتأثر ولا حتي اليوم ، لا أبالي بما يحدث وكأن أحداً غيري يعاني , ورأيت ذلك الإرتياح على وجه الطبيب..

حينها وجدت هشام يدفعني قائلًا :

- ميعاد رجوعك , سلملى ع العايشين

- طيب ياهشام مش هشوفك تانى

أجاب هشام وهو يبتعد أو أنى أنا الذى كنت أبتعد :

- من النهارده حياتك اتغيرت يا شريف

- طيب ياهشام استنى أ.....

- معلى الحمد لله انها جت لحد كده

نظرت لها وأكاد لا أرى , وقلت متأماً :

- أنا شففتك

فانتبهت أكثر ونظرت إلى متسائلة :

- شففتى فىن

أجبت بوهن :

- شففتك ...

ولم أستطع الإكمال فإذا بغشاوة تَسِيلُ ستارها على عقلى المتألم ..

فربتت على كتفى بشفقة ..

- ما تتكلمش دلوقتى انت لسه تحت تأثير البنج بس لما تفوق هتبقى

كويس .

قالتها وهى تغادر بعد ما أحقنتنى بمسكن خفف عنى الألم قدرًا

ضئيلًا ..

وظللت أنا أتألم وأتمنى العودة حيث اللا ألم ...

الساعة تكاد تكون العاشرة صباحًا او أكثر قليلاً ..

أشعه الشمس تملأ المكان ..

أشعر أن ألمى بدء في السكون رويدًا , وأتذكر ذلك الحلم الذى رأيتَه
وكأنه قد حدث الآن ..

المرضة الحسنة تقف أمام النافذة وتفتحها ببطء لتُدخِلَ نسمات
الهواء العليل وأشعة الشمس الذهبية لعلها تعطى جسدى الواهن
بعض الصحة , أرقد فى غرفة صغيرة على سرير متهالك من أسرة
المستشفيات ذوات المراتب الجلدية والدعائم الحديدية , وحدى فى تلك
الغرفة لا أحد بجانبى ولا شىء أكثر من خزانة الأدوية المكتنزة والستائر
الملوثة بأآآهات السابقين ..

قالت مبتسمة بعدما لاحظت استيقاظى :

- صباح الخير أستاذ شريف عامل ايه دلوقتى ؟

اجبت بصوت واهن :

- أحسن

فاقتربت منى تتحسس نبضى ومازالت ترسم تلك الإبتسامة :

- تعبتنا أوى وسيّبت أعصابنا

لا أدري لم تذكرت ذلك الجزء من الحلم الذى يخص قرطها الذى سقط على سهوة منها , فوجدتني بلا إراداه أنظر إلى أذنها , لا أعلم هل أتيقن بأنى رأيتها أم أريد التيقن ..

نظرت إليها فوجدت ما أفرغنى لكنه اسعدنى , وجدت أذنًا بها قرطها وأخرى خاوية ..

نظرت ناحية النافذه مرتبًا لا أفهم شيئًا ولا اعلم هل كنت يقظًا أثناء العملية أم لعلى رأيتها من ذاك المكان البعيد , كيف أعلم بأمرها , وتذكرت هشام الذى أُقسِمُ أنى رأيته وتحدثت معه بل أنى رأيت العملية بأكملها ولكن لا أعلم كيف ..

كانت الممرضة قد انتهت من تحسس نبضى وإعطائى الدواء حين رأتنى مضطربًا

فتسائلت فى قلق :

- مالك يا أستاذ شريف , فيه حاجة بتوجعك

أجبتها وأنا أنظر لها نظرة ترقب ولهفة :

- فىن فردة الحلق الثانية ؟

سئلتها ذلك السؤال ولا أدري لماذا , هل أتمنى أن أسمع مايرضىنى أم أتمنى أن يكون حلمًا لا معنى له ..

تعجبت كثيرًا في البداية من سؤالى المباغت ثم تحسست أذنها بيدها في حركة عفوية :

- ضاعت منى بس مش فاكرة فين , بس غريبة انك تاخذ بالك منها !!
لم أعرف بم أجيب وكيف أبرر , هل أخبرها الحقيقة أم أستيقها
لنفسى ؟

- لفت انتباهى انك لابسة فردة واحدة

أومأت برأسها تفهمًا , ولكنى مازلت فى قرارة نفسى أؤمن أن هذه ليست
الحقيقة وإنما خَشِيتُ أن تقص لى ماحدث من اقتراب موتى حتى لا
أضطرب وتسوء حالتى ..

أو أن هذا ماحدث معها فعلاً وأنا اتوهم ما رأيت وأريد إقناع نفسى
به ..

لا أدرى لا أدرى أفكارًا متلاحقة تركض خلف بعضها ك كلب يركض
خلف لص لعين ..

ماذا حدث وماذا رأيت , هل هو حلم أم حقيقة ..

هممت أن أسألها مره أخرى ولكنى خشيت ردة فعلها ورببتها فى أمرى
..

انتزعتنى من شرودى حين سألتنى :

- قولى يا أستاذ شريف ايه حكاية أنا شفتك اللى قلتهاى امبارح دى ؟

تظاهرت بالنسيان :

- مش فاكر

ابتسمت :

- عمومًا انت كنت بتفوق من التخدير وانت عارف بقى ختلفة الفوقان
بتطلع المخزون كله

قالتها وضحكت للتخفيف عنى:

- مش محتاج أى حاجة أعملهاك

- لأ شكرًا

قالتها وهى مندفعة نحو الباب تمهم بالخروج ولكنها وقفت واستدارت لى
قائلة

- على فكرة مراتك كانت هتموت نفسها عليك وانت فى العملية , شكلها
بتحكك أوى وأصحابك كمان سألوا عليك وما رضبوش يروحوا غير لما
حلفناهم انك بخير , وطبعًا والدتك كانت أشد من الكل ربنا يخلصهاك..

أجبت عليها بابتسامة تائهة وأنا أعتصر ذهنى اعتصارًا هل ما رأيت
حقيقة

أم تأثير بنج ردئ أطاح بتلابيب عقلى , لا أدرى ...

طرقات على باب الغرفة ..

سكينًا غُرِسَتْ في رأسي فشقته نصفين ..

نظرت للباب بعين زائغة وبصر لا يبصر..

- ادخل

فتحت زوجتي الباب بابتسامة مشرقة وبوكيه ورد تحمله بين يديها
زادها رقة ، وهمست في عزوبة :

- حمدا لله على سلامتك

زوجتى " نهلة "

زوجة رائعة بما تحمله الكلمة من معنى نظريًا , وعندما أقول نظريًا
فهذا لا يسىء إليها ولكنى أنا الذى أخفق فى حينها عمليًا , تعمل فى
إحدى شركات البورصة كأولئك الجالسون أمام شاشات عرض تداول
الأسهم , تارة يرتفع فتسمع الضحكات والتهانى وأخرى يسقط فيطيح
آمال رواد ذلك المكان المنافق , تذهب لعملها صباحًا وهى تدعو الله أن
يديم لها هذه الوظيفة يومًا آخر , زواج تقليدى , رشحتها لى إحدى

الاقارب عندما رأتها في زفاف صديقي , جميلة وشيك وبتشتغل ليه التأخير؟

الارتباط جاء سريعاً حتى أنى لم أكلف نفسى عبء السؤال عنها ووافقت إرضاءً لرغبة أُمى فى تزويجى واكتفيت بما سمعته منها أثناء جلسات الإصغاء المقرره لكل من يتقدم لخطبة فتاة وغالبًا ماتكون نصفها ادعاءات لا محل لها من الإعراب , إنسانه ناجحة , جميلة ذات ملامح رقيقة , أنيقة فى ملابسها , رشيقه فى مشيتها , زادها جمالاً ذلك الشعر الطويل والعينين البنية والأنف الدقيق , وجهها الدائرى وبشرتها البيضاء تخطف الأبصار , شفتاها تنطق الكلمات فى عذوبة وأسنانها المرصوصة كسد منبع تخفى وراءها ابتسامة ساحرة .

أحبها؟؟؟

لا أدرى إن كنت أحبها أم اعتدت وجودها فى حياتى ..

كثيرون هم من اهتمونى بالغباء ونكران النعمة لعدم قدرتى على محبتها , ولكن منذ متى كان للقلب سلطان .

اقتربت منى وأعطتني باقة الورد :

-أنا كنت هموت من القلق عليك

أجبت بشرود:

- ما تقلقيش أنا أحسن دلوقتى

- الدكتور يقول انك تعبت شوية امبارح فى العملية مع إنها حاجة مش خطيرة , دى مجرد عينة خدها يحللها علشان يعرف سبب صداعك المستمر وعدم تركيزك دا من ايه .

سلتها باهتمام :

- تعبت ازاي يعنى ؟؟؟

أجابت بتردد وكأنها تحاول إخفاء شىء :

- ما تشغلش بالك المهم انك بخير

قالتها وطبعت قبلة على خدى..

- دى ماما كانت هتتجنن عليك وفضلت معانا امبارح لحد ماخرجت وبقيت كويس وكانت عاوزه تبات معاك هنا , لولا ان الدكتور طمننا وخلصنا نروح ..

نظرت إليها متسائلاً :

- أنا هرّوح امتى ؟

الدكتور قال انه هيبص عليك ولو لقاك كويس وحالتك مستقرة هنروح نكمل علاج فى البيت ..

- ماشى , قلتها فأغلقت الحوار

لم تجد نهلة مدخلاً آخر للحديث فهمت بالذهاب :

- طيب أنا هروح أكمل إجراءات الخروج وهرجعلك , على فكره انت وحشتنى أوى

قالتها وهى تخرج من الغرفة مغلقة الباب خلفها ...

استرخيت أكثر في سريري وأغمضت عيني لعلى أستعيد حلمي واتبينه أكثر ..

رُحْتُ في سَبَاتٍ عميق , رأيت حلمًا أخر وكأنى سأنهى ماتبقى من عمري تائه في هواجس الاحلام

رأيت زوجتى نهلة تقف مع إحدى الممرضات , وقدمت لها الممرضة ورقة لا أدرى ما فيها , وها هى زوجتى تعبر الممر الطويل باتجاه غرفتى , أسمع نقرات حذاءها ولا أدرى هل حلمًا أم واقع ..

هل ستأتى وترانى؟؟

ناديتها بأعلى صوتى ولكنه لم يغادر حنجرتى ..

- انت نمت ولا أياه يا شريف؟؟

صحوت مفزوعًا على صوت نهلة وهى تهز كتفى ..

- اسفه يا حبيبي خضبتك

- لأ ولا يهكم

- أنا افتكرتك مصدع فغمضت عينك , ما أعرفش انك نايم

- أنا فعلاً غمضت عيني من الصداع بس شكلى نمت , انتى خلصتى
الإجراءات؟؟

- اه تمام كدا وأخذت كمان ورقة بتعليمات الدكتور علشان نمشى
عليها فى البيت

- ورقة ؟؟ هكذا صحت مذعورًا لدرجة أفزعته وجعلتها ترتد خطوة
للخلف بعدما كانت بقربى تلملم أغراضى .

- مالك يا شريف انت اتخضيت كدا ليه؟؟

- مين اللى اداكى الورقة دى ؟ تسائلت مترقبًا إجابة تصدمنى وقد
كانت.

- الممرضة اللى فى اخر الكوريدور , مالك يا شريف فيه ايه انت بدأت
تخوفنى عليك .

قالتها وهى تنظرلى بدهشة وتساؤل ..

أما أنا فقد وضعت يدى على رأسى أحاول منع الفوران الذى كاد أن
يدمر خلايا مخى المتبقية ..

- لو تعبان يا حبيبي خلىنا نقعد يومين كمان

- لأمش تعبان ولا حاجة أنا عاوز امشى من هنا

قلتها بنبره توحى برغبتي فى الذهاب فورًا , وقد انصاعت زوجتي لها
واستكملت للممة أغراضى ووضعها فى حقيبة ..

انتهت نهلة من الإجراءات والأغراض ونادت على العامل فجاء وأخذ
الحقيبة وساعدتني فى ارتداء ملابسى وجلسنا معًا فى السيارة فى طريقنا
للمنزل .

- على فكرة يا شريف , الشركة فيها شوية مشاكل كدا بسبب غيابك
والناس مش عارفه تمشى الشغل ازاي

أجبتها دون النظر اليها وأنا مازلت ممسكًا برأسى التى اجتأها الصداع
ولعب بها لعبًا ..

- مش وقته يا نهلة أنا مش قادر حتى افتح عيني

-اولك يا حبيبي

- معلىش يا نهلة عاوز أقعد يومين كدا عند ماما

- طنط؟؟؟ يعنى مش عاوز تروح معايا

أجبتها بلا مبالاة :

- حاسس انى هبقى مرتاح أكثر هناك وكمان أنا عارف انها تعبانة
بسببى فعاوز أطمئنها عليا

نظرت لى نهلة بحزن :

- هيا بس اللى تعبانة علشانك ؟ , عموماً أوك يا شريف زى ماتحب

قالتها وهى تنظر للطريق وتضغط دواسه البنزين ليصبح 140 وتدير
عجلة القيادة ناحية منزل أمى الحبيبة ...

" شريف حبيبي "

قالتها أمى عندما رأتنى أمام الباب , لم أشعر بنفسى الا وأنا أرتمى فى
حضانها أملاً فى أن أسقط فيه كل آلامى ..

نظرت إلىّ والدموع تتساقط على وجنتها ومازالت ممسكة بيدي
تحتضنها فى لهفة وحب :

- الحمد لله انى شفتك بخير يا حبيبي دا أنا كان هيجرالى حاجة
واشوفك واقف على رجلك

ابتسمت فى هدوء :

- ما تقلقيش يا ماما أنا بخير الحمد لله , ايه انتى مش هتقوليلى ادخل ؟

ردت مضطربة :

- يا حبيبي حقك عليا فرحتي بشوافتك نستنى كل حاجه , نهلة ازيك
يا حبيبي , قالتها بعدما استدركت وجود نهلة

أجابت نهلة بفتور :

- الله يسلمك يا طنط , حضرتك عامله ايه دلوقتي

- بخير يا حبيبي الحمد لله , بس انتى ليه ما قلتيش ان شريف خارج
النهارة كنت جيت معاكي نجيبه

ردت نهلة وهى لا تستطيع إخفاء تلك العصبية المسيطرة عليها :

- قلنا نعمهالك مفاجأة , حتى شريف أصر انه بيعى عند حضرتك وما
يروحش بيته

نظرت لى أمى وقد تفمّيت أننا على خلاف , فأدارت دفعة الحديث :

- انتوا شكلكوا جعانيين , ادخل يا حبيبي ارتاح فى أوضتك على ما
أجهزلكم الغدا

اتكأت عليها ذاهباً إلى غرفتي التي لم تتغير قط , سربرى المعبأ
بالذكريات لطالما كان محل مناوشات بينى وبين أختى حتى بعد زواجه ,
كان يجلس بجانبى نستعيد ذكريات الطفولة وعراكننا الدائم من منا
سينام على " الطرف " ومن سيأخذ النصيب الأكبر من الغطاء , مكتبى
الذى شهد سنوات دراستى وصور " أميرة " المخبأه بين طيات الكتب ,
وذلك الهاتف الارضى الذى لم يكف يوماً عن الرنين وتبادل عبارات

الغزل والولده , كل شيء بقى فى مكانه لم يغيره الزمن حتى ملابسى
البالية أبقيتها وكأنى أتوسل لذكراها أن تعود .

أرقدتني أمى على سريري و خلعت عنى حذائى وأسبلت الغطاء على
جسدى الضعيف وطمأنتنى بصوتٍ حنون وهى تضع يدها على رأسى :

- إن شاء الله هتبقى زى الفل , بس على فكرة نهلة واخده على خاطرها
ولها حق يا ابنى انت ما بتباتش على سريرك اللى هناك قد ما بتبات
على سريرك اللى هنا , وعمومًا مش وقته الكلام دا أوضتك اهى زى ما
هى وما حطّتش إيدى فيها زى ما بتطلب دايمًا
وأردفت بحزن :

- ياريت اللى فىك ييجى فىا يا ابنى

ابتسمت لها وأنا أقبل يدها:

- بعد الشر عليكى يا أم هشام هوا احنا لينا بركة غيرك

مسحت دمعة نزلت على خدها لا أدرى حزنًا علىّ أم على ذكرى هشام
وقالت وهى تخفى دموعها وتتجه نحو الباب :

- هجهزلك الغدا على طول , انت محتاج غِدًا

كل هذا ونهلة فى مكانها لم تتحرك إلا عندما غادرت أمى غرفتى فجاءت
إلىّ واقفة أمام الباب وهى تلوح لى بيدها :

- أنا همشى دلوقتي يا شريف ولو احتاجت حاجة إبقى كلمنى , أظن
طنط هتقوم بالواجب على الآخر ومش هتحتاجنى فى حاجة دا اذا
كنت بتحتاجنى أصلاً .

استوقفتهما :

- نهلة ؟

- نعم يا شريف عاوز حاجة ؟ , قالتها وهى تستدير لتواجهنى بعد أن
أدارت رأسها وهمّت بالذهاب

أجبت يهدوء :

- انتى رايحة فين ؟

ابتسمت بتهكم :

- مروحه شقتنا ولا انت ناسى ان لينا شقة

- لأ مش ناسى , بس ليه ما تقعديش معايا هنا كام يوم لحد ما أبقي
كويس ونروح على البيت مع بعض

- لأ معلش أنا ما برتاحش غير فى بيتى وانت مش محتاجنى يا شريف

قالتها وغادرت دون حتى أن تدخل من الباب ..

سمعت أمى صوت انغلاق الباب فجاءت إلیّ مستفسرة :

- هي نهلة مشيت ؟

- ايوه

- ليه كدا يا ابني دا أنا قربت أخلص الأكل , طيب هي هترجع امتي؟؟

- مش هترجع يا ماما , نهلة روحت

- روحت؟؟

تسألتي أمي وهي ترفع حاجبها استنكارًا :

- وليه يا ابني ما قعدتش هنا هو في حد هيضايقها

- سيبها على راحتها يا ماما

وأردفت بابتسامة وأنا أشير إلى سريري :

- تعالى اقعدى جنبى , محتاج أتكلم معاكى أوى

هرعت أمي إلى بنظرة خوف ولهفة :

- مالك يا حبيبي انت تعبان ولا ايه ؟

- لا يا حبيبي أنا كويس بس انتى وحشتيني أوى

- وانت كمان يانور عيني , قالتها وهي تدس رأسى في صدرها وحضنها

الحانى

- مش أنا شوفت هشام

قلتھا بغته لأرى رد فعلھا ولأخرج ما خبأته ضلوعى لعلی أجد إجابة
تشفینى ..

- شفته ازای یعنی ؟ قالتھا أمى وهى مفزوعة وقد أبعدت رأسى عن
صدرھا واعتدلت فى جلستها ..

- شفته فى الحلم , قلتھا بتردد وخوف علیھا أن أقول لها شيئًا يخيفھا أو
تعتبره فألاً سيئًا وأزید علیھا المرض أضعافًا ..

- ردت قلقه : وحلمت بأیه ؟

اجبت علیھا مبتسمًا بخبث :

- ما تخافيش يا أم هشام مش هموت

- بعد الشر عليك يا شريف ما تقولش الكلمة دى تانى , أنا قلبى
معادش يستحمل يا ابنى , قالتھا وهى تبتعد بنظرھا عنى بعد أن خنقتها
الدموع ..

- طيب خلاص حقك عليا , قلتھا وأنا أربت على يدها وأقبلها فى هدوء

فنظرت إلى مرة أخرى وتساءلت بحدة اقل وترقب واستعطاف :

- طيب قولى حلمت بأیه ؟

- والله يا ماما زى ما قلت ليكى , حلمت بيه بيقولى انى مش هموت وانى هبقى كويس وكدا

- فال خير , ردت أمى بارتياح وقامت لتكمل إعداد الغداء إلا انها وقفت أمام الباب وكأنها تذكرت شيئاً ..

- على فكره أمانى مرات اخوك الله يرحمه جاتلك كثير فى المستشفى بس كانوا مانعين عنك الزيارة , أنا هتصل بيها أطمئنها انك قمت بالسلامة , والله يا ابني كانت قلقانة عليك زى ويمكن أكثر كمان ..

- هى أمانى ما جاتش من يوم وفاة هشام ؟

- لا يا ابني إزاي دى بنت أصول , دى كانت بتجيبلى كل أسبوع تشوفنى لو محتاجه حاجة بس من يوم ما إنتقلت فرع البنك اللى ف اسكندرية وهى بتيجى كل فترة كده على حسب ماوقتها يسمح .

- طيب ويوسف ؟

- يوسف , رددت أمى بصوت يكسوه الحزن

- يوسف دا اللى مقطّع قلبى , اتيتم يا حبيبي قبل ما يشبع من حضن ابوه

نظرت الى السماء فى تفويض واستسلام :

- اللهم لا اعتراض على أمرك يارب

ثم نظرت الى باكية :

- أمانه وخدها صاحبها

ثم أردفت بابتسامة تحاول فيها إخفاء دموعها :

- بس بيكلمنى كل يوم ويعرفنى أخباره أول بأول , والله مرات اخوك دى ست معدنها ذهب وأصيلة وبنت أصول

- وبتبعتهلها الشهرية ولا لأ يا ماما ؟

نظرت أمى بتعجب :

- طبعًا يا ابنى بتاخدها كل أول شهر وانت بنفسك اللى بتبعتهلها

رددت باستنكار :

- أنا اللى ببعتهلها؟؟؟؟!!

وضعت يدى على رأسى وكأن الصداع عاد يُدَمِّرُ خلايا مخى من جديد

فاقتربت منى أمى مندهشة :

- ايوه يا حبيبى انت نسيت ولا ايه ؟؟

- لايا ماما ما نسيتش بس عندى شوية صداع , أنا هنام لحد ما تخلصى الغدا .

- طيب يا حبيبي تصبح على خير

قالتها وهيا تسحب على الغطاء وتطفئ النور وتتركنى أعانى فى صمت .

بحر.....

ميه زرقا , سمك فرحان , سما نورها واصل للميه , شمس شعاعها
بيدقنى من بعيد وإنسان حربيوعوم زى أى سمكة حافظة طريقها فى الميه
من غير علامات , معنديش خياشيم بس بتنفس تحت الميه , سايب
جسمى حر من غير قيود ...

اتميت فى يوم أكون طائر هريان من الأسر ..

أكون حصان جامع معاه فارس نبيل ..

أكون إنسان عايش فى عالم مسحور ..

مدينه فاضلة أسوارها ورد , أبوابها ذهب , سكانها ملايكة ..

مفيهاش حزن ولا وجع , مفيهاش ألم ولا مرض , مفيهاش حد ملعون ..

شفت نفسى غريق , بموت , بتخفق

ناس بتجرى ناحيتى جايه تنقذنى , قربوا منى لحد ما عرفتهم

ماما , نهلة , هشام , بابا , يوسف وناس تانية مش عارفهم

كلهم بيمدوا أيدهم ينقدوني لكن فجأه بدل ما يسحبوني لقيتهم
بيغرقوني أكثر

كنت عاوز أصرخ استغيث لكن صوتي كان مخنوق , مكتوم , رافض
يخرج

استيقظت من نومي أتنفس بصعوبة , ألام متفرقة ألمت بجسدي كله
وبرغم ذلك نهضت من سريري لعلّي أتنفس هواءً نقيًا يزيح ما بداخلي
ارتديت ملابسى وهممت بالخروج حين استوقفتنى أمى التى كانت
تجلس بالردهة :

- شريف؟! انت رايع فين ؟

- خارج شوية يا ماما أشم هوا

امسكت بذراعى تمنعنى من الخروج :

- تشم هوا ايه يا ابنى وانت لسه تعبان كدا , دا مبقالكش ساعتين
خارج من المستشفى ولا حتى كلت لقمة من ساعة ما خرجت

قبّلت يدها واتجهت ناحية الباب :

- معلش يا ماما مخنوق وعائز اتمشى شوية وبعدين خلاص الدنيا ليل
والجو حلو يعنى مفيش شمس هتتعبنى وكمان أنا لابس ايس كاب أهو
ومغطى الجرح خالص يعنى ما تقلقيش

- طيب يا ابني لو مصمم تخرج كنت خدت مراتك وقعدتوا في أى حنة
مع بعض واهو تراضبها وتجر خاطرها بدل ماهى زمانها قاعدة فى
الشقة لوحدها لاحد يونسها ولا عيّل ياخذ بحسها

ابتسمت بهدوء :

- معلش يا ماما سيببى على راحتى وأنا يومين كدا وهرجع البيت ولا
اننى زهقتى منى ؟

أجابت أمى باستسلام :

- وأنا هزهق منك بردو يا شريف , انت حرا يا ابنى اعمل اللى يربحك
بس اللى بتعمله مع مراتك دا ما يرضيش ربنا , أنا عارفه الحجج اللى
بتقولها لها علشان تبتات عندى ولا عند حد من أصحابك , ودى زوجة
يا ابنى ولها حقوق وملهاش غيرك ومراتك ست كويسة وما بتشتكيش
بس أنا حاسه بيها .

اجبتها بعصبية واضحة :

- اننى عارفة كويس يا ماما أنا اتجوزت نهلة ليه , ولو كنتى مش فاكرة
فأنا بفكرك أهوانى اتجوزتها علشان أخلص من إلحاحكم على جوازى
يعنى من الآخر كده لا بحبها ولا يعتبر نفسى أصلاً انى اتجوزت وكويس
أوى اننا لسه مكملين

أجابت أمى بنبرة صوت أعلى :

- حتى لو ما بتجهاش بردو ما تظلمهاش ,الناس كل يوم بتتجوز مش لازم يعنى تحبو بعض سنين علشان تتجوزوا ,وبعدين مراتك فيها كل حاجة كويسة لكن انت اللى قافل قلبك ,تقدر تقولى إحساسك ايه لوهى عاملتك نفس المعاملة , لو كل يوم بتحاول تقرب وهى بتبعد , لو أهملتك وعاشت بجسمها معاك لكن قلبها مع واحد تانى

صرخت فيها لأول مرة بحياتى:

- كفاية بقى أنا زهقت من الكلمتين اللى بسمعهم كل يوم , مش عايز نصايح من حد

انصرفت مغلقًا الباب خلفى بقوة كادت أن تطيحه من مكانه متجهاً لذلك المقهى الذى أرتاده فى لحظات خنقتى الغير منتهية

مقهى " فيروز " المطلّ على النيل , صاحبه عم " سلامة " ذلك الرجل الذى ما زال محتفظاً بصورة الست أم كلثوم والرئيس عبد الناصر , رجل متهالك يستنفذ ما بقى له من ايام , دائماً ما كانت الناس تتسائل عن سر صحته رغم كِبَر سنه وكان يجيهم بتلك الجملة التقليدية " احنا ناس متريية ع السمن البلدى فى زمن كان كله خير مش زى زمانكم الفقر " , لا يغادر المقهى أبداً إلا عند سماعه صوت الأذان فيذهب للمسجد ليقضى الصلاة ويعود ليجلس أمام الخزانة حتى تدق الساعة الثانية عشر فيغلق أبواب مقهاه ويعود لمنزله يقضى ساعات الليل حتى يفتح أبوابه مرة أخرى فى الصباح , دائماً ماتراه ممسكاً بسبحته ال 99 حبة , وأمامه فنجان القهوة التركى " بن غامق " .

- حقيقة ايه يا ابني بعد الشر عنك , طولة العمر ليك , تلاقيه بس واحشك شوية علشان كدا بتعلم بيه

نظرت لعم سلامة متسائلًا :

- قولي يا عم سلامة , عمرك حلمت بحاجة واتحقت زى ما هي بالضبط كأنك كنت صاحى وشايفها

ضحك عم سلامة وهو يعود بالكرسى للوراء :

- يووووووه , كتير يا ابني , طيب تصدق إني حلمت ان خالتك أم سلامة هتموت قبل وفاتها بأسبوعين , وكنت حاسس بكده وما قولتش , كنت بقول يمكن أضغاث أحلام بس طلعت حقيقة وغير كده كتير حلمت بحاجات واتحقت , يا ابني الرؤية الصالحة دي جزء من النبوة

ابتسمت وأنا أربت على كتف عم سلامة :

- طيب انت يا عم سلامة راجل مؤمن لكن أنا من اللى بيركعوها لما يحسوا انهم هيموتوا

ضحك عم سلامة وربت على كتفى :

- ربك وحده يا ابني اللى عالم بالمؤمن , استغفرت بس وسيها ع اللى خلقك ,

هقوم أعملك نعناع يروقك وأشغلكك أغنية بصوت الست ينسبك
اسمك

ابتسمت بتهكم :

- والله يا عم سلامة أنا ناسيه من غير حاجه

ضحك عم سلامة :

- طول عمرك دمك زى العسل

انصرف عم سلامة للسبترية التي يطلق عليه بوتاجاز وحضَّر كوب
القهوة المحروق " إيهاب "

إيهاب , يشبه كثيرًا أحمد حلمى فى فيلم الناظر لكن النسخة المحروقة ,
لا يعلم لم ولد بهذا الكم من السمار , كنا أيام المدرسة نظن أنه فعل
فعلة سوداء فى أحد الأشخاص فعاقبه الله بهذا الكم من السمار ,
صديق طفولة أو كما أدعوه دائمًا " لزق أمير " دخلنا معًا الإبتدائية
والإعدادية والثانوية حتى وصلنا مرحلة الجامعة فافترقنا , دخل إيهاب
كلية الآداب ليكون خليفة لأبيه الأستاذ منصور ويكُوِّش على الدروس
الخصوصية فى إمبابه وضواحيها واتجهت أنا لكلية التجارة هروبًا من
السير على خطى والدى , تزوج بعد تخرجه بشهرين من " نيرمين "
زميلة الجامعة , أنجب " عبد الرحمن " بعد زواجى بأسبوع لذلك
نحتفل بذكرى زواجى مع عيد ميلاد عبد الرحمن توفيرًا للتورته , يشبه
كثيرًا عمود النور من حيث النحافة والطول , عندما يحتضنى أشعر أن

قفصه الصدري هو من يقوم بهذه المهمة عنه , شعره أعلن الفراق وانتقل لرحمة الله تعالى , أنفه الطويل يحشره في كل صغيرة وكبيرة , أسنانه الغليظة لا تكف عن اختراق سندوتشات الكبدة من حمادة تلوث , لسانه المفلطح لا يكف عن التثرثرة حتى أنه أوصانا بعدم دفن أحد بجانبه حتى لا يهيج من المقبرة مصدع ويحلف طلاق ثلاثة ما هيدخل تانى إلا لما يمشوا إيهاب من جنبه .

- شريف سيف الدين بذات نفسيته في قهوة الغلابة ياجدعان , والله ادبح أرنب وأوزعه لله

احتضنى كالعادة بقفصه الصدري حتى استمعت لسيمفونية عصافيره كاملة :

- ازيك يا إيهاب يابتاع الآداب

وضع يده على فمى وهو يجلس بجانبى كالعادة :

- بس ياعم اسكت أحسن يفتكروا انها حاجة كدا ولا كدا

أشار لعم سلامة بالتحية وهو يربت على بطنه الفارغة دائماً فأرسل عم سلامة الواد محمود لشراء 10 ساندويتشات كبدة " يمسح بها إيهاب زوره

- قولى يا شريف عامل ايه دلوقتى , ما توقعتش انك تخرج بالسرعة دى

- وانت يا واطى كنت سألت

- يا عم وربنا المعبود جيتلك المستشفى وكنت حالف ما أمشى إلا وانت
معايا لكن الدكتور قال لازم الكل يروّح وانك فى العناية وكدا كدا
محدث هيدخلك , بالأمانة اسأل نهلة وأمك

نظرت له باحتقار :

- اسمها أمك يا بيثة

- خلاص يا عم الست الوالده , المهم انت عامل ايه؟

ابتسمت متحاملاً :

- كويس

نظرلى إيهاب بعدم تصديق :

- والله لأكويس ولا حاجة , مالك يا شبرى

- والله يا إيهاب الدنيا ملخبطة معايا ع الاخر , الصداق ما بيفارقنيش ,
جسمى كله كأنه بيتعذب فى جهنم , كوايبس بشوفها وأنا صاحى ووأنا
نايم , حاسس انى قربت اتجنن

شعرت بالحزن فى عيون إيهاب ولكنه حاول جاهداً ألا يبديه :

- ايه ياعم جو أفلام نادية الجندى دا , ناقص تقول اتحدف عليا مية نار

ضحكت وكأنى كنت أنتظرها , أنتظر إحدى إفهات إيهاب المشهورة لتخرجنى مما أنا فيه :

- عبد الرحمن عامل ايه ؟

- كويس ياعم وخلص هنجوزه الأسبوع الجاى

ابتسمت فى تهكم :

- ومستعجل على نهاية الواد ليه

انفعل إيهاب كعادته ليس حبًا فى الجواز ولكنه يرانى ناكر فضل الله فى إعطائى زوجة مثل نهلة

- أهو انت كدا يا نائب عزرائيل يبقى معاك الشهد ونفسك تهف ع المش ابودود

اعتدلت فى جلسى وأنا أنظر إليه بعصبية :

- تقصد ايه

نظر إيهاب جانبًا وهو يشيح بيده :

- انت عارف كويس أقصد ايه مش هنضحك على بعض

ارتفعت نبره صوتي وزاد حدة :

- قلت لك مية مرة بطل تلقح كلام ولو فاكر ان الحيطه اللي بيني وبين نهلة سيبها أميرة تبقى غلطان

ابتسم إيهاب بتهكم :

- ومين جاب سيره أميرة , شفت بقى ان انت اللي نفسك تتكلم عنها وماصدقت تلاقى حد ينكشك

ظهر الإرتباك على ملامحي حين لاحظته إيهاب فقال مُدْعِيًا النصح :

- يا شريف الرجالة بيحبو مية مره وبينسوا ودا مش معناه

قاطعته بانفعال وصوت أصبح أعلى من سابقه :

- انت بالذات ما تدينيش حكم ومواعظ في الحب والجواز , انت اللي فضلت تحب فيها طول الأربع سنين ومقضيها تسبيل ونحنحة جيت في الآخر اتجوزتها وخلفت منها والحمد لله عايشين اخر انبساط يبقى ما تجيش انت بقى تديني محاضرة ازاي ابقى سعيد مع واحدة ما بحمهاش , وحتى هشام اتجوز البنات اللي حياها وعاش معاها سعيد لأخر يوم من عمره فبلاش تمثيل بقى ودور مُرَشَّح الرئاسة اللي ماشيين فيه دا

خرجت كلماتي سخيصة حاقدة رغم أنها لم تكن ما أريد قوله وأعلم مدى رغبة إيهاب في إسعادي ولكني هكذا أنا دائماً لا أفكر فيمن حولي

- أنا اسف يا إيهاب , والله العظيم ما أقصد أنا ...

ابتسم إيهاب بود :

- بس يا عبيط بتتأسف على ايه , عارف يا شريف أنا يمكن أكون اتجوزت نيرمين عن حب بس مين قالك انى عايش سعيد زى ما إنت فاهم , أنا كتير أوى بلعن اليوم الى روحى اتقدمتلها فيه وأقول لنفسى أنا ليه ما خلتنيش مقضها تسبيل ونحنحة زى ما بتقول ووقت الجواز شفت غيرها , وهشام فعلاً اتجوز الى بيحبها بس اهو القدر استكثر عليه يعيش مبسوط وحرمه من الجنة الى انت متخيل انه كان عايش فيها , يا شريف مش كل اللى بيلمع لولى ساعات بيبقى ترتر

انتابتى نوبة ضحك هيسيرية كنت احتاجها بشدة:

- شكل الليلة كلها هتطلع ترتر , ربنا يسعدكم يا إيهاب والله العظيم أنا أتمنى لك الخير زى ما أتمناه لنفسى دا إنت أخويا يالا

ضربنى إيهاب على كتفى بيده التى تشبه عصا المكنسة :

- عارف يا ض عارف انت هتعيط

- تصدق انى غلطان , قوم يالا من هنا

تناول العشر سندوتشات فى خمس قضمات بمعدل سندوتشين فى كل فتحه بوء واستطرد :

- قولى بقى بجدا يا شريف فيه ايه بينك وبين نهلة , أميرة السبب ؟

رجعت بظهرى للوراء ونظرت للسماء لعلّى أجد الإجابة فى إحدى أحلام اليقظة التى التهمتني مؤخرًا :

- والله يا إيهاب مش أميرة هىّ السبب الرئيسي , مش هنكرانى حبيبتها لدرجه انى ما تخيلتش فى يوم انها ما تكونش مراتى , وكانت صدمة طبعًا بالنسبة لى إنها تتجوز , لكن كمان حاسس بغربة بينى وبين نهلة , يا ابني دا أنا ما كلفتش خاطرى اسأل عليها ولا على أهلها زى ما الناس بتعمل وعلشان أخلص من زن أمى ع الجواز قولتلهم خلاص موافق واهى جوازة تفوت ومحدش يموت , ساعات بقول لنفسى أنا ليه وافقتهم , ليه ما روحتش لأميرة ومنعت الجوازة دى واتجوزتها أنا , بس لما ببص لخلقتك بكره الجواز كله

ضحك إيهاب وهو يرتشف اخر قطرات كوب الشاي :

- حبيبي يا شريف طول عمرك تموت فيا يا جدع

نهضت من مقعدى وناديت على محمود لأحاسب على طلبات إيهاب كالعادة , حين اجتذبنى إيهاب لإكمال القعدة :

- رايح فين يا عم لسه بدرى , الليل لسه فى أوله

- معلش يا إيهاب هروح بقى لحسن متخانق مع أمى وهنقلق عليا

ضحك إيهاب مصدرًا صوت الضفدعة الحامل :

- انت لسه بتخاف من أمك يا ض مع مع

ابتسمت لدعابته البايخة :

- أنا ماشى يا ابن الظريقة , سلام

_ سلام يا شيرى

هانماً على وجهى أنظر إلى الطريق تارة وأعود لشرودى تارات , لا أدرى هل ما أنا فيه حجة أبتعد بها عن زوجتى أم أن قلبى اعتاد الهجر حتى أحبه , بعد ساعات من السير بلا هدف عدت مرة أخرى لمنزل امى , تعمدت ان أعود متأخرًا حتى لا أتحدث معها فلم يعد لى رغبة حتى فى إخراج الكلمات , ولكنى عندما عدت وجدتها كعادتها مستيقظة تنتظرنى بلهفة وقلق

دخلت وأغلقت الباب خلفى وجلست على أقرب مقعد لها :

- سلام عليكم

- عليكم السلام , عامل ايه شريف

- كويس الحمد لله , أنا أسف يا ماما إنى علّيت صوتى عليكى بس
الظاهر انى فعلاً بقيت مريض مش مسئول عن كلامى

ربتت أمى على يدى فى حنان :

- بعد الشر عليك يا حبيبي أنا عارفه انك ما كنتش تقصد و أنا مش
زعلانة والله , قولى بقي كلت ولا لأ

ابتسمت فى مرح :

- والله يا ماما الواد ابن المحروقة الى اسمه إيهاب طفح السندوتشات
كلها

قهقهت أوى لدعابتى وهى تربت على يدى :

- طيب ما تزعليش أنا هقوم أحضرك الأكل

قبّلت يدها فى ابتسامة :

- ما نتحرمش منك يا بطة

بعد ساعة كنت قد انتهيت من تناول الوجبة الوحيدة التى دخلت
جوفى منذ أيام وعدت لسريرى وأحلامى المتخبطة من العالم الآخر

- أنا رجعت أوضه العمليات تانى ليه , هى العمليه فشلت ؟

التفتُ حولى فوجدت ذلك الطبيب بنفس هيئته السابقة وحتى تلك
الكمامة التى كانت تغطى وجهه

تسائلت بخوف :

- انت هتعملى عملية تانى ليه ؟ أنا لسه فايق , انت هتعملى العملية
وأنا فايق ؟

صرخت أرجوه أن يسمعنى :

- رد علىّ أنا جرالى ايه ؟

وجدت يده تمتد إلى فمى وكأنه نسى مكان جراحته فناديت عليه لعله
يفيق :

- يادكتور العملية فى راسى انت نسيت ؟

وجدت الطبيب يزح الكمامة عن وجهه وبيتسم

- هشام ؟؟؟

- ما تخافش يا شريف

اقتربت يده من فمى وهو يحمل أداة تشبه الملقط , فتح فمى وأنزلها
فى حلقى وكأنها ستصل إلى معدتى , أخرجها وهى تحمل كتلة سوداء
شكلها مقيت ورائحتها مقززة إذا نظرت إليها تشعر كأنك ستنتقى ..

نهضت جالسًا عندما أخرجها وسألته ..

- ايه دا ياهشام ؟ ايه اللى انت خرجته دا ؟ أنا ما بشتكيش ببطنى أنا
دماغى اللى بتوجعنى

ابتسم هشام وانصرف حاملاً معه تلك الكتلة المقيتة وهو يرمقني
بشفقة :

- مش بإيدنا غير المكتوب ولا نمعنه , لكن بإيدك توقفه

قالها ثم ولّاني ظهره وانصرف وسط ندائى الصامت ..

استيقظت على صوت جرس الباب كانت الساعة الواحدة بعد الظهر ,
سمعت أمى تهلل بترحاب

- حبيب تيتا وحشتنى أوى

عرفت أن أمانى قد حضرت لتطمئن علىّ , لحظات ووجدت أمى تقرع
الباب

- ادخلى يا ماما

ابتسمت أمى وهى تفتح الباب :

- أمانى جت يا شريف تتطمئن عليك

نهضت بألم استعداداً لدخلوها :

- تفضل طبعاً مش محتاجة عزومة

انزاحت أمى جانباً حتى ظهرت أمانى وهى ممسكة بيد يوسف ..

أمانى الجميلة الودودة العظوفة ملائكية الوجه , عذبة الصوت , طيبه القلب , عندما تراها للوهلة الأولى تستشعر منها أخوة وأمومة وكأنك تريد أن تقص لها ما يؤمك لتجد عندها الدواء , بشرتها الخمرية وعيناها السوداوين أضفت عليها أصالة , جسدها النحيل ازداد وهناً وضعفًا بعد وفاة أخى لطالما أرادت له أن يكون ملكًا متربعًا على عرش قلبها وأرادت لابنها أن يحيا بين والدين متحايين وأسرته متكاملة لا تشوبها شائبة , إلا أن الحظ التعس أوجد هشام أمام سيارة مسرعة غير مبالية أنهت بدورها حياته وحياة زوجته وابنه اللذان لم يبق لهم الا الله , تبا لهذه الحياة الكريمة التي لا يستوى لنا فيها أمر

- ألف سلامة عليك يا شريف ,, انتزعتنى صوت أمانى من تفكيرى المؤلم

- الله يسلمك يا أمانى انتى عاملة ايه

- أهوزى ما أنا , قالتها وهى تزبح خصلات شعرها للوراء وتنظر إلى يوسف

- مش تسلم على عمو يا يوسف

قفز يوسف فوقى من شدة فرحته :

- عمو حبيبي انت وحشتنى أوى

صرخت فيه أمانى :

- حاسب على عمو يا يوسف دا لسه تعبنا

- اسف يا عمو

جَدَّبَتْهُ نَحْوَى وَقَبَّلَتْهُ مَحَاوِلًا اسْتِعَادَهُ فَرِحَتْهُ :

- قولى أخبارك ايه والمدرسة عامله ايه معاك يابطل

أجاب يوسف بتذمر:

- كويسة بس أنا بحب مدرستي الأولانية وأصحابى وعاوز أرجع بيتنا
بقى يا عمو

عنفته أمانى حتى يقطع حديثه :

- خلاص يا يوسف بقى سيب عمو يرتاح

قالتها بعصبية واضحة جعلت يوسف يذهب للجلوس مع جدته أمام
التلفاز

دعوتها للجلوس محاولاً تقليل غضبها :

- ايه يا أمانى انتى هتفضلى واقفة ولا ايه , يعنى هبقى أنا مش قادر
أقوم وانتى مش قادرة تقعدى

ابتسمت أمانى وجلست فى الكرسي المقابل لسريرى :

- خرجت من المستشفى امتى ؟

- والله يا أمانى لسه خارج امبارح , يادوب قعدت تانى يوم بعد العينة
لحد ما الدكتور اتظمن عليا وخرجت على طول

- الدكتور بيقول انها حاجة بسيطة وما فتحش فى المخ غير يادوب
مدخل الإبرة وخلص علشان كدا خرجت على طول

- الحمد لله ربنا ستر

- و عامل ايه دلوقتي ودماعك عاملة ايه

ابتسمت وأنا أشير لرأسى :

- والله أنا كويس بس دماغى زى مانتي شايقة بقت بتلمع اكر من طقم
الصينى بتاع أمى اللى فى النيش

ضحكت أمانى حتى زالت عصبيتها فسألته بشفقة :

- ليه بتعملى كدا مع يوسف يا أمانى الولد مقالش حاجة تستحق
عصبيتك دى

ردت بحزن وهى تضم ذراعها إلى صدرها :

- أنا مش عايزه الولد يفضل عايش فى سجن ذكرى أبوه , عايزاه يخرج
من المود دا ويتعايش مع الواقع ويكون صداقات جديدة ويعرف ناس
مختلفة, الولد منعزل عن الناس تمامًا يا شريف زى مايكون أبوه
هيرجع تانى

رَبَّتْ عَلَى يَدِهَا مَحَاوِلًا مَازَرْتَهَا :

- مَعْلَش يَا أَمَانِي كُلَّهُ هَبِيقِي كَوَيْسِ بَسِ بِالتَّدْرِيجِ , وَيَارِيْتِ تَعْمَلِي نَفْسِ
الشَّيْءِ أَنْتِي كَمَا نِ , أَنْتِي لَسَهُ صَغِيرَةٌ وَمَنْ حَقَّكَ تَبْدَأِي حَيَاةً جَدِيدَةً
نَظَرْتِ لِي أَمَانِي بِدَهْشَةٍ :

- أَنْتِ الَّتِي بِتَقُولِ كَذَا

- أَيَوَهُ يَا أَمَانِي وَابْقِي إِنْسَانًا أَنَا نِي لَوْ سَلَبْتِكَ حَقَّكَ فِي الْحَيَاةِ
ادَارْتِ وَجْهَهَا فِي عَصَبِيَّةٍ :

- أَنَا خَلَاصٌ مَا بِقَاشِ فَيَا قَلْبِ يَتَجَوَّزُ وَلَا يَحِبُّ وَلَا حَتَّى يَبْدَأَ حَيَاةً
جَدِيدَةً , أَصْلًا مَفِيشِ حَاجَةٌ اسْمُهَا حَبُّ كُلِّهَا كَدِبَةٌ بِنَصْدَقِهَا عِلْشَانِ
عَايِزِينَ نَصْدَقِهَا , أَنَا هَعِيشِ عِلْشَانِ أُرِي يَوْسُفَ وَبَسِ
شَعَرْتِ تَجَاهَ حَدِيثِهَا بِغَرَابَةٍ لَكِنِّي أَقْنَعْتُ نَفْسِي أَنَّهُ حَزْنًا عَلَى أَخِي وَقِصَّةِ
حَيْمِ القَتِيلَةِ ..

نَهَضْتُ أَمَانِي وَأَحْضَرْتُ حَقِيبَتَهَا اسْتِعْدَادًا لِلذَّهَابِ :

- أَنَا مُضْطَّرَّهُ أَمْشِي بِقِي يَادُوبِ عَلَى مَا أَخْلَصَ مِنْ زَحْمَةِ القَاهِرَةِ
وَأَوْصَلَ اسْكَندَرِيَّةَ هُنْكَوْنَ بِقِينَا بِاللَّيْلِ , خَلَى بِالْكِ مِنْ نَفْسِكَ يَا شَرِيفِ
وَابْقِي طَمَنِي عَلَيْكَ

قَالَتَهَا وَهِيَ تَمُدُّ يَدَهَا بِالسَّلَامِ وَتَوَلِّيَنِي ظَهْرَهَا وَتَخْرُجُ .

وَدَعَّتْهَا أُمِّي وَأَحْضَرْتُ لِي الْغَدَاءَ وَجَلَسْتُ بِجَانِبِي حَتَّى أَنْتَهِيَ مِنْهُ :

- مش عارف ليه يا ماما حاسس إن فيه حاجة مضايقة أمانى من ناحية هشام

- حاجة زى ايه يا ابني دول كانوا بيحبوا بعض حب لاشفت قبله ولا هشوف بعده

- الله أعلم بس حكاية نقلها اسكندرية دى غريبة

- والله يا ابني أنا كمان استغربت بس قولت يمكن مش قادرة تعيش فى الشقة اللي كانت قاعدة فيها مع هشام الله يرحمه واهو أهلها كمان فى اسكندرية هيوئسوها

- يمكن , انتى ما مسكتيش فيها تتعدى الأول ليه ؟

اجابت امى بدعر :

- والله يا ابني مسكت فيها كتير واتحايلت عليها تقعد معانا النهاردة بس تاخذ نفسها وتبقى ترجع بكرة بس ما رضيتش وصممت انها ترجع اسكندرية النهارده

- ربنا يسعدها أمانى تستاهل كل خير , قلتها وأنا أتناول الملعقة وأبدأ فى تناول طعامى وأفكر فى ما تخفيه أمانى عنا .

أنا لن أعود إليك مهما استزحمت دقائق قلبي

أنت الذي بدأ الملالة والصُدود وخان حبي

فإذا دعوت اليوم قلبي للتصافي لا لن يلبي

كنت لي أيام كان الحب لي أمل الدنيا ودنيا أمل

صوت السيدة أم كلثوم يملأ أرجاء الغرفة , عدوبته هي ما تبقى قلبي
حيًا , سنوات أستمع إليه ولا أمل , أجده ملازمًا لي عندما أكون عاشقًا
أو جريحًا , ما أروع نغماته وقسماته .

قطع صوت أم كلثوم طرق أمي على الغرفة , فأوقفت الأغنية ودعوتها
للدخول

- اتفضلي يا ماما

دخلت أمي بابتسامة :

- على صاحبك بره وعاوز يظمن عليك

- طيب يا ماما خليه يدخل

" على " صديقي من الجامعة تخرجنا معًا من كلية التجارة , كان أبي
رحمه الله يملك شركة استيراد صغيرة تقوم باستيراد الأدوية من
الخارج , وكان ينتظر موعد تخرجي ليُحَمِّلَنِي كافة شئون الشركة مع أخي

هشام رحمه الله ووعده صديقي " على " بعمل مجزي سوف يحصل عليه فور انتهاء دراسته , وبالفعل أنهينا دراستنا وانشغلت أنا بالماجستير وذهب على للعمل في شركة والدى فور ظهور النتيجة , تعرفت عليه في أولى ايامى بالجامعة بعد انفصالي عن صديقي إيهاب , هادئ الطباع , خجول , منطوى احياناً , يشبهني في بعض الصفات وحتى قسمات وجهينا , عند تعارفنا أخبرني أن والده ووالدته تُوقيا في حادث سيارة وانتقل هو للعيش مع عمه حتى دخوله الجامعة , والآن يستأجر شقة خاصة به يدفع ايجارها ويكمل تعليمه من معاش والده ووالدته الموظفين , في البداية أشفقت لحاله ثم تطورت صداقتنا أكثر حتى أصبح في معزة أخى هشام , تشاظرنا الكلام والجلوس والمذاكرة وحتى النوم , فكان أكثر مبيته عندى وأكثر جلوسنا عنده , أحبه أبى وأمى كثيراً لحسن خلقه , كم من الليالى قضيناها نتحدث عن قصة الحب العنيفه التى ننتظرها , وكان هو دائم الشكوى من عدم قدرته في اجتذاب الفتيات نظراً لنظارته الطبية وقصر قامته وكنت أنا أنافقه باسترسالى في ذكر محاسنه وانه لولا "الكوسة" لاصبح " نجم شباك " بوجهه الطفولى وبشرته البيضاء المشبعة بالخمرة وابتسامته الجذابة , استمر بالعمل في شركة والدى حتى بعد وفاته ولحق أخى هشام به لكن قبل شهرين اكتشفت بعض الأخطاء الحسابية اثناء مراجعتى لميزانية الشركة , كانت هذه الاخطاء كافية لطرده خارج الشركة لكنى أبقيته لتمكنه من العمل وإخلاصه السابق ولأعلم ما الذى اضطره لفعل هذا .

- عامل ايه يا صاحى ؟ قالها وهو يحتضنى

أجبت بابتسامه :

- شغال

ابتسم بسخرية :

- طيب ياعم اليونيفرسال يارب تفضل شغال ما تفصلش

جذبنى من ذراعى لِيَحْتَنِّى على النهوض

- قوم ياعم نقعد فى البلكونة بدل قعدة السرير الى تمرض دى

جلسنا فى مكاننا القديم ننظر للمنازل الحديثة المصطفة التى كانت مجرد أرض خاوية نلعب فيها كرة القدم بعد خروجنا من الجامعة , لا أعلم هل نحن من يتغير أم الزمن هو من يجبرنا على التغير

لاحظ على شرودى فانتزعى منه :

- ما توحده الله يا جدد انت عامل كدا ليه , ايش حال انها حته عينة
يعنى

- مش يمكن النتيجة تطلع كانسر

- بصراحة يا شريف نهلة مراتك حاشرة مناخيرها في الشغل في كل صغيرة وكبيرة لدرجة انها مصممة على شركات معينة نستورد منها الأدوية واحنا ما بنتعاملش معاها أصلاً

- طيب ونهلة تعرفهم منين ؟

- والله السؤال ده تسألته لها هي , قالها شريف بنبرة أعرفها جيداً تحمل في طياتها الشك وإلقاء التهمة

- عمومًا أنا هكلم نهلة وافهم منها وابقى أكلمك , وانت خلى بالك من الشركة يا على انت عارف كويس دى أيه بالنسبة لى وانى مستأمنك علما بحكم العيش والملح اللى بيننا , يعنى ياريت ما ألاقيش غلطات حسابية مرة تانية واطن انك فاهمنى

بدا عليه علامات الحزن لا أعلم إن كانت صادقة أم مصنوعة :

- إنت لسه مقتنع إنى بسرقتك يا شريف

- أنا مش مقتنع بحاجة يا "على" أنا بس بنبه عليك , وياعم خدها على إنها نصيحة مش لازم يعنى تبقى شك

نهض على من مقعده وهمّ بالذهاب , كعادته كل مرة أواجهه بتقصيره ينصرف وسط نظرات الأسى والاستعطاف التى مللتها :

- ماشى يا صاحبي هعدى عليك تانى , خلى بالك من نفسك

- مع السلامة يا على

دخلت أُمى بعدما لاحظت خلافنا :

- فيه ايه يا شريف انت متخانق انت وعلى ولا ايه

- مش متخانقين ولا حاجة أنا يادوب فكرته بالغلطات الحسابية اللي لقيتها في الدفاتر

- طيب يا ابني ما كنتش قولتله حاجة مش يمكن مظلوم

- مظلوم ازاي يعنى يا ماما إذا كان هوا اللي ماسك حسابات الشركة ,
عمومًا أنا سامحته وقولت يمكن كان محتاج بس صدقيني لو اتكررت
هطرده من الشركة وهنسى العشره اللي بينا

- نظرت إلى أُمى بعصبية :

- مش كل حاجة الواحد شايفها تبقى حقيقة , ياما حقايق كثير اتزيفت
, لازم تتأكد الأول قبل ماتتهم صاحب عمرك وربنا يبعد عنك شر خلقه
يا ابني

قالها أُمى وهى تخرج من الغرفة وتتركنى أعيد ترتيب حساباتي

- على صاحبي الوحيد اللي باقبلي بيسرقني بس للاسف أنا محتاجله
وعلى الأقل اهو بيسرق بس شايف الشغل صح , نهلة ما أعرفش ليه
عاوزه تتدخل فى شغلى مع انها ما تعرفش حاجة فى الأدوية ولا حتى فى

الحسابات بس شكلها عايزه تأمن مستقبلها بعد ما أموت ماهى عايشة
مع واحد محكوم عليه بالموت من مرض لا يعرفه ولا يعرف علاجه ,
يارب أنا دماغى تعبت وما بقتش قادر أكمل ياترى هيتكتب لى أعيش
ولا تحصل هشام

-هشام؟؟

- أنا حلمت بهشام تانى , بس المره دى مش عارف هو عاوز ايه ولا
عارف أنا ليه بحلم بيه مع انى ما حلمتش بيه من يوم ما مات لحد
اليوم المشؤوم بتاع العملية , ياترى عاوز ايه ؟ , يمكن عاوزنى اروح
معاه؟؟ , طيب ما أنا كنت معاه رجّعتى ليه ؟ , طيب ايه اللى مش
بإيدينا نغيره ولا نمنعه ؟ , طيب اخد بالى من ايه ؟

من ايه ؟

رئين هاتفى هو منقذى الدائم من هواجسى المؤلثة

- الو

- ازيك ياشيرى

- ازيك يا إيهاب

- عامل ايه النهارده ؟

- كويس الحمد لله

- مش هتيجى القهوة النهارده ولا ايه ؟

- لا والله يا إيهاب مش قادر من الصبح زيارات وتليفونات وزمان نهلة
كمان جاية دلوقتى , خلمها يوم تانى

- ايوه يا عم المهم عيشلنا فى الدور بقى

- ياض ياغبى الناس عارفة انى خرجت من المستشفى وجايه نظمن
عليا

تهكم إيهاب كعادته :

- وكمان ناس دا انت ناقص تقولى هتطلع مع معزز الدمرداش الحلقة
الجاية يا عم العالمى , طيب تعالى شوية غير جو

ابتسمت لطريقته التى لا تتغير :

- مش قادر والله , أنا صحيت على صوت أمانى ويوسف ويا دوب مشيو
لقيت على جاي ولسه ماشى من شوية ونهلة هتيجى دلوقتى غير الناس
الى فى الشركة بتتصل بيا طول النهار ويقولوا هيجمعوا بعض ويبجوا

- ايوه بقى عبيلو واديلوربنا يكثر أحبابك

- هههههههه غور يالا اتسرح فى أى حته إلا هنا علشان أمى ما بتحبكش

- امى بردو يا بيئه اسمها مامى

ضحكت حتى ارتفع صوتى :

- والله ونضفت وعرفت مامى

- تلميذك يامدرسة , قولى أمانى ويوسف عاملين ايه

دب الحزن فى قلبى مرة أخرى عند ذكرهم :

- كويسين من برا بس الله أعلم باللى جوا

- الله يعينهم بردو اللى حصل لهم مش شوية

- ربنا يلفظ بهم

- وعلى عامل ايه

أجبت بشرود :

- كويس

- ايه ياعم انتوا قافشين ولا ايه

- لا مش قافشين ولا حاجة بس انت عارف من ساعة موضوع

الحسابات وأنا قافل منه

حاول إيهاب التخفيف عنى :

- يا شريف كلنا بنتزق ويمكن وقتها كان محتاج فلوس ضرورى واتحرج
يقولك

أجبت بعصبية :

- اتحرج يقولى يا إيهاب يقوم يسرقنى

- يووووووووه يا عم خالصنا بقى من أم الموضوع دا , خلاص غلطة
وعدت ما يبقاش قلبك اسود كده

- عموماً أنا فعلاً عديتها وسيبته يكمل شغل بس اكذب عليك لو
قلتك ان قلبى صافى له زى زمان , هفضل وراه لحد ما أعرف عمل
كده ليه وليه ما بيبررش الغلطات دى وكل اللى عليه يتصعبن ويقولك
انت بتشك فىا ؟ , يبقى سارقنى ويسألنى إذا كنت شاكك فيه ولا لأ ,
والله دى حاجة جميلة

- جميلة ابو حريد هع هع

- وحياة أمك لوماقفلت لاجى اطلع تيت تيت تيت

برغم ضيقى لكنى فى النهاية ابتسم بعد اى حديث بينى وبين إيهاب ,
شخصيه برغم مافها من هموم لكنها تسعد الآخرين .

نظرت فى ساعتى وجدتها العاشرة مساءً ولم تصل نهلة حتى الان ,
شعرت بخوفى عليها وربما اشتياق لا أسمح له بالخروج , اتصلت بها
لأطمئن ..

- الو , ازيك يا نهلة

- ازيك يا شريف عامل ايه دلوقتي

- يعنى انتى سألتى

- اتصلت بماما الصبح واطمنت عليك

- طيب ما إتصلتيش بيا ليه ؟

- لو كنت عايز تسمع صوتى كنت اتصلت بيا أول ما صحيت , أو ع الأقل كنت رجعت على بيتك

حاولت إدارة دفة الحديث حتى لا أدخل فى حديث نسائى لاينتهى :

- طيب انتى مش هتيجى ولا ايه ؟

أجابت نهلة فى خباثة :

- وحشتك بعد الشر؟

أجبتها بمجاملة :

- أكيد وحشتينى

ظهرت السعادة فى نبرة صوتها :

- دقائق وهكون عندك , أنا أصلاً قاعدة في كافيه جنب البيت بس
قولت مش هطلع إلا لما تتصل بيا واحس انك عايز تشوفنى

ضحكت لأفعالها الطفولية :

- طيب اطلعى بلاش لعب عيال

- حاضر سلام

- سلام

عدت مره اخرى لهواجسي , هذه المرة اقتصت بها نهلة , لا أعلم ما
الذى دفعنى للاتصال بها , هل حقًا ما يقال أن الحب يأتى مع العشرة ,
وحتى إن كان هذا فأنا لا أسمح لهذا الحب بالإنشار وكأنى أقتل طفلاً
بريئاً أو نبتة صغيرة تجاهد لترى النور , لماذا دائماً ألقى عليها لوم
زواجنا , فأنا من تقدم لها وطلب منها الإرتباط , فلاذنب لها في زواج
حبيبتى السابقة ولا في ارتباطنا , دائماً ألقى اللوم عليها وأنى لم أجد
فيها الزوجة التى تمنيتها , ولكن ماذا فعلت أنا لها ؟

كنت أنسى أى ذكرى حلوة بيننا , أنسى أى تاريخ يجمعنا , على مدار
زواج اقترب من العامين لم أتذكر مرة واحدة عيد ميلادها أو عيد
زواجنا , وحتى قبل مرضى كنت منهمكاً فى عملى لا أرى غيره

لماذا حكمت على زوجتى انها ليست الزوجة المناسبة وأنا حتى لم
أعطاها حق تقييمى

هل أعطيتها حقها في الحب ؟

كنت زوجًا صالحًا؟

هل وجدت في ذلك الحبيب ذو الجواد الأبيض ؟

تبأ لي ولحياتي اللعينة التي لم تُسعد أحدًا يومًا، لماذا لم أرحل أنا وبقي هشام يحتضن زوجته ويرعى ابنه المكلوم

هل اخطأني القدر وأخذ أخي ؟

في خضم تفكيري حضرت نهلة وهي تحضر بوكيه ورد آخر وابتسامة لامعة لكن بدا عليها علامات الإرهاق , وضعت البوكيه بجواري على السرير وجلست في الكرسي المقابل لي :

- عامل ايه النهارده يا حبيبي

قبّلت يدها في امتنان :

- أنا بخير يا حبيبي , اسف انى تاعبك معايا

وجدت في عينها نظرة حانية فاحتضنت راسي في صدرها وقبّلت جبتي:

- أنا مستعده أتعب العمر كله واشوف في عيونك النظرة دي

قبّلت يدها مرة أخرى :

- لسه زعلانه ؟

- من ايه ؟

- انتى عارفه ؟

- كنت أتمنى تخرج من المستشفى على البيت وتبات فى حضنى , يمكن وقتها هحس بقيمة وجودى فى حياتك

- بس انتى أغلى حاجة عندى يا نهلة

ابتسمت فى حزن :

- ببيان عليك لما تكذب

- بس أنا ما بكديش

- يبقى بتجامل

- وليه بتقولى كدا

- الحب يعنى حياة , يعنى عالم مش شايف ملامحه من غير حبيبك , يعنى ايد تطبطب عليك وقت وجعك , يعنى حضن ترمى فيه همومك , يعنى أول حد تفكر فيها وانت فرحان , يعنى دمعة مكسوفة تنزل قدام حبيبك , يعنى دنيا اخترتها وعمر تتمنى تعيشه علشان تشوفه فى كل لحظة , يعنى حياة ما فيهاش كذب , ما فيهاش خيانة , ما فيهاش حد بيتألم , يعنى توهب حبيبك عمرك كله بس ,, بإشارة من إيدته,, انت شايف فيا كده يا شريف ؟

- أنا عارف انى مقصر وعارف انى يمكن ما كنتش الحبيب ولا الزوج
الى إتمنيته بس ..

وضعت نهلة يدها على فمى :

- انت الإنسان اللى اتمنيت أرتبط بيه واعيش عمرى معاه واكبر
واعجز أنا وهو بس مش أنا الست اللى انت اتمنيته
حاولت إخفاء كذبى الفاضح :

- لأ يا نهلة , يمكن ما إتجوزناش عن حب بس دا مش معناه إنى ما
بحبكيش

ابتسمت نهلة وهى تضع قبلة على جبتي :

- كفاية عليا انى بحبك

أخرجت بعض الأوراق من شنطتها :

- أنا جبت نتائج العينة بس لسه هوديهما بكره للدكتور .

- طيب ما ينفعش نوديهما دلوقتى

- اهدى يا شريف كله هيبقى تمام ومش هيطلع فيها حاجة إن شاء الله
وبعدين أنا فعلاً اتصلت على الدكتور بس لقيت تليفونه مغلق

أومأت برأسى تفهيمًا وأنا أقص لها ما حدث :

- على فكرة " على " كان هنا النهارده

تسائلت في فضول :

-وسألته ع الشغل؟؟

-ايوه وقالى حاجة غريبة

- قالك ايه ؟

- قالى انك مصممة على شركة أدويه نستورد منها و احنا أصلاً عمرنا
ما إتعاملنا معاها ولا عندنا معلومات كافية عنها وهو مش عارف سبب
إصرارك ايه , وأنا قولتله انى هتكلم معاكى واعرف منك أسبابك
وبعدين أقرر هنتعامل مع مين

ابتسمت نهلة في سخرية :

- طيب طالما هو مستغرب أوى كدا مقالکش انه كان عاوز ياخذ
Commission من شركة الأدوية اللى هو نفسه اقترحها في اخر
اجتماع

رددت بتعجب :

-عمولة؟؟

-ايوه يا شريف , دا اللى عرفته من كام يوم انه كان عاوز نكمل شغلنا
مع الشركة اللى هو اقترحها لأنه بياخذ منها عموله 10 % من الفلوس

الى احنا بندفعالها واللى اكتشفته بعد كدا إن الأدوية دى نسبة المادة الفعالة فيها أقل من الطبيعى وعلشان كدا البيه المحترم عاوزنا نتعامل معاها , بس أنا عرفت شركة محترمة كان بيتعامل معاها ناس أصحاب بابا الله يرحمه واقترحها لصاحبك وهو رفض

- بس انتى ما قولتليش قبل كدا ان والدك ليه علاقة بالأدوية أصلاً

- انت عارف ان بابا كان موظف كبير وكان يعرف ناس مهمة وليه علاقات مش لازم يبقى صيدلى علشان يعرف شركات أدوية

ضربت قبضتى بيدى من الغضب :

- أنا هتصرف معاها ورحمة أبويا لا أريه

- أنا حاولت امنعه انه ياخذ أى إجراء فى فترة غيابك لحد ما تخف وتمسك انت الموضوع وعمومًا طالما انت واجهته فهو ه يخاف يعمل حاجة .

ثم نظرت إلى النافذة واستطردت:

- من يوم ما إتجوزنا وانت ما بتثقش فيا ومسلم رقبتهك ل على , وانت عارف انه بيسرقك بس أهو أحسن منى عندك وخلص , مع انى عمري ما عملتلك حاجة وحشة ولا شفت منى تصرف بيدل على تفكيرك ده

عدت بظهرى للوراء وأغمضت عيني لا أعرف ماذا أفعل ..

- شكلك تعبان , أنا اسفة انى ضايقتك والله ماقصدى وكنت عايزه
أبعدك عن القرف دا كله بس انت اللى واجهته وكنت عايز تعرف
الحقيقة

قالتها وهى تقترب نحوى وتقبل جبتهى

- أنا هسيبك ترتاح واجيلك بكره بعد الشغل , مش عايز حاجة
أعملها لك ولا أجيبها لك معايا

ابتسمت فى هدوء :

- لا يا حبيبى شكرًا

أمسكت بيدها قبل أن تبتعد وقبَّلَها هامسًا :

- سامحيني

ربتت على يدي

- ما أقدرش أعمل غير كده

انصرفت وعدت أنا برغبتي للنوم مجددًا فهى الشئ الوحيد الصادق
حاليًا ..

هشام

هشام

ركضت نحوه أستوقفه , وللمرة الأولى لم يسمعني ولم يلتفت لوجودي , واستمر في حديثه مع شخص اخر لا أرى وجهه ..

كان هشام يقف في غرفة تشبه مكتب والدي رحمه الله , يبدو عليه الغضب والعصبية , نبرة صوته توحى بالتوعد لشخص ما , لم أستطع تمييز كلامهم بدقة ولكني سمعت بضع كلمات مما قالها :

- وهنعمل ايه ؟

- ايه اللي عرفنا انها مش هتطلب تاني

- لازم ما نطاوعهاش احنا ما نضمنش تفكيرها هيودها لحد فين

- يبقى ننفذ اتفاننا

هشام أنا شريف انت مش بتبصلي ليه , سألته وأنا أقرب لأجذبه من ملابسه ولكني وجدت يدي وكأنها من هواء , وكأنني شبح يقف بجانب أخي وضيغه اللذان يتحدثان..

نظرت لنفسي في المرآة المجاورة ولكني لم أراني ..

هلعت أتحسس وجهي , أنفي , فمي , عيني , جبتي , شعري , يدي ..

أشعر بهم لكني لا أراهم ..

هرعت لباب الغرفة أفتحه رعبًا وهربًا..

وجدتني داخل منزلي وأنا هناك أسير في اتجاه غرفتي , ذهبت خلف
شبحي أرى مايفعل , وجدتني أجلس على مقعد وأمامي طاولة عليها
طبق مغطى وكأنه طبق شهى يخاف طاهيه أن يبرد فغطاه ..

وأنا جالس ممسك بالمعلقة في يدي وببدي الأخرى أزيح الغطاء ..

دود؟؟!!!

الطبق يملأه الدود والحشرات , كتلة سودا كأنها وسخ , وأنا أمد يدي
لأتناوله ..

شعرت بمغص , ألم , تقزز ..

أتمنى أن أمنع نفسي ولا أستطيع , تسمرت في مكاني , أرى عذابى ولكن
لا أستطيع منعه , استسلمت وخارت قواى ...

هويت من الأعلى لأسقط متيقظًا , مغص رهيب , هبوط تام , ألم
شديد

كانت حالتي عندما استيقظت من نومى أعانى وكاننى أكلت بالفعل
ماكان أمامى من سموم متحركة مقززة , أمقتُ نفسي كلما تذكرتها
وأفضّل الإنتحار ولا أتذكر نفسي أكلها مرة أخرى ..

قفزت من سريري على مغصة قوية ورغبة في القىء ..

هرعت للحمام أفرغت مافي بطنى وجسدى كله يئن , لا أدرى هل الألم
جسدى أم نفسى ولكنى أتألم ..

ذهبت للمطبخ وأعددت بعض النعناع لعلى أهدئ من صرخات بطنى
المتأججة ..

تناولت مشروبى وأصبحت أفضل وحاولت أن أتناسى ما رأيته ..
وقفت فى الشرفة أستنشق بعض الهواء النقى لعله يغسل ما بى من
قدارة حتى وإن كان حلمًا ..

- انت صحيت يا حبيبي

انتزعتنى أمى من أفكارى وأحمد الله انها انتزعتنى

- ايوه يا ماما صباح الخير

- صباح النور يا حبيبي عامل ايه دلوقتي

- أحسن الحمد لله

- وايه اللى مصحيك بدرى كده

- هروح الشركة

- الشركة ؟

- ايوه بقالى كثير مش مركز فيها ولازم اروح اشوف الشغل

- يا ابني دا انت خارج من المستشفى بقالك يومين بس واهو " على " ممشى الشغل لحد ماتبقى كويس

- على ؟؟ قلتها وأنا أشيخ بنظري عنها محاولاً ألا أبدى غضبي , ما تلقيش يا ماما أنا كويس بس لو سمحتي اعميلي كوابية شاي على ما ألبس

- طيب والفتار؟

تذكرت حلمي وأوشكت أن أتقيأ مرة خرى ولكني حاولت التناسي ..

- هفطر في الشركة مع على

- ماشى يا حبيبي على راحتك

- على فكره يا ماما أنا هرجع بيتي بعد الشغل

ابتسمت أمي في فرحة :

- بالسلامة يا ابني ربنا يريح قلبك ويهدي سرك

قالتا وهي تخرج من الغرفة لتعد لي الشاي وشرعت أنا في ارتداء ملابسى , استعداداً لمعركتي القادمة ..

ASH Medication

شركة والدى رحمه الله , أسسها بالمجهود الذاتى , صيدلى محترم تخرج من الجامعة وبداخله طموح كبير فى امتلاك إحدى الشركات المحترمة التى تنفع الناس بدلاً من تلك التى تتاجر بالأمهم ..

نصف ساعة وأصبحتُ فى مكتبى , أتذكر دخولى له لأول مرة بعد وفاة هشام رحمه الله , كنت أعتمد عليه فى كل شىء حتى اننى بعد وفاته وجدت نفسى لا أستطيع عمل أى شىء وحدى , عرض على والدى التعيين بعد التخرج مثلما فعل مع على لكنى رفضت مدعيًا استكمال الماجستير , ظاهريًا كان هذا مقنعًا ولكن داخليًا كان مجرد هروب من العمل مع والدى , كما فعلت من قبل ورفضت دخول كلية الصيدلة حتى لا أكون نموذج ثالث لأبى وأخى , اخترت الدراسة بكلية التجارة حتى أبتعد تمامًا عن مجال والدى ولكن يشاء القدر أن يذهبوا جميعًا ولم يتبق غيرى لإدارة تلك الشركة, مهزلة قدرية تُكتب حلقاتها يوميًا .. طرق على باب الغرفة أخرجنى من بحر ذكرياتى ..

- ادخل يا على

- صباح الخير , ازيك يا شريف , حمدلله على السلامة , والله كنت جايلك النهارده عند ماما واتفاجأت لما قالولى انك هنا قالها وهو يمد يده لى بالمصافحة ..

ترددت لحظات وصافحته حتى لاحظ ترددي ونظرتي الغاضبة ..

- مالك يا شريف ؟ قالها على وهو يجلس على المقعد المقابل لي

- قولي ايه حكاية شركة medi international دي ؟

اضطرب على وهو يجيب :

- دي شركة اتعاملنا معاها مرتين تقريبًا ولقينا أدويتها أسعارها كويسة
والمادة الفعالة فيها مضبوطة وعملنا عليها كام اختبار وطلعت perfect

- وشركة hello medical ؟

- دي الشركة اللي اقترحتمها نهلة مراتك والأدوية بتاعتها سيئة جدًا
والمادة الفعالة فيها أقل من المطلوب وبأسعار أعلى من العادي

- طيب وال commission

سألته وأنا أنظر في عينه مباشرة وهو يجلس أمامي مدعيًا الجهل..

- Commission ايه ؟

- العموله اللي بتأخذها من شركة MEDi

نهض على من مقعده مدعيًا الدهشه :

- عمولة ايه يا شريف انت اتجننت , من إمتي واحنا بناخد عمولة من

الشركات سواء في مناقصة ولا توريد , وعمولة علشان ايه ؟

أجبت ببيروود:

- علشان تضرينا على قفانا وتخلينا نوافق على تجديد تعاقدنا معاهم

- وأنا من امتى وأنا ببيع نفسي يا شريف

نهضت أنا الآخر حتى أصبحت كالأسد الذى بهم باقتناص فريسته :

- من يوم ما اكتشفنا الغلطات الحسابية يا صاحب اليد البيضاء

وقولنا خلاص عديها أصله كان مزنوق حبتين, لقيت نفسك خلاص

اتكشفت قولت تسلك أمورك من حته تانيه

- انت فعلاً اتجننت , قالها على وهو يضرب بكفيه على سطح مكتبى

اجبته بنبرة أعلى وأكثر حدة :

- انت اللى اتجننت لما افتكرتني سيبتالك مخضرة وروحت رقدت على

سرير فى مستشفى , وحياة أمك لأدفعك قد اللى خدته مرتين

قلتها وقد انتقل بركانه إلىّ وانفجر فى جسدى كله حتى أننى ضريت

بكفى أشد وأعنف مما فعل على سطح مكتبى وواجهته بعينى التى

كادت أن تحرقه من شدة غيظها..

همّ على بالخروج :

- أنا من النهارده مش قاعدلك فى الشركة دى , وابقى اشرب انت بقى

يا عم شريف ووريتى هتعمل ايه

- فى ستين داهية , أنا اجيب ألف واحد أحسن وأنضف منك مش تربية شوارع

لا أدرى لِمَ قلتها , وَلِمَ خَرَجْتَ تلك الكلمة من فمى , لماذا أصبحت بلا أخلاق هكذا ؟؟

نظر إلى على بتحدٍ :

- كدا خلصت ياعم شريف , الأخوة اللى بيننا والعيش والملح خلاص بخ , وابقى ورينى يا تربية القصور هتشغلها ازاي ؟

قالها على وانصرف وأنا أصبح بغضب :

- هعمل اللى ابويا عمله لوحده من غير الكلاب اللى ديها ما بيتعدلش
لا أدرى ماذا حدث بعدها ولكنى شعرت بحرارة اجتاحت جسدى كله
دفعة واحدة ثم هدوء ...

- وهنعمل ايه ؟

- وايه اللى عرفنا انها مش هتطلب تانى

- لازم ما نطاوعهاش احنا ما نضمئش تفكيرها هيودها لحد فين

- يبقى ننفذ اتفاننا

كلمات اخترقت أذنى جعلتنى أنظر لقائلها ..

هشام مرة أخرى يتحدث مع نفس الشخص في نفس المكان ..

من ذلك الرجل ؟ , ومن تلك المرأة التي يشار إليها في حديثهم؟ , أفكار كثيرة دارت بعقلي بغتة وكأنها تسابق عقارب الساعة , لم أستطع أن أتحدث هذه المرة فقط وقفت أستمع حتى لا أضَيِّع أى كلمة دون أن أسمعها لعلى أجد إجابة ..

- فين الحاجة , قالها الرجل الذى يحدث هشام أخى

- عند أمانى

- وكلمة السر

أخرج هشام من جيبه ورق كُتِبَتْ فيها أرقام أراها بوضوح ..

1.13.1.14.25-

ايه كلمه السر الغريبة دى ؟؟؟ أقولها فى نفسى ولكنى أخشى الكلام حتى لا أقطع حديثهم ..

- يعنى متأكد ؟ سأل الرجل الخفى مرة أخرى

- ما تقلقش هيطهر فى الوقت المناسب

- وأمانى تعرف حاجة ؟

- قولتلك ما تقلقش يا بابا محدش يعرف حاجة غيرى أنا وانتم

بابا ؟. بابا ؟

بدأ وجه الرجل الخفى فى الظهور..

إنه والدى سيف الدين الشورىجى الذى توفى قبل خمس سنوات , كيف لم أستطع تمييز وجهه حين رأيتة أول مرة , وماهذا الشىء الذى يتحدث عنه مع هشام ..

- شريف .. سامعنى يا شريف

- شريف فوق يا شريف

فتحت عيني لأرى من تجراً على اقتحام خلوتى ..

- نهلة ؟؟ ايه اللى جابك دلوقتى؟ , تسائلت وأنا احاول فتح عيني

- جابنى فين يا شريف , اتصلوا بيا من الشركة وقالولى انهم لقوك مغمى عليك فى المكتب ونقلوك المستشفى

- أنا فى المستشفى ؟

- ايوه بقالك ساعة

- حمدلله على سلامتكم يا شريف

- الله يسلمك يادكتور إبراهيم

دكتور إبراهيم هو ذلك الاستشارى الذى يتابع حالتى المستعصية التى كادت أن تُسْقَطَ ماتبقى له من شعر ..

- حصل أيه خَلاكَ يُعْمَى عليك بالشكل ده

- مش فاكر

- مش قولنا نغلى بالننا من صحتنا , واضح انك عملت مجهود زايد أو انفعلت زيادة لدرجة علّت ضغطك وختلك وقعت بالشكل ده

تذكرت على وما حدث فى الشركة وحاولت ألا أنفعل مجددًا ..

- خلىنا فى المهم يادكتور , النتيجة .. نتيجة العينة أخبارها ايه ؟

- والله يا شريف مش عارف أقولك ايه , خلايا مخك سليمة من الجانب النظرى لكن فيه حاجة بتخليها مرة واحدة تنشط أوى وكأنك بتفكر 24 ساعة , مخك مش راضى يقف , مش راضى ينام , وكل ده بيضعف الخلايا المسؤولة عن التركيز والذاكرة والنظر والتوازن وغيرها من وظائف المخ الأساسية

- طيب وإيه السبب ؟؟

- ما أعرفش !!

-يعنى ايه ما تعرفش يا دكتور

قلتها بنبرة عصبية واضحة واستكملت بنبرة أعلى :

- أنا ما بقتش عارف أنام وحتى لونت بحس إني عمال أخبط في الدنيا
والاخرة ما بقتش عارف ارتاح ولا أركز ولا حتى أفكر أى حاجة ,
الصداع ما بيسبنيش , المسكنات ما بقتش تجيب نتيجة , جرّيت كل
حاجة وما نفعتش , أنا لو فضلت كده هتجنن يادكتور إبراهيم هتجنن

- اهدى بس يا شريف وامشى على العلاج وان شاء الله يجيب نتيجة

وصلت عصبيتي لذروتها وكدت أنفجر في وجه طبيبي المسكين الذى لا
يدرئ سبباً لمرضى

- أمشى على ايه؟؟؟ على مهدئات ومنومات زى المجانين لحد ما أتجنن
بجد ولا أبقي مدمن وامشى أهرش في إيدى واحى أبوس إيدك تدينى
الحقنة

- إهدى يا شريف , الأدوية اللي بديها لك بتخلى عقلك يرتاح يبطل تفكير
بدل ماهو شغال ليل نهار وتجنن بجد
دموع ساخنة سقطت رُغماً عنى :

- أنا تعبت يادكتور تعبت نفسى أرتاح بقى , قلتها وأنا أضع يدي على
رأسى أمنع شظايا الانفجار من أن تصيب أحداً بجانبى

- ان شاء الله هتبقى كويس يا شريف صدقتى , قالها دكتور إبراهيم
وهو يتجه نحو الباب ويغلقه خلفه ويذهب

احتضنتى زوجتى نهلة فى محاولة منها لتخفيف ألمى ..

- خلاص يا نهلة أنا ما بقتش انفع لزوج ولا ابن ولا أخ و حتى لو فكرت انى أبقى أب بردو مش هينفع, أنا بقيت جسم من غير لا روح ولا قلب , مجرد مخ شغال من غير وقوف , قطر ماشى على قضبان رافض يقف فى أى محطة لحد ما فى الآخر هيعمل حادثة ويموت كل اللى فيه .

احتضنتى نهلة أكثر وأحسست بحرارة دموعها تقطر على خدى الشاحب الذى نسى ملمس الدمع منذ وفاة أخى ورفيق درى ..

- حتى لو كان جسمك معايا وروحك لأ , بردو هفضل أحبك وأتمناك واشوفك أحسن زوج ف العالم , انت حياتى اللى ما عشتش قبلها ولا هعيش بعدها وانت روحى اللى بتحبك بكل ذرة فيها وانت العالم اللى حلمت أعيشه وانت الحياة اللى حلمت أفضل فيها لحد ما أموت .

كلمات نزلت على قلبى الشقى كتزول قطرة مطر على جوف تشقق من العطش , ياليتنى احتضنتك يوماً وأعطيتك حق سلبه منك شبح انسان

-ربنا يخليكى ليا يا حبيبتي وما يحرمينيش منك أبداً

- طيب يلا قوم بينا بقى الدكتور قال انك كويس وتقدر تروح , قالتها وهى تمسك بيدي وتجدبني للنهوض , مسحت قطرات دموعى الواهنة وابتسمت محاولاً التخفيف عنها

- هنروح فين؟؟

ابتسمت هي الأخرى :

- والله لو حابب أوصلك عند طنط أوك , ولو تحب نقعد في حته ما عنديش مانع

- لأ , أنا عاوز أروح شقتنا

ابتسمت نهلة في فرحة :

- هو ده الكلام يلا بينا

أمسكت يدها وانطلقنا لعشنا المهجور ...

استقللنا السيارة حتى وصلنا لعشنا الجافي الذي بالكاد أتذكر أين مكانه ولا أستطيع تذكر أى لحظة مرت بي وأنا فيه وكأني لأول مرة أدخله أو لعلّي لأول مرة أشعر أنني مقصر في حق زوجتي التي عانت معي كثيرًا , منذ زواجنا وأنا ألقى عليها لومًا لا أعرف ماهو ولكني ألقيه , لعلّي ألومها أنني لم أحبها قبل زواجنا , أو أن زواجنا جاء زواجًا تقليديًا سريعًا حتى أنه كان أسرع من محاولتي التعرف على فتاة جميلة أفضى معها يومان أفتنصهم من الجنة وأعود مرة أخرى لحياتي السمجة أو لعلها أخذتني من محبوبتي الأبدية التي لم أتمنى الحياة إلا معها ..

- اتفضل يا قلبي , شايف البيت فرحان ازاي بوصولك

قالتها نهلة وهى تمسك بيدي وتدخلنى بيتى الذى لا أتذكر ملامحه ليس
ضعف ذاكرة ولكن لقلة عدد أيامى التى أقمتها فيه وكثرة مبيتى عند
أى تارة وأصدقائى تارة أخرى أو التحجج بالعمل والمبيت فى الشركة
التي لا أعرف عنها شيئاً تارات وتارات
ابتسمت لدعايتها الخفيفة :

- أنا هدخل اخذ شاور بسرعة كده واغسل جسمى يمكن أفوق

هممت بالمشى ولكنها ما زالت ممسكة بيدي :

- هتوحشنى

قالتها بنبرة اظهرت ما تُكِنُّهُ بداخلها من رغبة فى إعطائها ولو القليل
من حقها كزوجة , نبره أظهرت ما تُكِنُّهُ لى من حب مغمور داخل طيات
قلب لا يسمح له الطرف الاخر بالخروج , نبره ألقى على كاهلى عبء
إسعادها ولو بالقليل مما تفعله لأجلى ..

أمسكت بيدها وقبَّلَتهَا :

- مش هتأخر , بس اوعى تنامى

غمزت بغنج :

- تفتكر

ضحكت لأول مرة منذ دخلت دوامة أحلامى ..

بعد دقائق خرجت من الحمام بعد أن القيت على جسدى المتهتك
شلالات من المياه الباردة لعلها تطفئ فوران رأسى , وإذا بى أرى ملاكًا
هانمًا ينتظرنى بشغف

ملاكًا ارتدى قميصًا ورديًا أظهر مافيه من مفاتن تجذب عيون الرائي ,
مسكين ذلك الرائي الذى ينظر لهذا الجمال , كيف لم أرها هكذا من
قبل وكيف لم أشعر بها من قبل , هل جرؤت على إهمال ذلك الوجه
الحسن والجسد المفعم بالأنوثة والجمال

نظرت إلى نظرة اجتذاب كأقوى مغناطيس ينظر لقطعة حديد يريد أن
يجذبها إليه

اقتربت منها واحتضنتها وأنا ألعن نفسى مائة مرة على إهمالى لها
وغشاوة عقلى التى سبحت إلى عيى وأغلقتهم غباءًا

- بحبك , قالتها وهى ترمى بنفسها داخل أحضان ملأها الجفاء حتى
نضبت منها الدماء

مررت بيدي على شعرها و جسدها أتحسسها وأعتذر له عما بدر منى
من إهمال

- بحبك , قلتها وأنا أعنيها هذه المرة ولعلها أول مرة

اقتربت بوجهها منى حتى كادت شفطانا تلتحم فى قبلة اعتذار طويلة
أطلب بها الغفران

- ما حنتش ؟

- حنيت

- ما إشتقتش ؟

- اشتقت

- زاير ولا صاحب بيت ؟

- زرت كثير وتهت كثير نفسى استقر بقى

ابتسمت ابتسامة ملائكية وهى تشير برأسها نحو غرفة نومنا الدافئة
فانتقلنا إليها ونهلنا معًا من بحر العشق والهوى

- صباح الخير , قالتها وهى تدغدغ أنفى بشعرها الناعم

ابتسمت وأنا أفتح عيني :

- صباح النور ع البنور

- هههههههه ضحكت وهى تجذب يدي لتحتنى على النهوض

- قوم يلا بلاش كسل عندنا شغل

- لا ما أنا مش رايع الشركة النهارده , أنا رايع لأمانى

- أمانى؟؟ قالتها وهى تستدير لتتنظر لى بعد أن همت بالخروج من
الغرفة

-ايوه أمانى قلتها وأنا أترقب أسئلتها التى ستسقط علىّ كالغيث

- ليه خير؟ قالتها بعصبية تحاول أن تخفيها

- هروح اديها فلوس الشهر , قلتها وأنا أنظر بعينى ف الإتجاه الآخر
وأصنع النهوض من السرير

- ما إنت كنت بتبعتهولها ع البنك اللى شغالة فيه , اشمعنى المرة دى
هتروح

- عاوز أشوف يوسف واتطمئن عليه واشوفهم لو محتاجين حاجة , انتى
ناسية انهم ما كانش ليهم غير هشام أخويا الله يرحمه ولازم أخذ بالى
منهم

- آه , طيب الله يعينك

قالتها وخرجت من الغرفة والشياطين تلعب فى عينها لعبًا , ولا تعلم
أنى أنا الآخر بداخلى شياطين الإنس والجن تتسائل ماهذا الشئ الذى
يخفيه هشام عند أمانى ولا تعلم عنه شيئًا ...

دقائق وكنت فى السياره فى طريقى من مصر الجديدة الى الإسكندرية
حيث انتقلت أمانى بعد وفاة أخى الحبيب..

وصلت البنك وطلبت من أحد العمال إرشادى لمكان مكتب أمانى
وبالفعل وصلت لها , كانت مشغولة بمراجعة الأوراق والحسابات التى
تعمل عليها طوال رحلة عملها فى البنوك ..

- ازيك يا أمانى

- شريف ؟ ايه اللى جابك , قصدى حصل حاجة ؟

قالتها وهى تنظر لى مضطربة وكأننى شبحًا أقف أمامها ..

- ما تقلقيش أنا جاي أتظمن عليك واديكى فلوسك

- أنا اسفة يا شريف بس مش متعودة انك تيجى تدينى الفلوس بنفسك

- طيب انتى لسه قدامك شغل كثير ؟ كنت عاوز أعزمك انتى ويوسف

على الغدا

- بس كدار دقيقتين ألم شوية الورق دول ونروح نتغدى , قالتها

مبتسمة وهى تلملم هذه الأوراق التى لا أعلم لها فائدة

انتظرتها فى الخارج وبعد دقائق حضرت استعدادًا للذهاب :

- ايه كل ده يا أمانى انتى ما أكلتيش بقالك سنة ولا ايه

ضحكت أمانى :

- دلنا بقى يا عم شريف علشان هتحاسب

- يابنتى دا مش ذل بس أنا هسحت قريب بالشكل دا

وجهت حديثى ليوسف :

- شوف يا عم يوسف امك بتستغلى ازاي , طلبالنا سمك مشوى
وجمبرى وكابوريا وسلطات وشوربة سى فود تعطيك جوانح , بدمتك
ينفع الكلام دا

ضحك يوسف هو الآخر وبدأ فى تناول طعامه وسط هدوء ساد
للحظات , هممت ببدء الحديث لعلّى أجد ضالتي ولكنى فى كل مرة
أخشى تلاشى ابتسامه أمانى مرة أخرى إذا تطرقت فى حديثى لهشام و
ممتلكاته وأطالال ذكراه , ولكنى مضطر فلتغفري لى يا أمانى نبشى فى
جمر أحزانك ..

- قوليلى يا أمانى , قلتها وأنا أتصنع الأكل واللعب بالملعقة فى طبق
الشوربة

نظرت لى أمانى باهتمام لاستطراد كلامى

- هو هشام كان عنده خزنة ؟

- خزنة ؟ ما أعرفش والله يا شريف الخزنة دي في الشركة وأنا مليش علاقة بالشركة

- لأ ما أقصدش خزنة الشركة أقصد خزنة في البيت

- لأ طبعًا ما كانش عنده يعني هيشيل فيها ايه , وبعدين انت بتسأل ليه؟

لازلت أتصنع الاكل وهي تنظر لى باهتمام وترقب

- لا ولا حاجة أصل فيه ملف تبع الشركة يعني دايعين عليه ومش لاقينه فقولت يمكن كان عند هشام خزنة في البيت وحاططها فيه واحنا نسينا نفتح الخزنة دي

نظرت لى أمانى بعصبية وغضب :

- طيب ماتقول انك شاك ان هشام كان مخبى فلوس في البيت وأنا خدتها لما مات

- لا والله يا أمانى ما قصدت كده أبدًا , قلتها بفزع من ذلك التفكير الذى توصلت له أمانى

- يبقى فيه حاجة انت مخبها عنى

تمنيت أن أخرج لها ما في قلبى , لطالما كانت أمانى صديقة وأخت ويد حانية على الجميع ولا أشكك فيها لحظة وفي صدق مشاعرها ..

نظرت للطبق مرة أخرى في صمت طويل .. حرب دارت بداخلي هل أخبرها وتشكك في كلامي أم أمتنع وأؤكد شكوكها ..

- فيه ايه يا شريف ؟ انت مخي عليا ايه ؟

نظرت لها باستسلام:

- تعالي نتمشى على البحر شوية

نهضنا من ذلك المطعم الشهي دون أن نمس طعامنا وكاننا وجدنا فيه حشرة تسرى

على الشاطئ تمسينا سويًا أنا وأمانى ويوسف وهي تنتظر منى إجابة مع كل خطوة أخطوها وتنظري في ترقب واضح وتحفز خفي ..

- بقينا ع البحريا شريف مش ناوى تتكلم بقى

وجهت كلامي ليوسف الذى أحضرت له بعض الساندويتشات تعويضًا عن أكله المهذور في المطعم

- يوسف حبيبي روح اقعد على الكرسي اللى قدام البحر ده وكل ساندوتشاتك

أطاع يوسف كلامي وذهب وتركنا نحن يواجه كل منا الآخر

- بصى يا أمانى أنا حاسس ان على قلبى جبل نفسى أهده , نفسى أخرج
الى جوايا لحد بثق فيه , - ونظرت إليها بمودة - زيك يا أمانى انتى
عارفة انى بثق فيكى وطول عمرنا أصحاب

ابتسمت فى هدوء :

- طيب احكىلى فيه ايه

قصصت لها ما كان يعتصر قبلى ويُفَجِّرِ عقلى ويُوهِنِ جسدى , ازحت
من قلبى تلك الصخرة التى كادت تودى به , وأخيرًا ارتحت أو على الأقل
تشاركت همى فانتصف عبئى .

نظرت لى نظرة شك أعرفها جيدًا واختبرتها كثيرًا

- أنا مش عارفه أقولك ايه يا شريف , أنا عارفه انك حاسس ان الكلام
دا حقيقى بس

قطعت كلامها بنظرة غضب

- حاسس؟؟ يعنى ايه حاسس , أنا متأكد ان اللى بحكمهولك دا حصل
حقيقى

- الأحلام والحلق اللى وقع من الممرضة فى العلميات ووجودى فى
العملية كلها ومقابلتى لهشام وكلامى معاه وخناقته مع بابا , كل حاجة
شوفتها حقيقة , أنا متأكد انى شوفتها

اقتربنا من مقعد على الشاطئ مخصص لتلاقي الأحبه ولا يضير تبادل
القُبَل أحيانًا , فجلست أمانى وهى تتردد فى قول شىء حتى وأنى
أحسست بصراع يدور داخلها فهملت بإطفائه

- قولى اللى عاوزه تقولىه أنا سامع

أدارت رأسها تجاهى وهى تنظر للأسفل خشية تلاقى أعيننا :

- الدكتور قال ان النشاط الزايد فى خلايا مخك هيخلك تتخيل
حاجات ما حصلتش وهتحلف انها حصلت بس هي ف الحقيقة خيال
انت حطيتاه فى عقلك وصدقتاه .

هبطت كلمتها على كهبوط حجارة سجّيل على قوم إبرهة فصعقتهم
صعقًا , حتى كاد عقلى المريض أن يتوقف عن العمل ..

نظرت إليها وعيني على متسعها وفمى تدلى وأنفاسى تقطعت وكأننى
أحتضر ..

- يعنى ايه ؟ , يعنى أنا اللى حطيت ف دماغى كل الوسواس دى ,
العملية كانت خيال فى دماغى , كلام هشام وابويا كان خيال , إحساسى
بروحى وهى بتفارق جسمى بردو خيال

لوانتى ودكاترة العالم كله قالوا كده فأنا مقتنع ان اللى شفته حقيقة
, علا صوتى وخرجت أعصابى عن السيطرة حتى كادت عروقى تنفر من

جسدى , فاضطرت أمانى للقيام فى طريقها للعودة إلى منزلها وتركى صريع كلماتها , ولكنى تذكرت شيئاً قاله لى هشام ولم أتذكره إلا الآن ..

- أنا ماشية يا شريف ولما تبقى كويس ابقى كلمنى , قالتها دون أن تنظر لى وتهتم بالذهاب

- ما خانكيش !!!!

قلتها وأنا أتعمد اهتزاز كيانى مبرح سوف تتعرض له أمانى ولكن لا مفر كى تصدقنى

التفتت لى أمانى كمن لدغه عقرب :

- انت بتقول ايه ؟

اقتربت منها :

- بقولك ما خانكيش يا أمانى , هشام عمره ما خانك ولا حب غيرك , انتى ظلمتیه

أحدثت كلماتى وقعها الذى تمنيت وجلست أمانى على المقعد كبرج اهتزت أركانه حتى تكسرت قواعده وملاً جسده الوهن ..

نظرت لى أمانى بضعف وحزن وانكسار وفتح ودقات قلب كاد يخرج من تجويفه لا يصدق ما سمع ..

- انت عرفت الكلام ده منين , الموضوع ده محدش يعرفه غيرى أنا وهشام

جلست جوارها لاستكمال إلقاء قذائف المتوهجة :

- عرفته من هشام يا أمانى , تحى أقولك اللى حصل قبل ما يموت

واستطردت سريعاً ألقى باقى ما عندى قبل أن تفيق من صدمتها

- واحده اتصلت بيكى فى يوم بالليل كان فيه هشام فى الشركة , قالتك الحقى جوزك بيخونك مع سكرتيرته , طلعتى جرى تمسكيه مُتَلَبِّس , روحتى له الشركة لقيتيه فى مكتبه وقافل عليه الباب هو والسكرتيرة فتحتى الباب وقبل ما ينطق بكلمة اهتمت به بالخيانة , هشام ما بقاش عارف يعمل ايه ولا يقول ايه , حاول يفهمك ان المناقصات اللى كان داخلها دى حساسة وعلشان كده فضّل يناقشها بالليل وانه كان قاعد مستنى المدير التنفيذى للشركة وما أخذش باله من الباب إذا كان مفتوح ولا مقفول, ما إديتموش فرصة يكمل كلامه , قولتى كل اللى عندك وحكتيله ع المكالمة اللى جاتلك وطلبتى الطلاق وطلعتى تجرى , طلع يجرى وراى خبطته العربية , مات , مات يا أمانى وانتى فاكراه خاين

- مات وفضل يتعذب نفسه يعرفك انه ما خانش

- سيبتى بيتك و حياتك كلها علشان تمحى ذكراه , تمحى ذكرى واحد عاش ومات بيحبك يا أمانى

هَبَّت واقفة وأمسكت قميصي وعينها تخرج منها شرراً حارق ودموع
تنزل كالسيل المميت ..

- بس اسكت خالص , انت مين قالك على كل ده , انطق

أجبت بتوسل :

- هشام والله العظيم هشام , هشام عاوزك تسامحيه يا أمانى عاوزك
تعرفى الحقيقة , عمره ما خانك وطول عمره بيحبك

صرخت بجزع , أآآآه خرجت من طيات قلب يحترق , انفجرت فى نوبة
بكاء كادت أن توقف قلبها وهبط جسدها على المقعد مرة أخرى وكأنه
لن يقوم ثانية , غطت وجهها بكفيها حتى أنى لعنت نفسى مرة أخرى
على إخبارها ولكن براءة أختى كانت أشد عندى من معركة تصديقى ..

جثوت على ركبتى وأنا أستمحها عذراً وأبتهل إليها أن تسامحنى..

- أنا اسف يا أمانى والله العظيم أسف أرجوكى سامحيني, بس كنت
عاوزك تعرفى قد ايه هشام بيحبك , أنا ...

وضعت يدها على فمى ونظرت إلى بعينين حرقهما البكاء وأدماها
الندم..

- ما تعتذرش , أنا اللى اسفه على شكى فيه واسفه انى ضيعته من
إيدى واسفه إنى عذبتة , ياريتة يرجعلى تانى وأنا أبوس التراب اللى
بيمشى عليه , ياريت ياريت

وانهارت مرة أخرى في بكاء وعويل أشد وأقسى , حتى أنني خفت عليها
أن تلحق به ندمًا وأسفًا ..

- صدقتيني يا أمانى ؟؟

قلتها وأنا ألتمس غفرانًا وتصديقًا ..

نظرت لى نظرة اعتذار متأخر كثيرًا ..

- صدقتك يا شريف

- طيب ساعديني أرجوكي أعرف ايه السروروا أحلامي دى علشان هشام
وابويا يرتاحوا ..

- هساعدك , قوم بينا على الشقة اللى هجرتها من يوم وفاة هشام ,
تعالى ندور فيها يمكن نلاق حاجة , يمكن نرجعها روحها اللى ماتت مع
موت صاحبها , ويمكن الاقى شوية ذكريات لسه ما غطاهاش تراب
الأيام .

جذبت يوسف من يده وأخرجته من انهماكه فى عمل قصور بالرمل ,
ليتنى مكانك يا يوسف لما خرجت من طفولتى أبدًا

3 ساعات

مروا ازاي ما أعرفش

محدث بيكلم التانى كل واحد سرحان فى عالمه الخاص , بيتخانق مع نفسه , بيأنب نفسه , بيفتكر حاجات , بيحاول ينسى حاجات , تفاصيل كثير وأحداث كثير مرت على عقلى قبل ما نوصل البيت ..

عمارة من العمارات الجديدة فى التجمع الخامس , هشام كان واخد فيها شقة دفع فلوسها من شغله وتعبه ورفض ان حد يساعده فيها كان ناوى يعيش عمره كله مع حبيبته لكن للأسف عاش فيها كام سنة يتعدوا ع الصوابع وسابها , معرفش ده قدر ولا دا عقاب ولا دى دنيا دنيئة بتستخسر فينا الفرحة وبتعتبرها ذنب لازم تكفيره ..

- يلا يا يوسف انزل

وقف تسلسل أفكارى عندما سمعت صوت أمانى تحت يوسف على النزول من السيارة لنبدء رحلتنا الغامضة فى شقة هشام وأمانى التى لا أعرف عن ماذا سوف نبحت ولا من اين سنبدأ وكما يقول الناس " أبحث عن إبره فى كومة قش " ولكن هذا سهل فبتطير كومة القش سأجد الإبره ولكنى الآن أبحث عن قطرة مياه عذبة وسط أعتى البحار..

دخلنا الشقة , التراب يملئ المكان , الستائر كساها الحزن فانغلقت على نفسها رافضة دخول أشعه الشمس , الأثاث مغطى بالأقمشة وكأنى

أصحابه سيهجره بلا رجعة , حتى ضوء المصباح بدا وكأنه مضطرباً
متسائلاً هل كتب له الإضاءة من جديد ..

- معلى البيت كئيب بس انت عارف انى قافلاه من يوم ..

صمتت أمانى لتمنع دمة جاهدت لتسلك طريق النزول , فكملت حتى
لا تتهار ثانية

- آه آه فاهم , لا ولا يهكم احنا هنشوف الى عاوزينه ونمشى على
طول.

3 ساعات أخرى قضيناها في هذا المكان المقفر الذى يبعث الحزن ف
القلوب ولم نجد شيئاً وأصدقكم القول أننا لم نجد شيئاً لأننا لا ندرى
عن ماذا نبحث ولكن لعلنا " نتكعبل " في طرف خيط نساها صاحبه ..

جلسنا وقد أعيانا البحث بلا فائدة , نظرت لى أمانى فى حزن :

- ما بقاش فيه مكان تانى ندور فيه , قَلْبُنَا البيت كله ومفيش نتيجة ,
حاول تركز كدا يمكن تفتكر حاجة تحطنا على أول الطريق

حاولت التذكر , حاولت التركيز , حاولت استدعاء هشام نفسه إن لازم
الأمر ولكن بلا فائدة ..

- مش فاكر أى حاجة أكثر من الى قلبهالك والله ما فاكر

لم أجد بدءًا من إشعال سيجارة كنت قد انتويت هجرها تمامًا ولكن
تداعيات الموقف حثمت ذلك ..

- رجعت للتدخين تانى , تسائلت أمانى فى حزن

- شكلى مش مكتوبلى أبطله

- مفيش حاجة مكتوبه يا شريف , دى حجة عقلنا بيخترعها عشان
يخرج من مصيدة التأنيب

نظرت إلها فى لا مبالاة وأنا أفر دخانى وألقيت لها سهمًا قاتلاً:

- وموت هشام ما كانش مكتوب ؟

نظرت لى فى ثبات أقرُّ بأنه كان أشد من ثبات مياه المحيط خلال دوران
الكرة الأرضية

- الموت يا شريف مكتوب ميعاده من قبل ما نتولد ومع ذلك يمكن
بالدعاء تقدر تغير القضاء وترد الموت نفسه

- وهشام ما دعاش ليه

- انت دعيت انك تخف ؟

شرد ذهنى وأنا أحاول التذكر كم مره تقربت من ربى طالبًا الشفاء
ولكنى لم أتذكر

نظرت لى أمانى مستطردة:

- الحياة دى غريبة , تبقى عارف الحاجة ومش عاوز تعملها وكأنك معتقد ان البلاوى بتصيب غيرك وتخاف منك , وأحياناً بننسى أو بتجيلنا المصيبة قبل ما نمهد لها , فى النهاية كله مكتوب بس ربنا أعطاك حرية الإختيار وانت مُخَيَّر مش مصيّر , تقدر تبعد عن الشر بمزاجك وتقدر تعمل الخير بمزاجك , ولوربنا كان كاتب كل شىء وانت ملكش فيه إرادة ما كانش فُكَّرْنَا بفعل الخير وقال إن الحسنات بتمحى السيئات , وانت تقدر تبطل التدخين دلوقتى لو حبيت , فبلاش نبرر لنفسنا ونرمي أخطائنا على نفس الشماعة اللى اتقطم وسطها من كتر الحمل .

نظرت لها وما زالت السيجارة فى يدي:

- هحاول

- شكرا يا شريف

- على ايه ؟

- انك رجعتلى هشام , حتى لو كانت ذكراه بس اللى رجعت , كفايه انى عرفت انه عمره ما حب غيرى وعمره ما خانى , انت ما تعرفش أنا كنت بتعذب ازاي كل يوم وكل دقيقة من يوم موت هشام , بسأل نفسى فى اليوم ألف مرة , ليه هشام يخونى , وقصه الحب اللى بيننا دى كانت كلها وهم ولا حقيقة .

ثم نظرت لى بابتسامه :

- شكرًا بجد

ربتُ على يدها بابتسامه خفيفه , وعدت لأخاديد عقلى أترجاها التذكر
....

" تليفونك بيرن يا شريف "

" شريف "

انترعتنى أمانى من أفكارى المشوشة حتى أنى لم أنتبه لرنين هاتفى ,
أسكتته ووضعتة فى جيبى مرة أخرى

- رقم غريب سيك منه أنا هقوم امشى

استوقفتنى أمانى :

- تمشى فىن بس يا شريف مش لما نلاقى حاجة الاول

- ما احنا لو قعدنا من هنا للسنة الجاية مش هنلاقى حاجة , أنا أصلاً
مش عارف احنا بندور على ايه , أنا هقوم امشى وانتي تعالى معايا

أحجزلك فى أى فندق تباتوا النهارده وتبقوا ترجعوا اسكندرية بكره

أجابت أمانى بتحدى :

- مش هرجع يا شريف غير لما نلاقى اللى بندور عليه

ابتسمت بتهكم :

- طيب لما تلاقى ابقى رنى عليا أنا ماشى , هتيجى تباتى فى فندق ولا
أسيبك فى بيت الاشباح دا

ابتسمت فى هدوء :

- لأ هروح فندق لحد ما أنضف البيت وبعدين دا مش بيت أشباح دا
بيت عاش فيه قصة حب عمرك ما هتشوفها يا فرفور بس اهو
النصيب بقى

- طيب يلا يا رومانسية هاتى الواد وخلصينا

رن هاتفى مرة أخرى ولكنى تجاهلته كالعادة واستقللنا السيارة لأقرب
فندق حتى تستطيع أمانى مبيت ليلتها بهدوء , دخلنا الفندق وحجزنا
غرفة تتسع لكليهما

- أنا همشى أنا بقى مش عايزين حاجة

ابتسمت أمانى وهى تصافحنى :

- لأ يا شريف كتر خيرك , خلى بالك انت بس من نفسك

طمأنتها وأنا أذهب للسيارة استعداد للرجوع إلى البيت حين رن هاتفى
مرة ثالثة ورابعة بنفس ذلك الرقم الذى أصر صاحبه على إزعاجى ,

أدركت محرك السيارة ولوّحت لهم من بعيد وانطلقت وأنا ممسكًا ذلك الهاتف اللوح لأعرف من يريد محادثتي بهذا الإصرار

- ألو مين ؟

- ازيك يا شريف

أوشكت أن أصدم السيارة التي أمامي حين انتهت في آخر لحظة وضغطت فرامل السيارة مصدرًا صوت صرير عالي

- أميرة !!!

لم أنس هذا الصوت يومًا , سنوات مرّت على سماعي له آخر مرة ولكنه حُفر في ذاكرتي بإتقان , أوقفت السيارة في أحد جوانب الطريق وأوقفت معها نبضات قلبي حتى لا تلهيني عن سماع صوتها

- ازيك يا أميرة

أتانى صوتها الهادئ :

- لسه فاكر صوتي

- لونسيت صوتك هفتكرايه

ضحكت بعذوبة :

- لسه كلامك حلوزى مانت

- انتى أحلى بكتير

لم أشعر بنفسى إلا وأنا أحادثها كما كنت سابقًا , لكنى تذكرت انها الآن سيدة متزوجة ولم يعد لى حق فيها , فأثرت الصمت حتى لا تفضحنى نبراتى

- انت عامل ايه دلوقتى يا شريف

شعرت بريبة من سؤالها :

- كويس الحمد لله

- طبعًا انت مستغرب مكالمتى

أردت إخبارها أنى أنتظر هذه المكالمة منذ سنوات ولكنى أسررتها فى نفسى كغيرها

- بصراحة مستغرب

- إيهاب اتصل بيا وقالى انك تعبان ما حستش بنفسى إلا وأنا بتصل بيك وزى ما توقعت لقيتك ما غيرتش رقمك

كم يقتلى الحنين إليها , كم أشتاق لضمها , لتنفس عبيرها , لا تعلم كم من الأيام انتظرتها , رفضت حتى تغيير رقمى فى انتظار حديثها , بحثت عنها فى أماكن لقائنا القديمة لعلّى ألقاها صدفة , بحثت عن ذكراها داخلى كى أحيا بها

- شريف ؟ انت مش بترد عليا ليه

تلجلجت حين استدركت عدم ردى واكتفائي بسماع صوتها :

- معلش يا أميرة كنت بعمل حاجة بس

أتانى صوتها حزينًا:

- أنا اسفه لو كنت اتصلت فى وقت مش مناسب

أجبتها مذعورًا :

- لالالا خالص انتى تتصلى فى أى وقت

ضحكت بعدوبة :

- ربنا يخليك

كانت فى الأمس القريب " ربنا يخليك ليا " لكن اليوم أصبحت بلا معنى

- يعنى انتى اتصلتى بس علشان إيهاب قالك انى تعبان

لم تجب ولم أنتظر إجابته فأنا أعلم أنه لا يوجد أى داعى لاتصالها غير شعورها بالذنب فحاولت الثأر لنفسى ولبقايا عزتى .

- عمومًا ما تقلقيش عليا أنا كويس جدًا كانوا شوية صداع تاعينتى
بقالهم فترة والدكتور اقترح عليا أعمل تحاليل والحمد لله طلع مفيش

- دا شريف ابنك ... صح؟

تغيرت نبراتها إلى الإندهاش :

- انت عرفت ازاي , وعرفت ازاي ان اسمه شريف

ضحكت قائلاً :

- شوفتها في كل الأفلام العربي والمدبلجة

أكملت أنا حتى لا أسمع صوتها مجددًا فيلين قلبي وألعن نفسي :

- عمومًا يا أميرة أنا متشكر جدًا ع المكالمة الجميلة دي وهسيبك بقى

تشوفي ابنك لو عايز يغير البامبرز ويمكن كمان جوزك جاى من

الشغل جعان ويلاقيكى بتكلمينى يعمل معاكى مشكلة

- اوك يا شريف و ابقى طمنى عليك

- ان شاء الله , سلام

- سلام

أنهيت محادثتى التى انتظرتها بترقب وتألم وكأنها الخلاص , أفنيت

سنوات من حياتى أنتظر أن أراها مجددًا أو أسمع صوتها فتُعيدُ لى

الحياة , ظننت أنها هى من كانت تعطى قلبى خفقانه , ظننت أنها أكمل

نساء العالمين والباقي جوارى قصرها المكنون , لكنى الآن أشعر بلاشئ

, لا شيء مما سبق حقيقة , فهي كباقي النساء , صوتها جسدها قلبها كل
ما فيها ليس أكثر من أى أنثى ليس أكثر من نهلة

أتمنى الآن أن أعود للوراء حتى أمحو أيامًا وشهورًا وأعوامًا مرت هباءً ,
مرت بمرارة الإنتظار وتقرُّح القلب , لكن من اليوم أستطيع أن أصحح
ما أخطأت فيه , أميرة الآن زوجة وأم وملكية رجل اخر شاطرها
أحلامها وحياتها وعمرها وقلبي وحتى مرقدتها ولم تعد تلك الفتاة
صاحبة النصف الثانى فى قصة حى الفانية , أما أنا فلدى الآن حياة
جديدة وقلب جديد يعشقتى وأعشقه .

الساعة 11 مساءً ..

فى طريقى لمنزلى وزوجتى المنتظرة ..

فكرت أن أفاجئها اليوم ونتناول عشاءنا فى أحد تلك المطاعم المشهورة
ذات الطاولات المزينة بالشموع , والأكل الشيك الغير مُشبع تمامًا و
الجرسون المهذب الذى لا يلقى الأطباق فى وجهك إن تزمريت , ولعلها
ساعات ممتعة أقضيها مع زوجتى وأستشعر كوني زوجًا صالحًا " كما
قال الكتاب " .

اتصلت بنهلة وأخبرتها أن تستعد حتى أتى وأصطحبها للمطعم , كان قد
تبقى حوالى نصف ساعة حتى أصل منزلى وسط زحام الطريق وأفعاله
الشنعاء , وأعلم أنى سأقف من ثلاث إلى خمس ساعات إضافيه حتى

تنتهى زوجتى من وضع بعض الرتوش البسيطة التى فى معجم كافة النساء " ما بتاخدش غير خمس دقائق " ولكننى بما أنى قد انتويت أن أكون زوجًا صالحًا فلن أعترض ولن " أمد بوزى " .

- قمر

خرجت من فمى لا إرادياً عندما رأيتهما , ارتدت فستاناً زهرياً ك لون السماء الصافية فى ليلها القمري , رُصِعت أركانه ببعض الكريستالات التى أضفت عليها بريقاً يخطف الأبصار , وخذاءً فضى كلما خطت به تناغمت صوت دقاته مع دقات قلبى المسكين , كيان أنثوى يُعْمى العقول والأبصار

ابتسمت فى خجل :

- شكلى حلو

- حلو؟ دا أنتى احلى من محاسن الحلويات نفسها

ضحكت بدلال أنثوى وهى تضع يدها فى خصرها :

- طيب مش هتفتح لى باب العربية زى الأفلام بقى ولا ايه

تذكّرت أننى ما زلت أقف أنا وهى أمام البيت ففتحت لها الباب
منحنياً:

- اتفضللى يا برنسيسة

صعدت بقدمها الرقيق و صعدت أنا الآخر وبدأت رحلتنا الرومانسية :

- شريف

- عيون شريف

- بتحبنى

- جدًا جدًا

- أول مرة تطلع منك بالسرعة دى

- علشان أول مره أحس انى عندى قلب بيحب

- طيب وقبل كده

- صدقينى عمرى ماكرهتك أو حبيت واحده عليكى , الفكرة كلها إنى ما

كنتش حاسس بيكى زى دلوقتى

- وايه اللى خلاك تحس بيا

- يمكن فتّحت , ويمكن بدأت أحاسب نفسى , ويمكن ادبت نفسى

فرصة أحب

- يعنى ايه ؟

- يعنى بصراحة كده فكرت فى حياتنا وقد ايه كان فيها فتور وتقصير

من ناحيتى وبدأت أحاسب نفسى بدل ما أحاسب غيرى , وقتها حسيت

- تحي تاخدى ايه ؟

- امممممم هاخذ اسكالوب , وانت ؟

- امممممم أنا قولتلك قبل كدا انى مبحبش الإسكالوب

- لا والله مقولتليش

- يبقى هاخذ اسكالوب

ضحكت نهلة :

- طالما مبتحبوش هتاكله ليه

- علشان بحبك انتى وما ينفعش أحب عليكى حاجة تانية

الجارسون بإحراج :

- إحم إحم

ضحكت نهلة وأمالت رأسها للأسفل بينما ضحكت أنا متداركًا الموقف:

- خلاص يا عم انت داخل المراحيض ضيَّعت علينا الكلمتين الله

يسامحك , هات يا عم اتنين اسكالوب ولى السكر بره الله يباركك

ابتسم الجارسون وانصرف وعدت أنا لحوريتى الجميلة :

- بحبك

- أخيرًا

- كان نفسي أقولها لك من زمان , بس كنت مستنى أحسها زى دلوقتي

- انت ما تعرفش أنا كمان دلوقتي بحبك قد ايه

- أسف لو في يوم وجعتك

سقطت دمعة على خدها الرقيق :

- أنا اللي اسفه , اسفه أوى

- اسفه على ايه ؟

- اسفه على أى حاجة وكل حاجة

- حاسس انك مخبية عنى حاجة

- هخبي عنك ايه

- مش عارف بس حاسس

نظرت نهلة إلىّ فى حب :

- انت ليه بقيت كده

- علشان حبيتك

- وليه ما كنتش كده

- علشان ما كنتش حبيتك

-وليه ما عملتش من بدرى كده

- علشان غي , عطشان وقدامى كوياية ميه ساقعة سيبتها وروح
رميت نفسى فى بحر ناشف

- ياريتك مديت ايدك من بدرى

- كان هيحصل ايه

- كنت أنا وانت شبعنا

- اقتربت منها أكثر وأنا أهمس :

- ملحوقه , مستعد أمد إيدى دلوقتى

- ضحكت نهلة وهى تمسح دموعها وردت هامسة :

- وأنا هرفع عليك قضية تحرش بالأنثى

- عدت بظهرى للوراء :

- وهى فين الأنثى دى

- أمسكت نهلة بقميصى :

- نعم يا خويا

- خلاص خلاص احنا اسفين يا صلاح

اقتريت منها أكثر هامسًا وأنا أنظر لها بلهفة :

- ياباشا دا إنت الأنوثة كلها , بس لما نروح البيت وأنا أشرحك وجهة نظري مُفصَّلة

ضحكت نهلة رغم دموعها التي لا تتوقف , واستطردت أنا :

- صحيح يا نهلة انتي ما حكيتيليش أبدًا عن حياتك قبل جوازنا , أو أنا الى ما كنتش بسألك , أنا دلوقتي بقى يا ستى عاوز اسمع منك كل حاجة

أجابت نهلة كمن لا يتوقع سؤالى :

- أنا كنت عايشه مع ماما برا مصر وكنت بشتغل فى شركة بابا , شركة استثمار عقارى , ولما ماما اتوفت بابا اتجوز وأنا طلبت منه إنى أنزل مصر وابدأ حياتى هنا لإنى مش عايزه أكمل برا , نزلت واشتغلت فى البورصة الى أنا فيها دلوقتي وشُفَّتْكَ فى فرح إبراهيم صاحبك , بصراحة شدتتى من أول نظرة وفرحت لما لقيت طنط خالتك بتفاتحنى فى موضوع الإرتباط , بس ياسيدى واتخطبنا شهرين واتجوزنا , تحب تعرف ايه تانى؟

ابتسمت :

- لا كده تمام , مع إنه كلام قليل أوى بس أولك

- وانت يا شريف عارف تدير شركة والدك ازاي مع إنها تخصص في غير مجالك خالص

نظرت لها بشرود :

- والله يا نهلة أنا دخلت تجارة مخصوص علشان ما أشتغلش في الشركة دي بالذات لكن النصيب بقى خلى الدنيا تلف وابقى أنا المسئول الوحيد عن شركة أبويا بعد وفاته ووفاة هشام , ما بقاش ينفع أغسل إيدى لأنها الحلم اللى أبويا عاش عمره كله يبني فيه واللى أخويا كملته بتعبه وعمره وأنا مضطر أحب الشغل فيه غصب عني , فأنا بديرها على قد ما أعرف مؤقتًا وفيه ناس قديمة بتساعدنى وبالنسبة للأدوية نفسها احنا لينا معامل بتحللها وبتطلع لى اللى ينفع منها وبتتعامل معايا ببساطة من غير تعقيد ولا مصطلحات مكلكعة لأنهم عارفين ان معلوماتى الطبية قليلة ومعايا دكاتره أصحاب بابا كمان بيساعدونى واهى ماشية .

استطردت بحزن :

- لولا ظروف تعبي كنت اتقدمت بالشركة دي وبحياتى معاكى لكن يادوب هي ساعات قليلة اللى ببقى مركز فيها والباقي مسجون بين الصداع والنسيان وقلة التركيز

تهتدت بعمق :

- كان نفسى أعوضك بجدي يا نهلة بس يادوب بحاول على قد ما أقدر

سقطت تلك الدموع مرة أخرى قبل أن أستطرد محاولاً تغيير دفة
الحديث :

- يووووه نسيت اخذ العلاج , ناوليني كوباية الميه اللي جنبك يا نهلة
لو سمحتي

ابتسمت نهلة في حنان وأزاحت كوب الماء :

- النهارده أنا اللي هعالجك , أنا دواك

ابتسمت وأنا أحاول التقاط كوب الماء :

- معلش يا نهلة والله أنا تعبان فعلاً ما يفركيش شوية الكلام اللي
حافظهم من الأفلام دول , أنا كل حتته فيا بتوجعني والله , بحاول ما
أفكرش بس تعبان أوى بجد

أمسكت نهلة يدي وقبّلتها في حب :

- شريف أنا ...

- انتي ايه ؟

انزلت رأسها للأسفل والدموع تتساقط :

- أنا بحبك

في اليوم التالي الساعة الثامنة صباحًا

أيقظني رنات هاتفي المتلاحقة , التقطته من جانبي كُرْهُمَا لكني خشيت
إن حدث مكروه لأحد , وجدتُها أمانى تتصل بلا انقطاع , أُجبت عليها
وأنا مغمض عيني وبصوت نائم

- والله العظيم لو ما بطلتي رن لاحذف رقمك من عندي
ضحكت أمانى :

- قوم يا عم الكسلان عندنا شغل وتدوير ولغز عايزين نحله
تثائبت بكسل :

- وحياه أبوكي لو هتعيشيلي في دور المفتش كرومبو دا يبقى روحى دَوْرِي
مع نفسك , أنا واحد عايز أنام وما بصحاش دلوقتى سلام
- استنى بس يا شريف رايح فين

- يابنتى عايز أنام أنا ما نمتش غير الفجر

- وايه اللى خلاك صاحى لحد الفجر

- أأأأ مش موضوعنا

- طيب قوم بقى لاجيلك واصحّى نهلة وأقولها انى قفشتك في أحضان
بائعة هوى

- تصدق نسيت اسئلك على يوسف , أنا ازای نسيته كل دا
ضحكت أمانى وهيا تشير ناحيه ملاهى اطفال فى الدور الاول من
المطعم :

- نسيته علشان انت تايه ودا الطبيعى بتاعك , الولد تحت بيلعب ياعم
المسطول
- طيب قشطه

عدت بظهرى للوراء لأخذ غفوه اخرى :

- ياشرىيىi

- الله يقطع شريف وسنين شريف , ماتسببى انام بقى ياأمانى

- مقولتليش بقى هنروح لتيسير ولا هنعمل ايه ؟

نظرت لأمانى فى استسلام :

- مفيش قدامى غيرانى أروح لها ومش بعيد بعد كده تلاقينى بلف على
الدجالين والمخاوين وأنا ماسك ديل عرسه متطلقه وقفنا برص جعان
يمكن ألاقى عند حد فهم سبب أو تبرير يقنعنى أو حتى ضحك عليا

- طيب يلا بينا

- يلا بينا فين يا حاجة الدنيا ليلت خلاص هو احنا ناقصين تلبيش ,
خلينا بكره أحسن من أول النهار , روى انتى باتى عند ماما النهارده
واوعى توقعك فى الكلام وتحكيلها أى حاجة , وبكره انزلى وسيبى يوسف
معاه , الواد غلبان مش عاوزه يقطع الخلف

قطبت أمانى حاجبها وأجابت باستنكار :

- انت هتشتغلى يا ابن سيف الدنيا ليلت ازاي يعنى والظهر لسه ما
أذنش حتى

أجبتها ساخرًا وأنا أنهض من مقعدى :

- لالالالا طالما بقى هنجش فى الأباحة وقلة الادب فأنا مضطر انسحب
بهدوء واحتفظ بما تبقى من كرامتى , سامو عليكو

لم اشعر بنفسى إلا ويد باطشة تجتذبنى من ياقة قميصى الخلفية :

- بقولك ايه أنا مش فاضيه للعب العيال ده , روح دَوّر العربية على ما
أجيب يوسف نوديه عند ماما ونطلع على تيسير لحسن أمسمرك فى
الكرسى ده

رفعت يدى مؤديًا تحية العلم :

- تحت أمرك يا كبير ثوانى وتكون العربية جاهزة

انصرفت وسط ضحكات أمانى , أدت محرك السيارة وأحضرت هي يوسف وانطلقنا :

- بقولك ايه هستناكى على آخر الشارع علشان ماما ما تشوفنيش , قوليلها انك لسه جايه من اسكندرية و هتنزلى تشتري حاجات وسيبى يوسف عندها ونطلع على الست اللى بتقولى عليها دى بس على الله يكون عندها حاجة تنفعنا

ردت أمانى بحماسة :

- إن شاء الله , أنا حاسه ان عندها كتير ما أعرفش ليه بس طالما افكرناها فى عز أزمطنا يبقى أكيد دى رساله انها هتفيدنا

استطردت بحزن :

- ياريت .

نظرت ليوسف متبتلاً إياه ألا يخبر أحداً الحقيقة :

- يوسف يا حبيبي

- ايوه يا عمو

- اوعى يا حبيب عمو تقول لتيته أى حاجة من اللى سمعتها ولا تعرفها انكم جيتوا امبارح

ابتسم يوسف

- ما تخافش يا عمو وراك رجالة

قلبت شفتاي وأنا أعيد النظر للطريق :

- طيب ربنا يستر

اتجهنا لتلك السيدة المجهولة وفي عقلى تدور الأفكار وتتزاحم , هل سأجد عندها ما ما أنشده ..

انتظرت أمانى فيما يقرب من الساعتين حتى تعطى يوسف لأمى وتعود

حضرت أمانى مبستمة وكأنها لم تفعل شىء

- لسه بدرى يا أم يوسف

ضحكت أمانى :

- معلىش يا شريف انت عارف مامتك كانت بتطمئن عليا وعلى يوسف وكده

- ماشى هعديها

وصلنا بيتنا القديم , كما هو لم يتغير , باستثناء ذلك الفراغ القاتل والجوانب الخاوية التى أملت به وأضافت عليه فتورًا وكتابة

نظرت لتلك العمارات التي تحاوط بيتنا وكأنها تحاول تعويضه عمًا ففقدته من حب والتحام ودفي وبرغم فشلها لكنها أبت الانسحاب , آثرت البقاء لعل فيها فائدة

تمنى أبي يومًا أن يصبح هذا البيت صرحنا العظيم الذي لا يهوى أبدًا , لكم تمنى أن أتزوج أنا وأخي وننجب أطفالًا رائعين كتلك التي تظهر في إعلانات بامبرز , وتكبر الأطفال لتكون عونًا ومؤنسًا للعجائز, ولكن (كان صرحًا من خيالي فهوى) .

- هو ده بيتها

أشارت أمانى إلى منزل بجانب منزلنا الخاوى ولكنه أحدث منه قليلًا , النوافذ مغلقة , الستائر مغطاة وكأنها تعاقب الشمس على ظهورها اليوم , هيئته لا توحى بأن هناك عقلاء يعيشون فيه .

نظرت إلى أمانى متعجبًا :

- هو فيه بنى آدمين عايشين فى بيت دراكولا ده

ابتسمت أمانى وجذبتنى عنوة للدخول إلى المنزل , وأكّرر " عنوة "

صعدنا درجات سلم منتهية الصلاحية حتى وصلنا للباب وقرعنا الجرس وأنا أتمنى ألا يجيب أحد ولكن خاب رجائى حين سمعت صوتًا أقرب للذكور منه للإناث

- طيب طيب مش قاعده جنب الباب أنا

نظرت لأمانى نظرة مفتش الضرائب حين " يقفش " متهريًا

- ما لقيتيش غير الدردي

وقبل أن ترد أمانى للأسف انفتح الباب وظهرت أمانى دكتورة تيسير
ويشهد الله أنها لا تمس اليسر في شيء

ملامح باردة , نضارة " كعب كوباية " شعر " كنيش " وكأن اينشتاين
بُعِثَ من جديد , أسنان تفارق بعضها , أنف منتفخ , وشفتان غليظتان

- نعم , انتوا مين

ترفَعَتْ أن أرد واكتفيت بالنظر لها باشمئزاز , فأسرعت أمانى بالإجابة
قبل أن تلتهمنا " أمانا الغولة " :

- احنا نعرف حضرتك يا دكتورة بس حضرتك ما تعرفيناش

- وتعرفوني منين ؟

أردفت أمانى مبتسمة :

- كنا ساكنين جنب حضرتك بس أكيد مش هتاخدى بالك مننا

نظرت هذه الدكتورة لأمانى فى نظرة لا مبالاه وقالت بنبرة ضجر :

- آه يعنى عايزين ايه ؟

هنا انفجر غيظى وانفجرت شفتاى وكأنها لا تنصاع لأمرى حين رمقتها
بنظرة عصبية وتحدثت لأول مرة :

- احنا هنقف نحكى ونتعرف ع الباب

رمقتى بنفس النظرة :

- وانت مين بقى أصلاً

تمتمت فى نفسى :

- الله يخرب بيت الزهايمر على بيتك يا بعيدة وانتى شكل أهلك يسد
النفس

ونظرت لها متحدثاً بصوتٍ أعلى تحسباً للصمم الذى يصيب منتهى
الصلاحية أمثالها وبنبرة غضب وعصبية واضحة :

- أنا شريف سيف الدين ابن الدكتور سيف الدين الشوربجى , وكنا
ساكنين جنب سيادتك والحمد لله نقلنا من المنطقة خالص .

كنت متأكد أنها لن تتذكرنى لأنها لا تعرفنى أصلاً وليس لها علاقة بباقي
الجيران وكمثل باقي الساحرات الشريرات ليست معتادة على الحديث
أو التودد لأحد , لكنها نظرت لى كمن يعرفنى أو تذكرنى أو أخيراً وجدنى ,
فَفَتَحَتَ عيناها على متسعها وتهللت ملامحها فجأة ثم ألقنت إلى جملة
كان وقعها أفزع وأعنف وأقسى من سابقاتها بكثير

قالت بصوت هادئ ورتم بطيء :

- شريف سيف الدين

نظرت لها متعجبًا :

- ايه .. تعرفيني ؟

فابتسمت قائلة :

- هشام بلغك رسالته

لم أستطع وصف ما ألم بي وبأمانى من فزع وصدمة حتى أننا تلعثمنا ولم نستطع الكلام جيدًا , فنظرت لها والدهشة تزلزلنى :

- انتى تعرفى هشام منين , ورسالة ايه اللى بتقولى عليها

فابتسمت لأول مرة ابتسامة حانية وتبدلت ملامحها القاسية بأخرى ودودة , ودَعَتْنَا للدخول

- طيب اتفضلوا نتكلم جوا .

دلفنا المنزل بسرعة , منزل قديم أثائه قليل لا يحوى سوى غرفتين ووردهة , أبوابهم مغلقة وستائرهم مسدلة , اركانها متهاككة وألوانه باهتة وكأنه منزل لأحد مهجور تتأفف الطيور أن تعيش فيه , دخلنا ولا نطبق الانتظار , نريد أن نعرف كل ما تخفيه هذه السيدة عنا وكيف لها أن تعرف هشام وتعرف رسائله التى يرسلها لى , كدت أُجَنِّ فى هذه

اللحظات الطويلة المملة , فلم أستطع الانتظار أكثر من ذلك فسألتها بعصبية :

- أدينا دخلنا , ممكن تقوليلنا بقى تعرفى هشام منين

جلست على مقعد وجلسنا أنا وأمانى على أريكة بالية فى طقم صالون عتيق ملأته الأتربة وسكنته الحشرات الدقيقة , ولكنى لم أكن أبالي بشيء إلا بإجابة لما يجول فى خاطرى

فبدأت الدكتورة بالشرح وإخراج مافى جعبتها :

- هشام جالى فى جلساتى أكثر من مرة , بيستنجد , أو يبحاول يوصل رسالة , فى الأول كان كلام مهم مش مفهوم , بس بدأت رسالته توضح بالتدرج , لحد امبارح حلمت بيه بيقولى إسمك وبيقولى انك هتجيبلى وقالى أبلغك رسالة

- رسالة ايه ؟

- قالى أقولك " خلى بالك من اخوك يا شريف "

نظرت إلى أمانى التى لم تكن أقل منى دهشة وتعجب , ثم نظرت إلى تلك الدكتورة مرة أخرى وسألتها متحفزاً :

- جلسات ايه دى اللى بتكلمى عنها؟

- جلسات تحضير الأرواح

هنا فتحت أمانى فمها حتى كدت أرى البلعوم واقشعر بدنى حتى وقف شعره ونطقنا بصوتٍ واحد

- تحضير أرواح ؟

نظرت إلينا الدكتورورة وكأننا نحن غريبي الأطوار وما قالتة لا يستدعى دهشة إطلاقًا

- ايوه تحضير أرواح , عمركم ما سمعتوا عنها ..

نظرت إليها متهمكًا :

- لأ سمعت بالأمانة... سمو , علو , ارتفاع

نظرت لى باستنكار:

على فكره يا أستاذ , تحضير الأرواح ده علم ولو حضرتك ما بتفهمش فيه يبقى ياريت تسيبه لأصحابه اللى بيفهموا فيه , أو على الأقل تحترم كلامى مش تتريق عليه

حاولت أمانى تهدئة الوضع فنظرت للدكتورورة باعتذار:

- معلش يادكتورورة أنا متأسفة بالنيابة عنه بس لو سمحتى فهمينا الجلسات دى عبارة عن ايه وبتتم ازاي , وازاي عرفتى توصلى لهشام , حضرتك مش عارفه كلامك ده غريب قد ايه بالنسبة لنا

نظرت إليها الدكتورورة وبدا عليها قبول الاعتذار:

- هقولك كل حاجة بس تقولولى الأول انتوا كنتوا جايين ليه أصلاً؟

ردت أمانى بتردد :

- بصراحة يا دكتورة شريف بيشوف حاجات كده مش عارفين لها تفسير وجينا لحضرتك علشان تفسرهمالنا

انتهت الدكتورة اكثر :

- حاجات زى ايه

نظرت إلى أمانى لأسرد تفاصيل ما رأيت لعلّى أجد عندها مبتغى , فأومأت برأسى تفهّمًا ونظرت للدكتورة غصبًا وسردت لها ما رأيت وما عجزت عن فهمه ..

تركنتى الدكتورة أقص كل ما عندى وحين انتهيت لم تبدى أدنى آيات التعجب كما ظننت ولكنها ابتسمت تفهّمًا وقالت:

- هتسمع منى , ولا مش هتصدق فأوفر على نفسى واسكت .

أجبت بهدوء :

- مضطر أصدق , معنديش حل تانى

اسندت الدكتورة ظهرها للوراء وهى تنظر إلىّ ثم استطرقت شارحة :

- بالنسبة للحلم الى شفته وانت في العمليات والتفاصيل الى شفتها
واتأكدت انها حصلت فعلاً , ده مش حلم بالعكس ده واقع , ودى تجربة
انت مرّيت بها بتسمى في علم الميتافيزيقا أو علم ماوراء الطبيعة "
تجربة الخروج من الجسد " أو الـ "OBE"

ودى تجربة غالبًا ما بتحصل في تجارب القرب من الموت Near Death
Experience , ودى بتحصل لما الشخص يتعرض لحادثة مثلًا أو
عملية جراحية أو أزمة قلبية أو نوم عميق أو غيبوبة أو حتى تحت
التخدير , والخارجين من الجسد دول بيكونوا واعيين بكل الى بيحصل
في العالم الحقيقي في الوقت الحقيقي. والخروج من الجسد ده
بيختلف عن حاجة اسمها الإسقاط النجمي وده بسبب ان الرؤية الى
بتشوفها بتبقى في نفس وقتها لكن فيه رؤى ثانية بنسميها الرؤى
المستقبلية ودى الى بتشوف فيها حاجة لسه ما حصلتش وتتفاجئ
انها حصلت زى ماشوفتها بالظبط , ودى بتحصل مع ناس كثير أوى
أوى الى بتلاقهم يقولوك أنا حلمت حلم واتحقق بحذافيره , وفيه
رؤى ثانية بتشوف فيها لمحات من الماضي لغرضي ما .

وفيه سببين رئيسيين علشان تحصل عملية الخروج من الجسد :
أولهم لما يكون الشخص ده قُرْب من الموت أو معتقد ده , والسبب
الثاني إن الشخص ده بتكون عنده مراكز الطاقة نشيطة يعنى زى ما
بنقول عليها بالعامية نجمه خفيف ومستعد للحاجات الغريبة اللي زى
دى .

وعلى فكرة التجربة دى مش لازم تمر بيها غصب عنك , دا فيه مراكز بتدرسها وتمرنك انك تعملها كمان .

نظرت أمانى وكأنها لم تستوعب شيئاً ولم يكن ما فهمته أكثر منى فى شىء , فلاحظت الدكتورة نظرة البلاهة على وجوهنا فاستطردت بشرح أكبر:

- الميتافيزيقا أو علم مارواء الطبيعة , ده علم ببيحث فى الظواهر الغريبة والغيبيات الى الإنسان ما يعرفهاش , أو مر بيها لكنه مش فاهمها ومنها تجارب الخروج من الجسد

اترصدت حالات كتير جداً لناس من كل حته فى العالم مرّوا بتجربتك دى , شافوا نفسهم وكأنهم روح بلا جسد واقفه قدام جسد بلا روح وكان روحهم انسلخت عن جسمهم شافت كل حاجة جسمهم ما شافهاش ورجعت الجسم تانى .

وانت لما كنت فى العمليات وقربت من الموت زى ما حكيتلى , كان دا وسط مہىء لخروج الروح نهائياً وإن حضرتك تموت إلا انك رجعت تانى للحياة فعادت الروح معاك بعد ما خرجت للملكوت وشافت باقى الأرواح اللى كانت هتنضم لهم ومنهم روح أخوك هشام اللى كانت بتحاول توصلك بأى شكل علشان تنهك من شىء أنا لسه لحد دلوقتى ما أعرفهوش , وبعد كده بدأت الأحلام تأكد عندك فكرة ان فيه حاجة لازم تفهمها , رسالة من العالم الآخر مشفرة ومحتاجة تتحل شفرتها , وده دليل على رسالة هشام اللى اختارنى أوصلها لك , ويمكن تكون ليها

علاقة بالحاجة الى زى ما حكيلى عند زوجة أخوك بتحاولوا تلاقوها
ولسه ما توصلتوش لحاجة .

- ولو هتسألنى ليه هشام جالى أنا بالذات , هقولك لإن الروح بتتميز
بشفافية تقدر تخليها تستنتج الى هيعمله الشخص بعد كده وتحاول
تقرّبه لأقرب نقطة يقدر يبدأ عندها عن طريق علامات أو إرشادات أو
حتى توجيهات وتلميحات المهم انه يوصل , والروح دى حوالينا فى كل
مكان بتسمع وتشوف وأكد هشام توقع إن أمانى هتقترح عليك انك
تجلى أو حتى شاف الى هيحصل مسبقًا, علشان كده كان بيظهر لى فى
جلساتى لتحضير الأرواح , كنت بسمع منه أصوات مهمة وكلام غير
مفهوم خلانى أحس ان الروح دى محتاجة مساعدة بس هى مين ولا
محتاجة ايه دا الى ما كنتش أعرفه .

مهما حاولت إبصال مدى اندهاشى وتعجيبى اللذآن تناوبا نهش عقلى ,
لن تسعفى كلماتى

استطردت الدكتورة قائلة :

- الأرواح عالم كبير ووبر غويط الى يدخله ما يعرفش يخرج منه واللى
يحل ألغازه يشناق للغز جديد , والشاطر بس هو اللى يفهم الإشارات

ثم نظرت إلى مستردة:

- انت نزلت البير غصب عنك , بس م تنكرش انك حبيته , ومش عاوز
تخرج منه غير لما تحل اللغز ,ويمكن ما تحبش تخرج خالص

أجبتها باستسلام :

- بقولك ايه ، أنا يمكن لا فاهم ولا مقتنع بكل الهرى اللى فات ده ، بس مفيش قدامى غير إنى أصدقك ، هنعمل ايه دلوقتى ؟

أردفت بسرعة وكأنها كانت تنتظر السؤال :

- لازم نعرف هشام بيحذرك من ايه ؟ ، وايه السر اللى بينه وبين والدك و كان يقصد ايه برسالته اللى اختارها بالذات علشان يوصلها لك " خلى بالك من أخوك " ، وعلشان كده انتوا هتشاركونى الجلسة الجاية يمكن نقدر نوصل لحاجة .

سألتها مستنكرًا :

- بس احنا لحد دلوقتى لسه ما عرفناش ايه هى جلسات تحضير الأرواح دى ؟

شبكت الدكتوراة يداها وضممتها لصدرها وبدأت ف الشرح بطريقة مسرحية قديمة :

- تحضير الأرواح بدء أول مره فى أمريكا سنة 1848 م وبعد كده انتشر فى أوروبا والعالم كله واتفق فيه كتب واتعمل عليه أفلام وأصبح علم بيتدرس فى بعض الجامعات.

وفكره تحضير الأرواح فى المجلد أساسها هو إمكانية السيطرة على الروح بعد موت الجسد وإمكانية استحضارها فى أى وقت علشان

تحكيلنا عن حالها في عالم الأرواح و عن الأحداث اللي حصلت لها في الدنيا سواء في الماضي أو حتى في المستقبل!!....

وأردفت وهي تنظر لنا :

- جلسة تحضير الأرواح دى هى محاولة للتواصل مع أرواح الموتى

وقبل أن أسأل , أشارت بإصبعها وكأنها استنتجت السؤال :

- مش أى حد يقدر يعمل الجلسات دى

نظرت إليها متسائلاً :

- وايه شروطها ؟

أشارت إلى غرفة مغلقة فى أحد أطراف المنزل :

- اتفضلوا

فتحت بابها فإذا هى غرفة صغيرة تتوسطها طاولة بيضاوية حولها مقاعد كثيرة , فى كل جانب من جوانب الغرفة كان هناك ركنة صغيرة تعلقوا الشموع التى بدا من هيئتها انها أضيئت مئات المرات حتى تساقط الشمع السائل على الأرض من كثرته , و هناك عدد كبير من الكتب ذات الأغلفة العتيقة مكومة هنا وهناك , وأطباق طعام فارغة موضوعة فى أحد الأركان , ولا يوجد بها سوى نافذة صغيرة أُسِدَّت

الستائر عليها وكأنها تريد محو أى أثر للضوء وتجعلها كالمقبره التى لا تشرق عليها شمس .

مررت بنظرى فى الغرفه ثم اتجهت أنظارى للدكتوراه متسائلاً عن تلك الشروط , فابتسمت حينما شعرت بشغفى ونجاحها فى إثارة اهتمامى , فأكملت حديثها :

- على فكرة , لو مكانش هشام جالى شخصياً , عمركوا ما كنتوا هتشوفوا الأوضة دى ولو بعد مية سنة , بس أنا مصدقاكم علشان كده وريتكم اللى المفروض ما كنتوش تشوفوه .

اقتربت منها أمانى وسألتها متلهفة :

- طيب قوليلنا بقى الشروط

رفعت الدكتوراه رأسها لأعلى واستنشقت أكسجين يكفى لأسبوع واتجهت نحو الصالون البالى فجلست مجدداً ونحن نتبعها حيث أردفت :

- أولاً : لازم يكون عدد المشاركين فى الجلسة مش أقل من 3 و يكون عددهم يقبل القسمة على 3 .

- ثانياً : واحد من المشاركين فى الجلسه بيبكون هو الوسيط الروحانى اللى من خلاله هنقدر نتواصل مع الروح , نسألها وتجاوب , والوسيط

ده بيعرف الإجابات عن طريق صور أو أصوات بتعرضها عليه الروح وكأنه بيشوف فيلم يقدر يحكيه .

- ثالثًا : لازم نقعد كلنا على ترائيزة بيضاوية ويكون عليها أكل ' أى أكل علشان تجذب الروح , ويكون عليها شموع عددهم بردو يقبل القسمة على 3 وكل ما زادت الشموع كل ما كان جذبها أكثر , لأن الأرواح بتنجذب للضوء والدفا

- رابعًا : بنطفى كل أنوار المكان ونقعد على ضوء الشموع و بنطفى كمان أى جهاز ممكن يعمل تشويش أو إزعاج أثناء الجلسة

- خامسًا : علشان نبدء الجلسة لازم نقعد كلنا حوالين الترائيزة وماسكين ايدهم بعض علشان نكوّن حلقة تواصل بين الوسيط وباقي أفراد الجلسة , ونبدأ ننادى على الروح

سألت أمانى فى لهفة :

- وبتنادوا عليها ازاي

أجابت الدكتورة:

- بيختلف شكل النداء من مجموعة للتانية , يعنى مثلاً ممكن نقول :

- " عزيزنا فلان , جئنا وأحضرننا معانا الهدايا من الحياة إلى الموت , تواصل معنا يا فلان وتنقل بيننا " , ونفضل نكرر النداء ده لحد ماتستجيب الروح وتحضر .

سألتهأ أنا الآخر مشككاً :

-وتعرفوا ازأى بقى انها حضرت؟

-بنعرف ان الروح حضرت بأشكال كثير , ممكن نسمع صوت خبطات أو النور يطفى وينور ده لو كنا منورين إضاءة خفيفة , او كأن نسمة هوا دخلت علينا تحرك إضاءة الشمعة أو اننا نسأل الوسيط هل الروح حضرت ولا لأ

-وبتواصلوا معاها ازأى ؟

لو هى حضرت وحاين نتواصل معاها من غير وسيط فيبقى عن طريق الخبط على التراييزة , يعنى نسألها سؤال وننتظر الإجابة , لو إجابة الروح " لأ " بتخبط خبطة واحدة على التراييزة ,ولو إجابتها " ايوه " بتخبط خبطتين

- ولو فيه وسيط ؟

- وقتها بيكون الموضوع أسهل والمعلومات أكثر , لاننا ساعتها هنقدر نسألها عن كل حاجة والوسيط يجاوب بالحاجة اللى بتورمهاله

سئلت أمانى متعجبة :

- بتورمهاله ازأى يعنى ؟

أجابت الدكتورة فى عرض مسرحى آخر :

- لما الوسيط بتحضر عليه الروح بتظهر قدامه صور وكأنها لقطات فيلم بتتعرض قدامه , يقدر يشوف فيها الى الروح عاوزاه يشوفها , ممكن تكون اللقطات دى حاجات حصلت قبل كده , أو إشارات , أو تحذيرات من حاجة مستقبلية , أو حد معين

ولما بنعوز ننهى الجلسة , بنشكر الروح على مساعدتها ونبليها انها تقدر تمشى بسلام ونفك ايدينا من بعض ونطفى الشموع وننور الإضاءة ولازم طبعًا كل المشاركين فى الجلسة يحافظوا على هدوئهم للنهاية , علشان كده بنخاف ندخل حد جديد لاننا مش ضامنينه , وحصل مره اننا دخلنا حد هاوى فى وسطنا وكانت النتيجة انه انهار فى بداية الجلسة و اتفكت الحلقة وكانت هتسبب لنا فى مشكله كبيرة مع الروح الى اتحضرت وقعدنا ايام بنعانى من غضبها .

سألته وكأننى رفضت عنى غشاوة اللهفه :

- وانتي بقى عايزانا نصدق التخريف ده

نظرت لى الدكتوراة فى ثقة :

- زى ما أنا مصدقة التخريف بتاعك وعارفه انه حقيقة لازم تصدق

التخريف بتاعى وتأكد أنه حقيقة

ساد صمت طويل قبل أن تقطعه أمانى متسائلة بخضوع :

- نيحى لحضرتك امتى ؟

ردت الدكتوراة في هدوء :

- بكره بعد الغروب تكونوا هنا , هنعمل جلسة ونحاول نستدعى هشام ,
يمكن نقدر نعرف حاجة ,

شكرتها أمانى على وقتها الثمين الذى لا اعرف له ثمنًا وانصرفنا وقبل
أن تغلق الباب خلفنا قذفت لى كلمة أخيرة :

- خلى بالك من الإشارات يا شريف , وحاول تفتكر اللى هتشوفه

وقبل أن أنظر إليها وأسألها ما الذى سأراه كانت قد أغلقت الباب

نزلنا أنا وأمانى واستقللنا السيارة وكلُّ منا يهيم فى عالمه لا أحد يكلم
الأخر , فقط يصارع أفكاره , أوقفت السيارة أمام منزل أمى الذى
ستمكث فيه أمانى ليلتها استعدادًا للقاء المرتقب وانصرفت دون أن
يتحدث أحدنا إلى الآخر وكأننا غرقنا فى ذلك البئر العميق وانصرفت
أنا لمنزلى وكر أحلامى لعلى أجد فيه ملاذى وهنا تذكرت رسالة هشام
التي أوصلتها لى تلك الطيبة وتساءلت فى نفسى :

" أخلى بالى منه ازاي " .

فى المنزل ..

فتحت الباب لأجد زوجتى الحبيبة جالسة على مقعدِ أمام التلفاز منتظرة عودتى , بمجرد وصولى قامت مسرورة تحتضنى باشتياق :

- وحشتنى أوى

أجبتها بحب وأنا أمسح على شعرها :

-وانتى اكثر بكتييييييير

- اخبار الشركة ايه ؟

جلست على أقرب مقعد وأطحت بمفاتيحى على الطاولة المقابلة :

- ما روحتش الشركة النهارده

جلست نهلة بجوارى وسألتنى بتعجب :

- ما روحتش الشركة ؟ امال صحيت بدرى وروحت فىن

- والله يا نهلة روحت قابلت ناس أصحابى ما شوفتهمش من زمان ,
وقولت اصحى بدرى بقى واشم شوية هوا وأنا ماشى

أومأت نهلة برأسها فى اقتناع كاذب :

- ما قولتليش صحیح عملت ايه امبارح مع أمانى ؟

ترددت قليلاً هل أخبرها أم أوثر الصمت , تمنيت أن أخبرها بما يجول في خاطري فهي أقرب لى من نفسى ولكنى خشيت أن تستشعر مرضى أكثر فيئبئى بيننا سداً آخر , فأجبت باقتضاب :

- ولا حاجة اديتها الفلوس واطمنت على يوسف ورجعت

سألتنى بابتسامة :

- أحضرك العشا ؟

أجبت بابتسامة مماثلة :

- اوك يا حبيبتي

دخلت غرفتى وتصنعت تبديل ملابسى ووقفت أمام المرأة أشاهد ذلك الشيخ المجسم الذى يرتسم بداخلها , أنظر لنفسى وكأننى أحجية تنتظر الحل , تسائلت مئات المرات ماذا سأفعل ؟؟

هل أذهب غداً وأكمل هذه المهزلة , أم أتقهقر ويبقى النزاع داخلى يلتهمنى .

لا أعلم ... لا أعلم

- العشا جاهز يا حبيبى

انترعنى صوت زوجتى من أضغاث أحلام اليقظة , فأجبتها بهدوء:

- اوک يا حبيبتي جاى اهو

اضطرتت أن أفیق من تساؤلاتی وأن اغير ملابسی بسرعة قبل أن یرد
العشاء وأدخل فی تساؤلات جديدة

أتممت تناول عشائی وهممت بإشعال سيجارة لكنى خشیت اللوم
والعتاب وهجر الأحباب الذى سوف تلقيه على زوجتى فأعدتها لمرقدها
مرة أخرى وذهبت لسریرى كى أظهار بالنوم .

دخلت نهلة فوجدتى قد تلفحت بالغطاء واستعددت لنوم عمیق ,
فصاحت فی غاضبة كشأن كل أنثى :

- انت هتنام !؟

- ايوه أصلى تعبان أوى ومرهق وبقالى يومين ما بنامش كويس انتى
عارفه

- امممممم وهو يعنى الارهاق ده ما ينفعش يستنى شوية

هنا تذكرت عهدى لى نفسى بالمثالية , فنظرت إليها مبتسمًا :

- ينفع عشان خاطرک

جلست على السرير ونظرت إليها لاستكمال حديثنا , سألتنى نهلة
باهتمام :

- ما قولتليش عملت ايه مع على ؟

استطردت نهلة :

- شفت بقى ان كلامك نسانى أجيبك الدوا , ثوانى أقوم أجيبهولك

زفرت بارتياح على تفهم نهلة لموقفى , وابتسمت فى نفسى شاكرًا لله على إعطائى مثل تلك الزوجة العظيمة ..

أحضرت لى نهلة دوائى الذى لولاها لما تناولته أبدًا , فأخذت الدواء وجلست هى بجانبى وسألتنى اسئلة المرأة المعهودة :

- بتحيينى؟

- طبعًا بحبك

- بجد؟

- بجد

- طيب وحشتك؟

- جدًا جدًا

- قد ايه؟

- قد ما وحشنى الزمالك يكسب الأهلئ

هنا ابتسمت نهلة وهذا ما كنت أنشده واقتربت واضعة رأسها على

صدرى ثم رفعت رأسها وطبعت قبلة على خدى وهى تستطرد :

- بكره كل حاجة هتتحل , تصبح على خير

شريف

شريف

يدًا تلكزنى بقوة لتحثنى على النهوض

- فيه ايه يا نهلة

- قوم يا شريف

قمت فزعًا ونظرت أمامى :

- هشام

- تعالى معايا يا شريف

نهضت من سريرى ونهلة مازالت راقدة بجانبى واتجهنا معًا نحو الغرفة الأخرى , فتح هشام بابها فوجدتني فى شركة والدى وأمامى على صديقى يجلس على مكتبه ونهلة تجلس أمامه يتناقشان وقد احتدم نقاشهم فأخرجت نهلة ورقة من شنطتها ولوحت بها أمامه, هنا استشاط على غضبًا وطردها من مكتبه وجلس على مقعده مرة اخرى مغطيًا وجهه بكفيه وكأنه فى موضع حرج لا يدري ما يفعل , وفجأة انتفض وكأنه التقط تلك القشاية التى يتعلق بها الغرقان , فأمسك الهاتف وطلب

رقمًا تحدث إليه قليلاً وبدا عليه الراحة ثم أنهى المكالمة وأغلق السماعه واسترخى على مقعده أكثر.

وهنا نظرت لهشام ولم أفهم شيئاً , فسار أمامى وتبعته حتى دخلنا غرفة أخرى , غرفة أعرفها جيداً , غرفة مكتب أبى الحبيب , وجدتني أقف على بابها و يدخل أبى الغرفة وكأنه لا يرانى ولكنه ينظر خلفه خشية أن يراه أحد , ثم يفتح أحد أدراج مكتبه ويضع فيها شيئاً ويغلق الدرج بالمفتاح وينصرف

وكحالتى الأولى لم أفهم شيئاً ونظرت لهشام مرة أخرى أرجوه أن يشرح لى ما استحال على عقلى فهمه ولكنى لم أجده هذه المرة وكأنه تبخر كالهواء فطللت أبحث عنه هنا وهناك وأنادى عليه كثيرًا حتى استيقظت من نومي مفزوعًا لا أفهم ما رأيت وإن كان هذا أصبح عاديًا , فأنا لم أفهم شيئاً منذ رأيت هشام فى المرة الأولى وحتى الآن ...

نظرت بجانبى فوجدت نهلة ما زالت نائمة , بحثت عن ساعتى فوجدتها بجانبى , نظرت لعقاربها السامة أرى كم الساعه الآن كانت التاسعة صباحًا

لم أدرى بنفسى إلا ناهضًا من سريرى متجهاً لهاتفى أطلب رقم أمانى وأطلب منها لقائى فى شقة هشام , فمن يدرى لعلها إشارة !!!!

في منزل هشام ...

الساعة الحادية عشر صباحًا ...

صمت مطبق يلف المكان , أفرغت ما في جعبتي لأمانى وقصصت لها حلمى الأخير , قطعت أمانى صمتنا وهى تسألنى بتعجب :

- تفتكر ايه اللى بين على ونهلة ؟

أجبتها يهدوء:

- ما أعرفش

- طيب ايه الحاجة اللى كان عمو بيخبها وخايف حد يشوفها

- بردو ما أعرفش

- طيب ما سألتش نهلة ليه ؟

- تفتكرى لو كان فيه حاجة فعلا هتقولى عليها

- طيب وهنعمل ايه دلوقتى

- لو كان عليا عايز أروح للدكتورة دى دلوقتى بس قالت نروحها بعد

الغروب , مش عارف اعمل ايه مش عارف اشتغل ولا أروح الشركة ولا

عارف أقعد مع نهلة ولا عارف أكلم على ولا عارف اعمل اى حاجة غير

لما أفهم الأول , قولت أكلمك نقعد في أى حنة لحد ميعاد الدكتوراة
واهو ألاقى حد اتكلم معاه بدل ما أتجنن

نظرت أمانى في ساعتها بنفاذ صبر :

- لسه قدامنا بيعى خمس ساعات على ما نروح لها , خرينا قاعدين
هنا بقى على ما بيعى الميعاد ونمشى ولا أقولك تعالى نروح عند ماما
ناخد يوسف يروح معانا يمكن يسمع صوت باباه

قالتها أمانى بحزن قبض قلبى فحاولت إلهائها حتى لا تخونها دموعها
مرة ثانية :

- ياأمانى انتى مصدقه الوليه دى كدا ليه , هى يمكن يكون عندها
معلومات عن حاجات احنا ما نعرفهاش بس مش لدرجة تخلى هشام
يكلمنا انتى واحدة مثقفة وعيب تقولى الكلام ده

نظرت أمانى للأسفل في حزن :

- أنا بقول يمكن

وافقتها كى لا تحزن :

- خلاص قومى بينا احنا كدا كدا مفيش ورانا حاجة بس أنا مليش
دعوة لو الواد ما نفعش للجواز

ضحكت أمانى ومسحت دموعه نزلت سهواً منها :

- طيب قوم بينا

ذهبنا لمنزل أمى وكالعادة انتظرتهم بعيداً حتى أحضرت أمانى ابنها يوسف وذهبنا لإحدى مطاعم التيك أواى تناولنا بعض الساندوتشات وانطلقنا ناحية الدكتوراة غريبة الأطوار لعل أحد فتواها تفيدنا .

بمجرد وصولنا أمام الباب وجدناها واقفة فى انتظارنا وهى تبسم بثقة:

- كنت عارفه انكوهتيجوا

أجابت أمانى :

- واحنا محتاجين الجلسة دى أكثر منك بكتير أوى

- طيب اتفضلوا

دخلنا المنزل وأجلسنا يوسف فى الصاله ودخلنا نحن غرفة الأشباح, غرفة تحضير الأرواح ..

قصصت لها حلمى الأخير وكالعاده ظلت محتفظة ببرودها ولم تتفوه إلا بكلمة واحدة :

- يلا بينا نبدء الجلسة

جلسنا ثلاثتنا حول الطاولة , أشعلنا الكثير من الشموع وأطفئنا الإضاءة ووضعنا بعض الطعام وجلسنا فى حلقة ممسكين بيد بعضنا البعض , تسائلت الدكتوراة :

- مين هيكون الوسيط ؟

- أنا

قلتها مسرعًا وكأننى أحجز مقعدى فى الصف الامامى فقالت أمانى فى شفقة :

- بلاش انت يا شريف ولى الدكتور تبقى هى الوسيط أهو على الأقل هى عملت الموضوع ده قبل كده

أجبتها بإصرار :

- لا , أنا اللى هكون الوسيط

ردت الدكتورة باستسلام :

- اللى يريك , بس لما تحس انك هتتعب أو حصل حاجة غريبة ابقى اعمل اى إشاره نتهى بيها الجلسة

اخذت شهيقًا عميقًا وسميت الله فى سرى :

- يلا نبدء

بدأنا جلستنا بالنداء على أخى الحبيب

" عزيزنا هشام ابن فاطمة ، جئنا وأحضرنا معانا الهدايا من الحياة إلى الموت، تواصل معنا يا هشام وتنقل بيننا "

ظللنا نردها مرات ومرات حتى توقفت عن الكلام وأغمضت عيني ,
فشعروا أن الروح قد احتلتني , سمعت صوت الدكتوراة وكأنه يأتيني
من بعيد ..

- لو حضرت ياهشام اخبط خبطتين

أقسم أني لم أشعر بيدى وهى تطرق الطاولة طرقتين , وكأننى فتحت
صدرى للهواء فاحتلت جسدى نسمة هادئة , حررت روحي وجعلتني
هائئاً في الملكوت , لم أعد أشعر بجسدى , تركت آلامى وتركت عالمى
وانتقلت للسلام .

لم أرى هشام ولم أجد ذلك الفزع والإثارة التى كنت أنتظرها , لم أرى
أشباح أو جنٍ مُقَنَّع , ولم أنتقل إلى البرزخ الهائم , ولكنى تحولت إلى
مُشاهد سينمائى ينتظر رفع الستار , رأيت بعض المشاهد المصورة ,
لمحات خاطفة تأتى وتروح , أصوات أسمعها حولى في كل مكان وكأنها
رسائل تائهة تأتى من العالم الآخر يريد أصحابها أن يسمعها أحد أو
يشعر بها , شريط يمر أمامى يحمل في طياته الكثير , أغلبه لن أتذكره
عندما أستعيد وعيى ولكنى أرى الآن الحقائق , إحساسى بالحرية تجلى
في أبهى صوره , استعدت إحساسى الذى شعرت به لأول مرة يوم
اقتراب موتى ..

شاهدت ذلك الشريط حتى أظلمت الشاشة وانتهى عرض الفيلم
وأضيئت الأنوار, فتحت عيني و وسحبت يدي من يد الدكتوراة ويد
أمانى والعيون كلها تنظرلى مترقبة بلهفة وشغف تريد أن أقص عليهم

كل مارأيت , ولكنى فقط وضعت يدي أمام وجهي أحاول التذكر ,
أحاول تجميع شتات أفكارى , وحينما استعدت تركيزي كليًا , مددت
يدي ف جيبي مسرعًا واستخرجت ورقة وقلم وكتبت عليهم تلك الأرقام
التي رأيتها من قبل خوفًا أن أنساها ثانية ..

1.13.1.14.25

نظرت أمانى للورقة وتساءلت :

- ايه دى

قلت وأنا افكر :

- دى كلمه سر

تعجبت الدكتورة قائلة :

- بس تكوينها غريب ازاي تبقى كلمه سر وفي وسطها نقط كده كأنها
بتفصلها عن بعض , وكلمه سرايه بالظبط ؟

- مش عارف

ثم تذكرت باقى ما رأيت فقمتم مسرعًا أنادى يوسف ابن أخى , ركضت
إلى الصالة وركضت خلفى الدكتورة وأمانى وهما يسألانى فى دهشة

- فيه ايه , عاوز يوسف ليه

جلست على مقعد بجوار يوسف وجلسن حولي , فركت جبتي بيدي
محاولاً استعادة المشهد السابق وأنا أقص لهم ما رأيت بهدوء :

- شفت يوسف في شقه هشام القديمه ماسك حاجة في ايده مش
عارف هي ايه وبيخبها علشان محدش يشوفها, وبعدها ظهرت قدامى
الأرقام دى اللى شفتها في حلمى اللى فات ساعة ما قال عليها هشام
غنها كلمة السر, وبعدها سمعت صوت جاى من بعيد , صوت ضعيف
بس قدرت أسمعه صوت بيقولى " وصل الأمانة يا شريف " .

نظرت لأمانى مستطرذاً :

- شفتك وشوفت نهلة ويوسف وماما وعلى , شفت أحداث كثير داخله
في بعضها ما عرفتش أفهمها ولا أميزها , الأصوات حواليا خلتنى أتوه
بقيت حاسس انى قاعد معاهم شايفينى وبيكلمونى , حاولت أشيل في
راسى أكبر قدر أقدر افكره لكن بمجرد ما فتحت عيني ما إفتكرتش أى
حاجة غير يوسف والأرقام اللى شفتها قبل كده خفت أنساها فكتبتها
بسرعة.

نظرت ليوسف متسائلاً :

- يوسف انت خدت حاجة كانت بتاعت بابا الله يرحمه
شعرت بخوف يوسف وتردده فكررت عليه السؤال مرة اخرى ولكنه
لم يجب , حاولت طمأنته :

- ما تخافش يا يوسف دا بابا جالى فى الحلم وقالى انه فرحان أوى انه
خدت حاجة مهمه زى دى وخليتها معاك لحسن تضييع

ابتسم يوسف مسرورًا وقال فى فرحة :

- فعلا ياعمو بابا مبسوط منى

- ايوه يا حبيبي مبسوط منك أوى علشان كده جالى فى الحلم وعاوزنى
أشكرك , بس ما قلتليش هى ايه الحاجة دى

وضع يوسف يده فى جيبيه وأخرج هاتف هشام رحمه الله ..

سألته أمانى باستغراب :

- انت خدت الموبايل ده امتى يا يوسف

رد يوسف :

- أصل يا ماما حضرتك لما بابا الله يرحمه مات , خدتى كل حاجته
وحطتها فى الأوضة وكنتى بتعيطى وقولتى اننا هنسافر ومش هناخد
معانا أى حاجة , وأنا كان نفسى يبقى معايا حاجة من بتاعت بابا كل
ما يوحشنى أبوسها والبوسه توصله , فدخلت وحضرتك بتلمى الهدوم
وخدت موبايل بابا خليته معايا وكنت بخبيه فى جيبي حتى وأنا نايم
علشان ما تزعليش منى .

بكت أمانى حين شعرت بقسوتها فى ظلم هشام وذكراه , احتضنت يوسف وقبَلته :

- أنا أسفه يا يوسف أسفه أوى

نظر لها يوسف بحنان :

- ما تعيطيش يا ماما دا بابا بيحبك أوى وهو معنا وبسمعه بيكلمنى
ويطبطب عليا لما اكون خايف وبيجىلى فى الحلم كمان ويقولى انه
بيحبك

احتضنت أمانى يوسف أكثر ودموعها ترفض التوقف:

- ربنا يخليك ليا يا حبيبى ويرحم بابا ويغفر لى .

" موبائل هشام "

قلتها وأنا أحمل ذلك الهاتف فى يدى , هل هذا الشئ هو ما دفع
هشام للحضور من عالمه بعد سنة غياب منذ وفاته , ماذا تحوى تلك
الكتلة المعدنية كى تضعنى فى ذلك العالم العجيب , كى تشتتنى وتمزق
روحى كل ليلة

نظرت لى أمانى متلهفة :

- خد يا شريف افتحه يمكن نلاقى اللى هشام عاوزنا نلاقيه

ضغطت زر الطاقة ليكشف الهاتف عن محتواه لكنى وجدته بكلمة سر ..

تذكرت تلك الارقام التي أعطائها لى هشام وأخيرًا سيبقى لها فائدة ,
بسرعة أدخلتها وكانت النتيجة صادمة ..

" كلمة المرور غير صحيحة "

حاولت مرارًا وتكرارًا مرة باللغة العربية وأخرى بالإنجليزية ولم ينفذ
معها شيء , ظللت أكررها ساعات حتى يئست وظهر اليأس على وجه
أمانى والدكتورة , كل ما فعلناه ذهب سدى , فوضعت الورقة والهاتف
على الطاولة التي أمامنا وأسندت ظهري للوراء وفي قلبى حسرات ..

أثناء استلقائى وجدت يوسف يمسك بالورقه ويبتسم فى فرحه وكأنه
وجد لعبه :

- أحلها أنا يا عمو أحلها

انتفض ثلاثتنا على صوت يوسف فاقتربت منه متلهفًا :

- انت تعرف هى ايه دى يا يوسف

- ايوه يا عمو دى لعبة كنت بلعبها أنا وبابا

- لعبة؟؟

- ايوه ياعمو , لما كان بابا يحب يقولى حاجة من غير ماما ما تعرف كان بيكتيهاى أرقام زى دى وأنا أقلبها واعرف هو كان عاوز ايه .

رفعت حاجى ولم أفهم شيئًا .

- تقلبها ازاي يعنى يا يوسف

أمسك يوسف بالقلم وكتب الأحرف الأبجدية الإنجليزية كاملة من A حتى Z , وأسفل كل حرف وضع رقم من 1 حتى 26

A	B	C	D	E	F	G	H	I	J	K	L	M
1	2	3	4	5	6	7	8	9	10	11	12	13
N	O	P	Q	R	S	T	U	V	W	X	Y	Z
14	15	16	17	18	19	20	21	22	23	24	25	26

وبدء يوسف فى تحويل الأرقام إلى حروف حتى ظهرت كلمة السر

1.13.1.14.25

AMANY

أمانى هى كلمة السر المرتقبة , مسكت الهاتف مرة أخرى وأدخلت هذه المرة أحرف لا أرقام , أحرف الكلمة الضائعة وكانت النتيجة

"كلمة المرور صحيحة"

عادت أمانى للبياء بعدما علمت أنها هي المسيطر الأول والأخير على قلب وعقل هشام ولكن لا مجال للندم فلن يعيد البياء اللبن الذي سُكِبَ وشربه التراب .

أمسكت يد أمانى في رفق حتى تمسح دموعها وتبتهج معي فأخيراً
سنجد حل لغز سرنا الغامض

فتحت الهاتف لأرى ماذا تخبئ لنا تلك القطعة المعدنية التي طال
بحثنا عنها

فتحت الأسماء لا شيء ..

فتحت الرسائل , لا يوجد رسائل ..

فتحت الصور لا شيء ...

قلبت ذاكرة الهاتف رأساً على عقب فلم أجد فيها إلا مقطع فيديو
واحد فقط ..

نظرت للجالسين حولي فرأيت أعينهم كلها مترقبة حل اللغز , ضغطت
زر التشغيل وبدء عرض الفيديو ...

كان الفيديو مصوراً لأبي جالساً في مكتبه وآخر يصوره حيث افتتح
أبي حديثه بالسلام

"ازيك يا شريف , يارب تكون بخيرا يا ابني , طالما انت بتسمع التسجيل ده دلوقتي يبقى أنا حصلى حاجة قبل ما أعرفك الحقيقة , ويبقى كمان هشام أخوك ما قالكش على سرى , من زمان يا ابني نفسى أصارحك , نفسى أحكيك على كل حاجة , بس خايف من نظرتك ليا , خايف صورة الأب المحترم تتحول لأب حقير نسي أولاده وظلمهم , حاولت كتير أحكيك ع اللى حصل لكن كل مرة كان لسانى بيقف , دلوقتي عدت التسجيل أكثر من مرة علشان أقولك ع الحقيقة لكن بردو ما قدرتش , الحاجة الوحيدة اللى هقدر أقولها لك , روح اسأل والدتك وخليها تحكيك بس قبل ما تسألها ادخل أوضه مكتبى , مد إيدك تحت رجل المكتب الأولى هتلاقي مفتاح , خده وافتح بيه أول درج , هتلاقي فيه ورقتين , اقراهم واسأل والدتك عنهم ولما تسألك مين اللى قالك مكانهم ابقى خليها تسامحنى , وياريت يا ابني تسامحنى انت كمان زى ما أخوك هشام قدر يسامحنى "

هنا انتهى التسجيل وانتهت معه آخر قطرات عرق المتصببة, نظرت للدكتورة وأمانى اللتان أوشك الفضول أن يقتلها وتتمت بصوت هادئ :

- نفس اللى شوفته فى حلمى امبارح بس ما كنتش أعرف مفتاحه فىين

نهضت أمانى من مقعدها وهيا تجذبني بقوة :

- قوم يلا شريف بسرعة نروح عند طنط

استوقفها بهدوء :

- بلاش تيجي معايا المرة دي ياأمانى , خليكى هنا مع الدكتورة وأنا هروح لوحدى , ولما ارجع هحكيلكم ع اللى حصل

انصرفت متجهاً لمنزل امى , فلن أستطيع النوم إلا عندما أعلم بما يخبئه والدى .

" العاشرة مساءً "

كنت فى منزل أمى أطرق الباب , حين أتانى صوتها :

- حاضر ياللى على الباب جايه أهو , شريف !! حصل حاجة يا ابنى ولا ايه ؟

- ازيك يا ماما عامله ايه ؟

- بخير يا ابنى الحمد لله , طمنى ايه اللى جايبك متأخر كده

تلعثمت قليلاً ثم أجبت :

- كان فيه ورق بدور عليه ما لقيتهوش فى الشركة وقولت اجى ادور هنا فى مكتب بابا الله يرحمه يمكن الاقيه

نظرت لى أمى متعجبة :

- ورق إيه دا يا ابني اللي هيقعد في مكتب ابوك خمس سنين , عموماً المكتب عندك ادخل دور على اللي يعجبك , صحيح يا شريف نسيت أقولك ان أمانى هنا من امبارح جت تشتري حاجات وتقعد يومين بس مش عارفه يا ابني خرجت من الصبح وخذت يوسف قالت هتزور واحدة صاحبها ولحد دلوقتي ما رجعتش وعماله أتصل بيها تليفونها ماقول وأنا قلقانه عليهم أوى

حاولت طمأنه أمى حتى لا يشتد قلقها ومازال الليل طويلاً علينا :

- آه يا ماما ما أنا عارف ان أمانى هنا ماهى كلمتى النهارده وكانت بتسأل عن نهلة علشان يقعدوا مع بعض شوية , انتى عارفه نميمة الستات ما بتخلصش , وزمانهم قاعدين مع بعض دلوقتي والكلام واخذهم

تهدت أمى بارتياح :

- طيب يا ابني الله يريح قلبك , روح شوف بتدور على ايه وأنا هروح أعملك الشاي

تركت أمى ودخلت مكتب أبى , كما هو لم يتغير منذ وفاته , لم يدخله أحد من بعده ولا حتى أخى هشام , ظل محتفظاً برائحة صاحبه حتى الآن .

اتجهت لذلك الدرج الذى دسَّ فيه أبى شيئاً وذكره في تسجيله , حاولت فتحه لكنى وجدته مغلقاً كما قال , لم أشعر بيدي إلا وأنا

أدها أسفل قدم المكتب وأبحث عن المفتاح , في داخلى تمنيت أن أجدته حتى أكتشف اللغز أخيراً ولكنى كنت أخشى أن يكون مفتاح لغرفة أسرار أخرى , ولكن لهفتى فاقت رهبتى حين وجدت ذلك المفتاح الصغير الذى يختبئ خوفاً من الوقوع فى أيدى أحد الغرباء .

أخرجت المفتاح وفتحت الدرج المغلق وفعلاً لم أجد فيه سوى ورقتين فقط كما ذكر والدى .

فتحت الورقة الأولى ...

أعرف شكلها جيداً فعندى منها واحدة

" قسيمة زواج "

لابد أنها قسيمة زواج أبى وأمى ولكن لماذا يخبئها ؟

وجدت الصور منزوعة منها , نزلت للأسفل أقرأ اسم الزوجين

أسم الزوج : سيف الدين أحمد محمد الشوربجى

أسم الزوجة : هاله عبد الرحمن ذكى منصور

هاله ؟؟؟؟

من هاله ؟؟

أسم أمى فاطمه من تكون هاله ؟؟

هل تزوج أبى على أمى ؟؟؟

هل تعلم أمى بأمر تلك الورقة ؟

هل أنجب منها ؟

هل طلقها أم مات وهو مازال متزوجًا بها ؟

هل ؟ هل ؟ هل ؟

مئات الاسئلة دارت بعقلى فى لحظة بل واقل من اللحظة , صدمتى كادت تفجر مخى المريض , كيف لأبى أن يفعل مثل هذا ؟ كيف ؟

فتحت الورقة الأخرى وكما توقعت كانت ورقة طلاقهم

كنت قد جلست على الأرض من هول الصدمة والورقتين مازالا فى يدى وفى رأسى تزاومت الأفكار , لم أشعر بأمى واقفة بجانبى وهى تحمل كوب الشاى حتى سمعت صوت ارتطام الكوب بالأرض .

نهضت مسرعًا لأجد أمى لا تقل عنى فزعًا واضطرابًا ..

وجدتها تنظر للورقة وكأن سرًا قد انكشف , يدها تشنجت وأسقطت الكوب , عيناها جاحظة ودقات قلبها أسمعها من مكانى , أشرت إليها بالورقة وأنا أسألها متحفظًا :

- تعرفى ايه الورقة دى , شفيتها قبل كده ؟؟

لم ألتقى جوابًا وإنما رأيت شلالات من الدموع قد انهمرت

سألته بحدة أعنف :

-تعرفى الورقة دى يا ماما , تعرفى اللى فيها

أومأت برأسها علامة الإيجاب وهى تغطى وجهها بكفيها , أمسكتها حتى لا تسقط وخرجنا إلى الصلاة , جلست على أحد المقاعد ونكست رأسها أرضًا , جلست بجانبها وأمسكت بيدي ذقنها ورفعت رأسها لتواجهنى وسألته فى شفقة :

- بابا اتجوز عليكى ؟

كانت ما زالت تبكى فى صمت وسط دموع حارة تسقط على وجنتها قبل أن تومئ رأسها بالإيجاب ثانية فسألته :

- امتى , اتجوز امتى ومين اللى اتجوزها دى , واتجوز ليه أصلاً ؟
احكىلى يا ماما كل حاجة أبوس إيدك

مسحت أمتى دموعها السارية وبدأت تقص ما حدث :

- أنا هحكىلك يا ابنى اللى حصل , بس قبل ما أحكىلك عاوزه أقولك انى ما رضيتش أعرفك بموضوع الورقة دى علشان ما تفكرش فى أبوك التفكير اللى دماغك دلوقتى دا , ولا تبص له بالنظرة دى حتى وهو ميت , أبوك يا ابنى أول ما إتجوزنا كان شغال فى شركة أدوية كبيرة , قدر يكسب منها كويس وكان بيحوش اللى بيكسبه علشان كان

في نيته انه يفتح شركة استيراد أدوية صغيرة يستورد فيها الأدوية المضمونة الى تفيد الناس ويحارب الشركات التي بتستورد أدوية فاسدة تأذى بها الناس

لما لقيته مصمم على حلمه بعثت له الذهب اللي كان عندي من ورت أهلى ومن الذهب اللي هو كان جايهولى في جوازنا وخذنا قرض من البنك , وفعلاً قدر أبوك يفتح الشركة اللي لسه موجوده لحد دلوقتي

عملنا إعلان عاوزين سكرتيرة واتقدمت واحده مؤهلاتها كويسة والدك قبيلها وخلاها سكرتيرة الشركة , وقتها كنت أنا لسه عارفه انى حامل فيك وأخوك هشام لسه صغير وما كانش ينفع أسيبكم واروح أشتغل معاه فوافقت انه يجيب حد يساعده واقعد أنا في البيت أهتم بيكم , بعد كام شهر لقيت والدك داخل عليا بيعيط ويبوس إيدى ويقول سامحيني

مش هقولك اتفاجأت لما قالى انه اتجوز عليا , أنا كنت حاسه بقول لأ مش ممكن , زى أى واحدة ما بتصدقش ان ممكن جوزها يتجوز غيرها وكأنها غير كل الستات

المهم قالى انه اتجوز وانها دلوقتي حامل وانه اكتشف انها اتجوزته علشان طمعانه في الشركة مش حب فيه , و كانت بتخنصر من فلوس الشركة وعامله حساب لنفسها في البنك , وعرف ده بالصدفة لما جالها جواب من البنك على الشقة اللي كان واخدهالها وهو اللي استلم

الجواب , ولقى ان حسابها في البنك كبير وان الحساب ده اتفتح بعد جوازهم .

قالى انه كان بيلاقى غلطات كتير فى الحسابات بس كان بيكدب نفسه , إزاي تبقى مراته وتسرقه لكن لما جاله حساب البنك أكد كل شكوكه , واجهها باللى عملته والمفاجأة انها ما أنكرتس .

قالتله إنها كانت عاوزه تأمين مستقبلها ومستقبل الطفل اللى هيتولد بالذات انه متجوز وعنده ولدين يعنى هتطلع هى وابنها من المولد بلا حمص .

وقتها أبوك اتصدم من كلامها وطلقها

وأردفت متهكمة :

- مش عارفه ليه الرجالة لما بتعرف الحقيقة بتتصدم مع إنها بتبقى عارفها بس بردو بتكذب نفسها .

وقتها كنت مصممة على الطلاق لكن رجعت فيه علشانكم , وعلشان ما تنتصرش عليا وأولادى يتربوا زى ابنها من غير أب وأساوى نفسى بيها , وعلشان بحب أبوك حب فوق الوصف

سامحته واتناسيت اللى حصل ورجعنا تانى زى الاول وعلشان ما يظلمهاش كان بيعت لها مصروفها ومصاريف ابنها كل شهر لحد ما لقيته جاي فى يوم ومعاه طفل عنده حوالى 7 سنين وبيقولى انه ابنه

من هالة , وانها قررت تتجاوز رجل أعمال وتسافر معاه الأرجنتين
وبعتت له الولد يعيش معاه لأنها قررت تمسح الماضي وتبدأ حياة
جديدة .

مش هكذب عليك لما شفت الولد كنت بكرهه بس لما فكرت بهدوء
وحطيت واحد فيكم مكانه لقيت انه مسكين مالوش ذنب في دنائة أمه
ولا إهمال أبوه .

قرر سيف انه يدخله مدرسة داخلية ونزوره احنا من وقت للتانى
علشان كان خايف تعرفوا الحقيقة وتكرهوه , وفعلاً دخله وكنا كل
أسبوع نروح نظمن عليه ونجيب له اللى نفسه فيه , وقتها كان سنك
أصغر من دخول المدرسة بشهرين وكان ممكن ندخلك مدرسة خاصة
تعدى حكاية الشهرين دول , لكن والدك رفض وقرر انه يدخلك السنة
الى بعدها علشان تدخل مع أخوك اللى انت أكبر منه بشهور , مع ان
كل واحد فيكم كان فى مدرسة لكن كان وجهة نظر أبوك انكم أكيد فى
يوم من الأيام هتتجمعوا ويمكن الدراسة تجمعكم وتبقوا أصحاب
وتعوضه عن السنين اللى عاشها لوحده .

والأيام أثبتت ان سيف كان ليه نظرة مستقبلية مدروسة كويس أوى ,
لأنكوا فعلاً دخلتوا كلية واحدة واتخرجتوا مع بعض .

سألته بلهفة :

- وهو فين دلوقتى ؟

ردت مبتسمة :

- موجود

سألتهما مترقبًا وملهوفًا :

- موجود فين ؟ ألاقيه ازاي ؟

ابتسمت وهي تربت على كتفى :

- انت اللى طردته وانت اللى تعرف مكانه .

كادت دقات قلبى تُسمِعُ العالم الآخر حين خَرَجَت عيني من كهفها
وارتخت عضلاتى المشدودة دفعة واحدة وأنا أهتف متألمًا :

- على ؟؟؟!!!!

- على أخويا

ربت أُمى على يدي التى أصبحت باردة كالثلج:

- ايوه يا شريف على أخوك , بلاش تظلمه يا ابني أكثر ما الدنيا ظلمته ,
وعلى فكره " على " بيتصل بيا كل يوم يطمئن عليك , مهما دورت ومها
قابلت مش هتلاقى أحن ولا أطيب منه , اتظلم من يوم ما بقى فى بطن
أمه كفايه عليه كده بقى يا ابني

نظرت لها مصدومًا :

- بس على كان بيسرقنى

قطعت أُمى جملتى وقالت غاضبة :

- لأ , على عمره ما سرقك دى لعبة بتتعمل عليك زى اللى اتعملت على أبوك , أنا ما أعرفش تفاصيل بس على اتصل بيا فى يوم وقالى ان فيه حاجة خايف انها تأذيك وانه هيحكيلك على كل حاجة لما يتأكد من اللى شاكك فيه , وسألنى إذا كنت عرفت حاجة عن جوازة أبوك وأنا قولتله لا , والله يا ابنى كان خايف وقلقان عليك يمكن أكثر منى ولما عرف انك كويس ارتاح .

روح له يا ابنى وراضيه دا مسكين ويحبك ومالوش غيرك وافهم منه ايه اللى بيحصل من ورا ضهرك , أنا طول الوقت كان نفسى أقولك بالذات لما هشام مات , بس كنت خائفة من رد فعلك وطالما ربنا أراد انك تعرف يبقى روحله وقربوا من بعض وعوضوا بعض عن اللى راح منكم , كفاية حزن بقى

نهضت من مقعدى وأنا أنوى تصحيح خطأى الفادح حين استوقفتنى أُمى قائلة :

فيه جزء من الحكاية انت لسه ما تعرفوش .

جلست مرة أخرى ونظرت لأُمى متسائلاً :

- ايه اللى ما أعرفوش

استكملت أمى حديثها :

- قبل ما سيف يموت بسنة لقي إنذار جايله من البنك بيقول انه لو ما سددهش القرض اللى واخده بضمان الشركة هيتحجز عليها وتتباع فى مزاد علنى , وطبعًا ده مش القرض اللى كنا واخدينه لاننا سددهناه بعد ما اشتغلت الشركة بشهور

- امال ايه القرض ده ؟

- ده اللى كان هيجن أبوك , راح البنك وقلب الدنيا وقالهم انه ما أخذش قروض وان ورق القرض أكيد مزور وهيرفع قضية يطعن فى التوقيع , لكنه اكتشف ان الورق سليم وتوقيعه على الورق كمان سليم

- راح الشركة وكان أخوك هشام الله يرحمه شغال معاه وفضلوا هما الإثنين يدوروا علشان يعرفوا ده حصل إزاي بالذات ان قيمة القرض كانت ب 5 مليون جنيه وده رقم مستحيل يسدوه بسهولة إلا لو باعوا الشركة كلها

وفى عز ما كانت عقولهم هنتشل من التفكير جه لأبوك اتصال من الست هاله بتقوله انها بعد ماتجوزت جوزها كان انسان سىء جدًا يهدلها وخذ منها كل الفلوس اللى كانت معاها وعاشت معاه سنين عذاب والآخر طلقها ورماعاها فى الغربية لوحدها اتهدلت واتلظمت سنين لحد ما إفتكرت انها كانت واخده ورق من الشركة , أبوك ماضى فيه

على بياض , رجعت مصر وعملت لنفسها توكيل عام وخذت القرض من البنك وهددت أبوك يا إما يديها 3 مليون جنيه أو تعمل نفسها ما إتكلمتش أصلاً وتاخذ ال 5 مليون بتوع القرض وسيف يسددهم .

خاف أبوك يديها الفلوس وما ترجعش القرض , سألها ايه الضمان وليه ما خدتش الفلوس وما كانتش قالتله حاجة , ردت عليه وقالتله انها ما عملتشد كده لأنه ربي ابنها أحسن تربية ودخله جامعة محترمة وكان أب كويس معاه وانها ما كانتش ناوية تأذيه أصلاً لكن ظروفها السيئة اضطررتها تعمل كده

كنت انت وعلى في أخر سنة في الجامعة وما كنتوش تعرفوا حاجة عن شغل والدكم , لكن هشام كان مع والدك في كل خطوة فاضطر سيف انه يحكي لهشام عن جوازه وعن أخوكم على

هنا تذكرت رسالة هشام " خلى بالك من أخوك يا شريف " ,, ياااه ياهشام حتى وانت في دنيتك بتفكر فينا

نظرت لأمي متسائلاً :

- وادوها الفلوس

ردت امي :

- اخوك هشام رفض الإبتزاز اللى بتعمله معاهم وراح رفع قضية يطعن فيها على صحة التوكيل وطلب أصل ورقة التوكيل في النيابة

وفعلًا النيابة طلبت من الشهر العقارى أصل الورقة اللى فيها توقيع سيف وعرضوها على خبير خطوط اللى أثبت ان التوقيع قديم و الورقة نفسها قديمة لكن الكتابة عليها جديدة , وطبعًا دا أثبت صحة كلام والدك وأخوك واتعفى أبوك من تسديد قيمة القرض وبدأت الشرطه تحط خطة علشان تقبض على الست دى

طبعًا هى ما كانتش عارفه أى حاجة ومنتوقعة إن سيف أول ما هيسمع تهديدها هيبعت لها الفلوس على طول لأنه متأكد انها زى ماكانت بتسرقه فأكيد خدت احتياطاتها وخذت لها كام ورقه عليهم توقيعاه , فهيتقى شرها ويدفع

نظرت لى مبتسمة :

- أصل سيف طول عمره طيب والناس كلها بتطمع فيه

المهم اتفق أبوك مع الشرطه انه هيجارها ويحددوا ميعاد يوديلها فيه الفلوس والشرطه تقبض عليها متلبسة , واتصل سيف بهاله وحدد معاها ميعاد فى فندق كانت قاعده فيه لحد ما تاخذ الفلوس وتسافر تانى , وكانت الشرطه عامله احتياطاتها وبمجرد ما سيف دخل واداهها شنطة الفلوس كانت الشرطه دخلت وراه وقبضت عليها , واتحكم عليها بالسجن 10 سنين لكن ...

- لكن ايه ???

- لكن ماتت بعد مادخلت السجن بكام شهر

- ماتت؟؟

- ايوه .

- ومش دا بس الى كان مسبب لابوك عقده الذنب

نظرت لها وأنا اخشى مفاجات جديدة :

-أمال فيه ايه تانى ؟

ردت بأسى :

- عرفنا بعد كدا انها كانت مخلفه من رجل الاعمال دا ومنعرفش ابنها

راح فين لحد دلوقتي

- طبعًا أبوك اکتئب وحمّل نفسه ذنب موتها وتشرید ابنها بالذات لما

شافها يوم القبض عليها كانت فى حالة وحشه باين عليها الهدلة

وملامحها كبرت ولا عشر سنين , دا على حد وصف سيف

- وبعدين؟؟

- وزى ما إنت عارف فضل والدك مريض كام شهر وفى اکتئاب حاد

لحد ما صحته اتدهورت واتوفى الله یرحمه

نظرت لها بحزن :

- بس انتوا كنتوا مفهمى ان الشركة كانت بتخسر ودا سبب اكتئاب بابا

- ما احنا يا ابني مكناش عاوزين نشيلك الهم بدرى

- وابنها دا فين دلوقتى ؟

نظرت أمى بحزن :

- للأسف محدش يعرف

- طيب على يعرف حاجة عن الموضوع ده ؟

- أبوه , على عارف كل حاجة , قاله والدك علشان يسامحه لما حس انه هيموت

- طيب محاولش يدور على أخوه ؟

- حاول كتير أوى لكن فى الآخر عرف انه لسه مسافر وما رجعتش مصر مع أمه ولما يئس بطل تدوير

نظرت لى أمى متسائلة :

- صحيح يا شريف , انت جبت منين مفتاح المكتب وايه اللى عرفك بيه أصلاً ؟

ابتسمت وأنا أتذكر رسالة والدى :

- بابا الله يرحمه كان مسجلى فيديو فى تليفون هشام الله يرحمه , لقيت التليفون دا عندى بالصدفة ولنا فتحته لقيت الفيديو ولقيته بيقولى فيه ان عنده سرأنا معروفش ودلتى على الدرج والمفتاح وطلب منى انى اجيلك انتى اللى تحكىلى , وبلغنى أطلب منك تسامحيه

نظرت أمى بأسى :

- مسامحاه يا ابنى , ربنا يسامحه ويسامحنى , والله يا ابنى كل يوم كنا بنتمنى نقولك ونخاف تكره أبوك بس سبحان الله كل شىء بميعاد ومكتوبلك انك تعرف دلوقتى وعلى فكره يا ابنى أبوك كتب الشركة بإسمكم انتوا الثلاثة علشان ما يضيعش حق أخوك بعد موته زى ما ضيعه وهو عايش

نظرت ناحية النافذة وقلبي يعتصره الحزن على أخى وما ألم به وأنا الذى زدته هما على هم , وتذكرت كلمات هشام التى كان يقولها لأبى وأيقنت أنها كانت جزء من حوار دار بينهما فى وقت حدوث تلك المشكلة.

استأذنت أمى بالذهاب بعدما نظرت لساعتي ووجدتها أفاقت نصف الليل حتى أذهب لأمانى والدكتوراة اللتان ينتظران على أحر من الجمر , لأفصح لهم عن سرى الخفى .

في منزل الدكتورة ..

وجدت الجميع في انتظارى بكل ترقب , قصصت لهم كل ما حدث وسط نظرات الإندهاش تارة والاستنكار تارة أخرى , حتى أنهيت ما في جعبتي ونظرت للدكتورة محدثًا إياها :

- دلوقتي فهمت كان يقصد إيه هشام لما قالى " من النهارده حياتك اتغيرت " ولما وصلك رسالته إنى أخلى بالى من أخويا , هشام ما كانش يقصد نفسه لكن كان يقصد على

ابتسمت الدكتورة بهدوء :

- كنت عارفه ان فيه حاجة تاعبه أخوك ومش مريحاه وعلشان يرتاح فى حياته الثانية لازم يبلغنا بها , الميت بيفضل أسير لحد ما يرد أمانته , وقتها روحه بترتاح وتسرح بحرية , أخوك كان عايز يعرفك بقصة جواز والدك وتقسيم الميراث وحق أخوك علشان ما تظلمهوش زى ما أبوك ظلمهم , ولانه اتوفى قبل ما يحكيك فكان بيحاول بكل الطرق يوصلك ومستنى اللحظة المناسبة , واللحظة المناسبة دى جت لما انت كنت بتموت واتعرضت غصب عنك لتجربة الخروج من الجسد , وقتها ما صدق أخوك يقدر يتواصل معاك علشان يبلغك رسالته

استكملت متعجبًا :

- أكثر حاجة مزعلانى ان هشام خاف يقولى الحقيقة , خاف انى مصدقش وأرفض أدى على نصيبه من وراث أبويا , أبويا ميت بقاله

خمس سنين وهشام ميت من سنة يعنى قعد أربع سنين عارف ومتردد
يقولى , يمكن كان بيقول لنفسه بكره يعقل وابقى أقوله لحد ما مات ,
للدرجة دى أنا كنت وحش

ربتت أمانى على يدى :

- ما تلومش نفسك يا شريف لو حد فى مكانك وفجأة جم قالوله ليك
أخ وهيقاسمك فى ورتك أكيد كان هيشك ومش هيصدقك , ويمكن
ربنا عمل كل ده علشان تصدق وترجع حق أخوك وتعوضه عن الظلم
الى شايفه فى حياته

مازالت الدكتوراة فى شرودها حين انتهت أنها لا تتجاذب الحديث معنا
فسألها بقلق:

- مالك يادكتوراة , ساكته بقالك كتير زى ما تكونى مش معنا

أجابت الدكتوراة بشرود :

- لسه فيه حاجة ناقصة , حاسه ان فيه حاجة لسه غامضة مش
مفهومة , حاجة جديده حصلت حفزت روح هشام انها تجيلك دلوقتى
بالذات , أحلامك الى حكيتهالى لسه فيه حته مش عارفه سببها ومش
لاقية لها تفسير فى كلام والدتك

انتهت لها أكثر:

- زى ايه

نهضت من مقعدها وهي تتمشى ذهابًا وجيئة :

- حلمك اللى شوفت فيه هشام بيعملك عملية فى بطنك , وحلمك اللى دايمًا تشوف فيه نفسك بتغرق , خناقة على ونهلة , الأكل المقزز اللى بتاكله , تحذير هشام وكأنه بيقولك خلى بالك , حاجات كتير حكيتهالى مش لاقيه لها تفسير , الحاجة الوحيدة اللى اتفسرت لحد دلوقتى هى كلمة السر وحق على اللى كان هشام بيوصيك تخلى بالك منه وده طبعا عرفناه من التسجيل اللى قادنا لورقة الجواز وتفسير والدتك للموضوع كله , لكن بردو أنا مصممة ان فيه حته مجهولة , متأكد ان والدتك ما قالتش أى حاجة غير اللى قولتها لينا

حركت رأسى علامة النفى :

- لا ما قالتش أى حاجة غير اللى قولتهاك

- طيب حاول تفكر أو تفتكر أى حاجة

وضعت يدى على رأسى فى تألم :

- مش قادر لا أفكر ولا حتى أفتكر أى حاجة أكثر من اللى قولتها , الصداق بينهش فى راسى , كويس أوى انى لسه قادر أتكلم ولا حتى أفهم

سألتنى أمانى بشفقة :

- هو العلاج ما عملش نتيجة لسه

- بالعكس بحس انى بتعب أكثر لما باخده

ابتسمت أمانى :

- أنا كنت فاكهه انك لما هتعرف السر هترتاح , انت خلاص أخيراً عرفت كل حاجة وما بقاش فيه ألباز

ابتسمت متأماً :

- شكلى كده مش مكتوبلى الراحة

ابتسمت الدكتوراة :

- بالعكس يا شريف انت فعلاً تقريباً عرفت السر وحليت لغزه وحتى لو لسه فيه حتة مجهولة بس يمكن تكون الحته دى غير مؤثرة والمفروض دلوقتى بقى ترتاح وتريح دماغك عن التفكير شوية

ضحكت وأنا أشير لرأسى :

- والله يا دكتوراة هى اللى مش راضية تبطل

جذبتنى أمانى من يدى تحثنى على النهوض :

- طيب قوم بينا نروح للدكتور اللى متابع حالتك

- نروح فىن يا أمانى باقى ساعات ع الفجر , بكره إن شاء الله نروح أنا النهارده شفت وسمعت كتيبيبيبيبيبيير أوى ومحتاج ارتاح

- طيب هتروح امتى علشان أجي معاك

- خليكى انتى يا أمانى كفايه بهدلة لحد كده

- ما تقولش كده يا شريف احنا إخوات وانت عارف ده كويس

- خلاص بكره إن شاء الله هنروح بس الأول هروح لوحدى لـ على, فيه حاجات كتير محتاجين نقولها لبعض

- أوك هستناك تتصل بيا

نظرت للدكتورة مبتسمًا :

- مع إنى مش مصدق إنى بقول كده بس بجد شكرًا لولاكى ما كنتش هقدر أفهم أى حاجة ولا أحل لغزى دا ولو بعد ميت سنة

نهضت الدكتورة وصافحتنى بابتسامة :

- بالعكس يا شريف انت ضيفتلى سرممتع استمتعت بحلّه وعلى فكرة انت هتجيبلى تانى تقولى باقى اللغز وأنا مستنياك

- ادعيلى أعرفه وأنا أكيد هاجى أحكمهولك

ودعناها بابتسامة إمتنان وحملنا يوسف النائم منذ ساعات واستقللنا السيارة حتى أعيد أمانى لأمى التى طال انتظارها على وعد منى أن أصبحها معى غدًا للطبيب حتى تطمئن على صحتى وبعدها تعود

لاستكمال حياتها التي أوقفتها ولمنزلهما الفارغ مرة أخرى , نظرت للطريق
وفي عقلي دار سؤالٌ واحدٌ فقط " ليه نهلة كانت بتكرهني في على " .

آذان الفجر..

في المنزل ..

وجدت نهلة في انتظاري وكعادتها بمجرد وصولي استقبلتني بضمه وقبله
حارة وهي تسألني بفضول المرأة :

- كنت فين طول النهار , قمت من النوم بردو ما لقيتكيش جنبي

أجبت عليها متعجبًا :

- غريبة يا نهلة انك ما بتتصليش بيا خالص وأنا برا ولا حتى تسأليني
هترجع امتي زى ما الستات بتعمل

ردت مبتسمة :

- انت عارف يا حبيبي اني مش زى الستات وما بحبش الخنقة بتاعتهم

انتبهتها فرصة حتى لا أضطر لتبرير تأخري :

- طيب بما إنك بقى مش زى الستات وما بتحبش الخنقة بتاعتهم ,
فأنا بقى مش هقولك كنت فين

إبتسمت نهلة وقالت بغنج :

- طيب ولو قولتلك علشان خاطري

ابتسمت وألقيت لها جملة قصدها مباغثة لأزى وقعها وأتهرب من
سؤالها المَلَح :

- مش أنا رجَّعت " على " الشغل

انتفضت نهلة متسائلة :

- على ؟؟ , ورجعته ليه انت مش كنت طردته

جلست على الأريكة وأجبت بلا مبالاة :

- حسيت ان الشغل مش ماشى من غيره

ردت بغضب :

- طيب ما أنا قولتلك أسيب شغلى واحى أشتغل معاك وانت رفضت
وطلبت منك تعملى توكيل وبردو رفضت ولا انت بتثق فى صاحبك وما
بتثقش فى مراتك

هممت أن أقول لها أنه أخی وليس صديقى ولكنى امتنعت حتى أعرف
ما يجول بخاطرها فأردفت مبتسمًا :

- سيبك من الشغل والكلام الفاضى ده وخلينا فى المهم , ماتيجى نقوم
ننام

دخلت غرفة النوم وهى تلحق بى حين ردت بعصبية :

- انت بتغير الموضوع ليه , هو على قالك حاجة

- حاجة ؟ حاجة زى ايه

- معرفش زى ايه أنا اللي بسألك

- طالما بتسأل ببقى فيه حاجة أنا ما أعرفهاش

أجابت متلعثمة :

- والله مافى حاجة بس أكيد هو حاول يوقع بينا ويقولك حاجات
وحشه عنى علشان تكرهنى وترجعهُ الشغل , أمال انت رجعتة ازاي ؟

مررت أصابعى على وجهها مبتسمًا وقد تأكدت شكوكى بانفعالها
وأردفت :

- ايه يا قلبى انتى فجأة بقيتى كتيرة الأسئلة ليه وعملتى زى الستات
الوحشين اللي بتكرههم

أدرت وجهى وأنا أتصنع خلع ملابسى وسألتها :

ما قولتيليش يا نهلة احنا نقدر ازاي نتعاقد مع شركة hello medical
الى كنتى اقترحتمها عليًا

ردت نهلة فى شك :

- وياه الى فكرك بيه

- انتى ياقلبى الى فكرتيني بيه بتحقيقك عن على وبعدين قلت طالما هي
شركة كويسة طيب ايه المانع اننا نشغل معاهم

- والله دى شركة كبيرة ولها إسمها ومش سهل التعاقد معاها , هتصل
بهم بكرة واطلب منهم أوراق التعاقد علشان نمضيها ولو حتى يبعوتوها
بالفاكس

- وعلى ايه يعنى احنا مش مستعجلين أوى كده لسه قدامنا شهرين
على نهاية عقدنا مع الشركة الى بنستورد منها حاليًا

استطردت بعصبية

- براحتك يا شريف

- طيب مش تقوليلى الأول ايه المعلومات بتاعة الشركة دى وبياناتها

- ما أنا قولتلك قبل كده انها شركة أجنبية الأدوية بتاعتها ممتازة
ومقدمه تسهيلات كتير فى الدفع , وقالوا انهم هياخدوا نص الفلوس
بس عند الإستلام والنص التانى لما الأدوية تتوزع وتجبب حقها

مازلت أتصنع تبديل ملابسى حتى لا أنظر اليها فتكشف أمرى :

- بس مش غريبة على شركة بالحجم ده وبالجودة دى وتقدم تسهيلات
كثير كده

وأردفت بخبث:

- دى حتى الشركة اللى كان على بيقترحها ما كانتش هتعمل معانا كده
ردت بعصبية :

- يادى على اللى قرفتنا بيه طالما واثق فى الشركة اللى جايها بتسألنى
عن الشركة الثانية ليه

- طيب خلاص خلاص انتى اتعصبتى كدا ليه

- علشان بتشكك فى كلامى

- ومين قال انى بشكك فى كلامك

- باين من أسلوبك

- وهو لما أسأل على تفاصيل شركة هتتعاهد معاها شركتى أبقى بشكك
فى كلامك

- عموماً دى شركتك وانت حرفها , تصبح على خير

قالتها و أعطتني ظهرها لتتني نقاشنا , أنهيت تبديل ملابسى ولحقتها
واستدار كل منا حتى لايرى الآخر

ولأول مره لم أرى هشام

العاشرة صباحًا ..

ذهبت لمنزل " على " الذى اعتدت ذهابى إليه طوال فترة وجودنا فى
الجامعة , طرقت الباب ففتح لى وبدا عليه الدهشة من حضورى :

- شريف ؟؟

- ازيك يا على

- الله يسلمك يا شريف اتفضل

دخلت المنزل وانتظرتة حتى أغلق الباب ودخل خلفى ..

سألنى بقلق :

- فيه حاجة حصلت

أجبت بابتسامة خافتة :

- حصلت حاجات كتير أوى

- مش فاهم

- لسه قدامنا العمر كله هفهمك كل حاجة

سأل باستحياء :

- تقصد انى هرجع الشغل تانى

أجبت بتهكم :

- دا انت شكلك اتكحرت ع الاخر , حد قالك تسرقنى

نظر للأسفل كالعادة :

- والله عمرى ماسرقتك وبكره الأيام تثبتلك

جلست على أقرب مقعد وأنا أعود بظهرى للوراء :

- هيا لسه هتثبت حلو أوى كده

جلس على بجوارى وهو ينظر لى متسائلاً :

- مالك يا شريف انت متغير كدا ليه

ابتسمت وأنا أضع يدي على كتفه :

- لا متغير ولا حاجة أنا جاى أرجعك الشغل

نظر على للأسفل مرة أخرى وسألنى بطفولة :

- ومش هتطردي تاني ؟

ضحكت حتى اهتز جسدى كله من نبرته الطفولية وخجله المفرط , ثم ابتسمت بهدوء وأنا أنظر له :

- محدش يقدر يطردك , هو حد بيتطرد من ملكه

نظر إلى بتعجب :

- ملكي؟؟

-طبعا , ليك فيه زى ما ليا بالضبط

تلعثم على متحرجا :

- ايه اللى بتقوله ده يا شريف

- بقول الحقيقة ياخويا

ترقرت عين على بالدموع وسقطت دموع الفرحه على وجهه واقترب منى واحتضنى بقوة وكأنه يتمنى مثل ذلك الاحتواء من سنوات ..

- يا حبيبي يا شريف

احتضنته أنا الآخر وقلت محاولا تخفيف حدة الموقف :

- خلاص يا ابني غرقتلى القميص

ابتسم على وهو يمسح دموعه المتساقطة :

- عرفت ازاي ؟

نهضت واقفًا :

- يوووووووووه الموضوع كبير أوى هبقى احكهولك بعدين بس دلوقتي
أنا عايزك تقولى كل اللي عندك

تلعثم على وسأل مترددًا :

- وايه اللي خلاك تقول انى مخبى عنك حاجة

رفعت أصابعى بالعد :

- أولًا ماما قالتلى ان فيه حاجة انت عاوز تتأكد منها وتقولهاالى , ثانيًا
موضوع الخلاف الى بينك وبين نهلة مش مفهوم حاسس ان بينكم
حاجة أنا ما أعرفهاش , ومستغرب انك ما حاولتس تدافع عن نفسك
لما واجهتك بكلام نهلة , حاسس ان فيه حاجة وحاجة كبيرة كمان ,
ثالثًا : انت مدب وباين من شكلك وعرقك انك مخبى حاجة

ربت على كتفه مطمئنًا :

- احكيلى كل حاجة ياعلى , ما بقالناش غير بعض

زفر على بحزن واضح وأغمض عينيه فى محاوله لفتح خزائن أسرارهِ
وإخراج ما استكان فيها ونظرلى مستسلمًا :

- أنا هحكيلك كل حاجة يا شريف , بس اوعدنى الأول انك ما تأذيش نهلة

رددت متعجبًا :

- نهلة؟؟ طيب أنا هأذى نهلة ليه وانت ليه خايف عليها أوى كده؟

نظر " على " للأرض وفجَّرَ قنبلة كادت أن تودى بحياتي لولا انى اعتدت المفاجآت:

- لازم أخاف عليها مش أختى

ركضت نحوه وجذبتة من كتفيه تجاهى ..

- نعم ياخويا , اختك ازاي يعنى؟

- للأسف أختى

- يعنى ايه اختك , يعنى نهلة أختى أنا كمان؟؟؟؟

- لأ يا شريف نهلة أختى من أمى بس

تذكرت كلام والدتى عن ابن هالة المجهول وخبطت رأسى بالحائط مصدومًا :

- يانهار اسود , نهلة بنت هالة

- أيوه

جذبت على مرة أخرى ورمقته بنظرة غضب والشرر يتطاير من عيني :

-وانت عرفت الكلام ده ازاي ؟ ومن امتي؟ وما قولتليش ليه ؟

أزاح على يدي بهدوء :

- والله العظيم ما اعرف غير من كام يوم

-ازاي ؟ احكيلى

جلس "على" على مقعده وجلست بجواره متحفزاً :-

- فاكرك لما ادتني قسيمة الجواز والبطابق بتاعتك انت ونهله علشان

أخلصلكم جوازات السفر وتطلع تكمل علاجك برا

-أيوه فاكرك

- وقتها نهله اتخانقت معاك بحجة انك بتعتمد علياً في كل حاجة ومش

مديها فرصة تدخل حياتك

-أيوه فعلاً ووقتها كمان أصرت اني أتصل بيك وأخليك تجيبلى الأوراق

وما تخلصش إجراءات جوازات السفر , بس أنا قلت انها غيرانة من

علاقتي بيك ومش عايزاك تدخل في حياتنا

- دى كانت حجة علشان تاخد منى الأوراق بسرعة قبل ما يبص فيها

واشوف إسم الأم

- واية اللى حصل؟

استطرد على :

- لما اتصلت بيا وحكيته خناقتك مع نهلة استغربت وحسيت ان فيه حاجة مش مضبوطة , طلعت الورق وقرينه كلمة كلمة وكانت الصدمة لما شفت إسم الأم , وقتها حسيت انى مشلول مش عارف اعمل ايه , بالذات وأنا عارف كويس إن أمى كانت متجوزه واحد تانى ومخلفه منه وانى دورت كتير على أخويا ده ما لقيتوش , ما بقتش عارف أفرح ولا أزعل , ما بقتش عارف إذا كانت نهلة تعرف إنى إخوها ولا لأ , ولو لأ طيب ليه عملت دا كله علشان تاخد الورق , لدرجة انى كدّبت نفسى وقلت يمكن مجرد تشابه أسماء .

خدت إسم الراجل اللى هو أبو نهلة وروحت بحثت عنه فى السفارة الأرجنتينية وفعلاً طلع رجل أعمال مقيم هناك , اتصلت بواحد صاحبه عايش فى الأرجنتين وكان بيدور معايا على أخويا واديته العنوان اللى جبته من السفارة وقلت له يروح يسأل لى عليه, وبعدها بيومين كلمنى وقالى ان الراجل ده كان متجوز أكثر من واحده , بيتجوزهم ياخذ اللى وراهم واللى قدامهم ويتجوز عليهم والى مش عاجبها يطلقها ويرمها , ولما سأل الناس اللى هناك عن أمى هالة , قالوله إنها كانت متجوزاه ومخلفه بنت لكنها سافرت مصر وسافرت وراها بنتها وما رجعوش هنا تانى ..

نهض على واتجه ناحية النافذة وكأنه يسترجع ما حدث :

- وقتها اتأكدت شكوكي واتأكدت إن نهلة فعلاً أختي من أمي , بس فضل
جوايا السؤال اللي ما لقيتلوش إجابة هل نهلة تعرف إنى أخوها فعلاً
ولا لأ ؟ , وجت هنا ازاي ووصلتلك انت بالذات ازاي ؟ , وهل تعرف انك
إبن الراجل اللي كان متجاوز أمها ولا لأ ؟ , مليون سؤال كان مطير النوم
من عيني , وفعلاً استغلّيت الوقت اللي انت ما جيتش فيه واستنيتهما
تيجي الشركة وطلبتهما في مكتبي وواجهتهما

صمت مطبق ..

حاولت استيعاب ما سمعت ولكني فشلت ..

الصداع دمّر نصف خلايا مخي وكلام على دمّر النصف الآخر ..

نظرت لعلّي في لهفة وترصد :

- نهلة قالتلك ايه لما واجهتهما

ابتسم في تهكم :

- طلعت عارفه

رددت بتعجب شديد :

- عارفه ؟؟

- أيوه

- وبعدين

جلس على وأسند ظهره للمقعد ونظر لسقف الغرفة وكأنه يستحضر ذلك المشهد :

- قولتها ان إسم أمها فلانه الفلانى وده بالضبط إسم أمى أنا كمان واستنيتها تتفاجئ , تتخض , يبان عليها أى دهشة بس للأسف كانت أبرد من لوح الثلج ردت من غير حتى ما تبص لى يادوب كلمتين اللى قالتهم

- آه وبعدين

- يا نهلة أنا بقولك إنى أخوكى تقولىلى اه وبعدين

- طيب ما أنا عارفه انك أخويا ما جيبتش جديد

نظرلى على مصدومًا :

- تخيل يا شريف ان الصدمة اللى كنت متوقع أشوفها على وشها , شافتها هى على وشى

سألتها وأنا مصدوم :

- ولما انتى عارفه إنى أخوكى ما جيتيش قولتيلى ليه ,وليه كنتى مخبية , وكنتى هتفضلى مخبية لحد امتى؟

ردت عليًا والشر طالع من عنيا :

- لما اخلص انتقامي

قاطعته مفزوعًا :

انتقام ايه ؟؟

نظري على بحزن :

كانت عايزه تنتقم من أبوك علشان اللى عمله فى أمانا , وحمِّلته غلطة جوازها من الراجل الواطى اللى اتجوزته وسافرت معاه , وحمِّلته ذنب سجنها وموتها فى السجن مذلوله مكسورة وحمِّلته ذنب السنين اللى عاشوها فى الفقر , وعلشان تضمن انضمامي لهما فى خطتها قعدت تحكىلى قد ايه أبويا ده راجل ظالم ومفتري وانه رمانى فى مدرسة داخلية علشان يتفرغ لولاده التانيين اللى هو انت وهشام طبعًا , وانه حرمنى من ميراث ليا حق فيه واداهولك انت وهشام , وكلام كتير كده لزوم التسخين

- وانت قولتلها ايه يا على

- قولتلها انى ما شوفتش أى حاجة وحشة من الراجل ده وعمره ما حرمنى من حاجة وبالعكس أنا عيشت فى مستوى كويس جدًا وفى مدارس محترمة واطعلمت أحسن تعليم واطربيت أحسن تربية وكان بيبيع لأمى مصروف شهرى لد ما إتجوزت , لكن هى بقى أهملت

حياتها ورمت أخطائها وأخطاء أمها على شماعة أبويا , ولما لقت ان
مفيش أمل إني أقتنع وأشترك معاها في خطتها هددتني إني لو وقفت
في طريقها أو عرَّفْتُكَ أى حاجة , هتنتقم منك ومنى وهتهد المعبد ع اللى
فيه .

سألت على :

- طيب هى كانت عاوزه تنتقم من أبويا واهو أبويا مات , هى عاوزه ايه
بقى دلوقتي

- عايزه تنتقم منك ومن والدتك ومن أمانى ومن هشام كمان لو قدرت
تطلع من قبره , جواها كره عامى عنها عن الحقيقة , ماشيه بمبدأ
واحد اللى مش هتقدر تملكه هتدمرة .

شعرت بتبلد أنسانى الشعور بالألم , نظرت ل على متسائلاً :

- وقالتك ايه هى خطتها اللى ناويه تنتقم بيها ؟

- هى طبعًا ما قالتش لإنها عارفه إني هقولك , لكن وسط كلامها قدرت
أجمع موضوع التوكيل اللى مش راضى تعملها و خمنت انها كانت
عاوزاه علشان تقدر تبيع لنفسها الشركة وأى حاجة تملكها وتبقى
بكدته انتقمت منكم كلكم ورجعت حق أمها اللى فاكرامك خدتوه ,
علشان كده هى جت مصر بعد ما عرفت بسجن أمى وفضلت تخبط
يمين و شمال على أمل إن أمى تخرج ويكملوا حياتهم لكن لما أمى ماتت
اتقفلت كل البيبان فى وشها وخططت إنها تنتقم من أبويا , لكن على ما

جَهِزَتْ خَطْمَهَا كَانَ أَبُويا حَصَلَ أُمى وَمات بَعْدَها بِعَقْدَةِ الذَنْبِ وَمَا
بِقَاشِ قَدَامِها غَيْرِكَ أَنْتَ وَهَشَامُ تَنْتَقِمُ مِنْكُمْ , رَجَعْتَ تَانِي عَدَلَيْتَ
خَطْمَهَا وَشَافَتْ شَغْلَ وَكَوْنَتَ حَيَاةِ عِلْشَانَ تَعْرِفُ تَظْهَرُ فِي حَيَاتِكَ وَوَدَه
كَلْفَها حِوَالِي 3 سَنِينَ بِتَجْهِيْزِ فِيهِ عِلْشَانَ لَمَّا تَشَوَّفَها تَبْقَى الْبِنْتُ الْكَامِلَةَ
بِالنِّسْبَةِ لِيكَ وَرَاحَتْ اتَعَرَفَتْ عَلَى كَامِ بِنْتِ مِنْ عَيْلَتِكَ عَزَمَها عَلَى
فَرَحِ قَرِيْبِكَ الِى شَفَتْها فِيهِ وَطَبْعًا عَمِلْتَ كُلَّ الِى تَقْدِرُ عَلَيْهِ عِلْشَانَ
تَوْصَلُكَ وَتَتَجَوَّزُكَ .

- طيب وبعد مارفضت اعملها التوكيل

-للاسف مخها الشيطاني خلاها تفكر في شركة hello medical ودى
شركة معروفة فى الوسط إنها بتصدر أدوية فاسدة للناس اللى
معندهاش ضمير وعاوزه تكسب وخلص , فتشترى الأدوية المنتهية
الصلاحية بسعر رخيص وتبيعها بسعر أعلى, وطبعًا الشركة اللى
بتشترى منها بتستفيد هى كمان لأنها ما بتشترىش الأدوية بنفس سعرها
فى الشركات المحترمة , لكن بتشترىها بنص السعر ويمكن ربعه كمان
وتوزعها على الصيدليات وتقبض الفرق .

-وكانت عاوزه تعمل ايه بالشركة دى

-كانت عاوزه تقنعك انك تتعامل معاهم وبعد ما تستورد الأدوية منهم
تبلغ عن الشركة فتتقفل وتتصادر فلوسكم وتعيشوا الفقر والتلطيح
الى هى عاشت فيه وزى ما قولتلك الى مش هتقدر تطوله هتدمره

- عندك حق يا على , ما كنتش هصدقك

نظرت له مرة أخرى عندما تذكرت أمر تلك الأخطاء الحسابية :

- قولى صحيح يا على , لما انت ما سرقتنيش أمال الأخطاء الحسابية دي طلعت ازاي , وما تقوليش نهلة , نهلة ملهش علاقة بالدفاتر

ابتسم على في حزن :

- نهلة عملت معايا اللي عملته مع هشام وأمانى

أفزعتنى كلماته فصحت متسائلاً :

- تقصد ايه ؟

ابتعد على من جانبي خشيه أن تصيبه لعناتى ونظر بأسف قائلاً :

- نهلة هيا السبب في موت هشام , بس مش بالمعنى الحرفى , يعنى مش هي اللي قتلته

لحقته حيث ذهب وسألته وأنا أجز على أسنانى:

- أمال سبب في موته ازاي , إنطق

- نهلة جنّدت واحده من اللي شغالين في الشركة , أغرتها بالفلوس ووعدها بمبلغ شهرى تاخده آخر كل شهر بشرط انها تقولها كل حاجة بتحصل في الشركة , ويوم موت هشام نهلة استغلته انه موجود في

الشركة بالليل ومعاه السكرتيرة وخذت البنت دى تتصل على نهلة وتقولها إن جوزك بيخونك مع سكرتيرته , كان هدفها تفرق بينهم بعد ما شافت قصة الحب اللى جمعتهم , بس القدر حط بصمته وانتهت بموت هشام وهو خارج ورا أمانى بيحاول يشرح لها اللى حصل

- وانت تعرف كل الكلام ده ازاي

- كل الكلام ده قاتهنولى البنت اللى جندتها لما ضبطتها وهى بتزور فى الدفاتر بأمر من نهلة , قالتلى إن نهلة كانت عامله نسخة من مفتاح مكتبى سرقتها منك طبعاً وكانت مديّه البنت دى نسخة وبتخلها تيجى فى أيام الطلبيات بالليل تفتح الكمبيوتر وتدخل على قاعدة البيانات بشفرة هى جايهاها من برا بتفك كلمات السر وتعدل فى المبالغ المدفوعة للطلبية يعنى تزود فى المبلغ المكتوب علشان أبان قدامك إنى باخد الفرق فتفقد ثقتك فىا وتكذبى فى أى كلمة أقولها فى حق نهلة لما أحب أواجهك

استطرد على بحزن :

- ولما بدأت مشكلة الحسابات دى كنت باجى كل يوم الشركة بالليل واقف قدامها أراقب اللى خارج واللى داخل , ولما لقيت البنت دى داخله وهى ملهاش شغل تجيله بالليل أصلاً , راقبتها ودخلت وراها وسببتها لما دخلت ع الملفات وأول ما بدأت اللعب مسكتها من قفاها وحلفت إنى هلبسها قضية لو ما إعتفتش بكل حاجة , طبعاً الصنف ده بيخاف وبيقر من أول ألم , حكتلى على موضوع هشام وعلى خطة نهلة إنها

تطيرنى من الشركة ووعدھا لھا إنها تحطھا مكانى والحجة إنى بسرقة من تحت لتحت وهى عاوزة تكشفنى قدامك , لكن غرضها الحقيقى من اللى عملته فى هشام هى اعترفت لى بيه لما واجهتها باللى عرفته , وهتستغرب لما تعرف قد ايه كانت ندمانة بجد ع اللى عملته وما كانتش تتمنى له الموت لكن كان كل هدفها تفرق بينه وبين مراته زى ماحصل مع أمها

جلست مرة أخرى من فرط ألمى , شعرت أن مفاصلى لن تتحمل أكثر من هذا , نظرت لعلى بانكسار :

- وهى اللى زى دى لسه بتعرف تحس

جلس على بجوارى وهو يحاول تهدئتى :

- أنا عارف يا شريف ان اللى عملته نهلة مش قليل , بس ما تستغربش لو قولتلك انها مظلومة , نهلة شافت كتير أوى واتربى جواها كره وغلّ من وهيا صغيرة , كره فضل يكبر فيها لحد ما هيموتها , أنا يمكن ما قدرتش أواجهك بإنى أخوك ولا باللى أختى عملته , بس صدقتى حاولت أحميك على قد ما قدرت

ربتُ على كتفه :

- أنا عارف يا على وبرغم شكى فىك بسبب موضوع الحسابات ده إلا إنى كنت بردو بكذب نفسى وعلى فكرة أبونا قبل ما يموت قسم ممتلكاته

كلها وفلوسه بيني أنا وانت وهشام , علشان ما يضيّعش حقك وهو
ميت زى ما ضيعه وهو عايش

تهد على بارتياح :

- يااااااااااااه عالجتلى الإيد اللى كانت بتوجعنى يا شريف

نهضت من مقعدى أهمُّ بالخروج محاولاً تمالك أعصابى :

- تستاهل أكثر من كده بكتير يا على , من بكره تيجى الشغل بلاش كسل

- هههههه حاضر يا أخويا ما إنت الكبير بكام شهر بقى ليك حق تحكم
وتتحكم

- ربنا يسعدك يا على

- ويسعدك يارب يا شريف

- طيب أنا همشى بقى مش عاوز أى حاجة

- طيب خليك قاعد معايا شوية

- وأنا قولتلك العمر لسه قدامنا وهنقعد مع بعض لما نزهق وبعدين
أنا رايح للدكتور أشوف حكاية الصداع اللى ما يبروحش ده ايه

- طيب خلى بالك من نفسك يا شريف ; وحاول تسامح نهلة

- حاضر يا على هحاول بس ما أوعدكش

قبيله من الشياطين كانت تتراقص أمام عيني , نار أحرقَت صدرى حتى شعرت بقرب موتى , فكرت فى كل طرق الانتقام ولكن فى النهاية كان على يقف أمامى ليمنعنى , نهلة من تبقى له من عائلة حُرْم منها , لا أريد أن أتسبب له بوجعٍ جديد وأيضًا لا أريد لتلك الحية البقاء أكثر من ذلك , ركبت سيارتى وقد اقترب ظهرى من الإنحناء وصار دبيب همومى يُسمعُ المارة من حولى , لم أستطع الرؤية من شدة ألم رأسى فتذكرت أمانى التى تنتظرنى وقررت الذهاب للطبيب واستشارة أمانى فى الخطوة المقبلة .

بعد ساعتين ...

التقيت بأمانى أمام منزل أمى إرضاءً لرغبتها فى الذهاب معى للطبيب استقللنا السيارة وانطلقنا إلى المستشفى دون أن أتفوه بكلمة حتى نظرت لى أمانى بتعجب:

- مالك يا شريف ساكت ليه كده النهارده , دا أنا قولت انك هتبقى مبسوط ومرتاح ع الآخر وخلص ما بقاش فيه هموم

ابتسمت فى شرود :

- كل ماهم يتشال يتحط بداله ألف هم

نظرت أمانى وقد زاد اضطرابها:

- مالك يا شريف حصل ايه انت قلقتنى

- ولاحاجة

- ولا حاجة ازاي وانت فى الحاله دى

- شويه ترسبات , هو اللى شففته كان قليل

زفرت أمانى فى حزن:

- عندك حق

لم أُرِدْ إخبارها بما حدث الآن ولا بحادثة وفاة هشام حتى لا يتجدد الحزن والضيق فى قلبها مرة أخرى , وعلى الأقل أجد من يساندنى بثبات ..

وصلنا المستشفى وسألنا على الطبيب حتى وصلنا مكتبه , طرقتنا الباب ودخلنا فاستقبلنا بابتسامة واسعة :

- أهلاً أهلاً مريضى العزيز عامل ايه دلوقتى

صافحناه وجلسنا على المقعد المقابل لمكتبه :

- والله يا دكتور تعبان جداً وحاسس انى بتعب أكثر ومفيش أى تحسن

رد الدكتور بتعجب :

- بس نهلة كانت قايلالى انك بقيت كويس

- نهلة !! قالتلك كده امتى ؟

تعجب الطبيب واستطرد :

- اتصلت بيك من يومين على تليفون البيت علشان كان فيه دكتور مخ
وأعصاب أجنبي جاى مصر يقعد يومين بس فقولت استغل الفرصة
وتيجى تخليه يكشف عليك , بس نهلة قالتلى انك بقيت كويس

وضعت يدى على رأسى مصدومًا:

- بس نهلة شايفانى بعانى , ازاي تقولك كده

تعجب الدكتور :

- مش عارف والله يا شريف , أنا فرحت جدًا انك بقيت كويس بالذات
لما جازفت ووقفلك العلاج

قفزت من مقعدى هلعًا :

- وقفلك العلاج ؟؟؟؟

نظرت أمانى للدكتور مندهشة فهى لا تفهم شيئًا مما يدور :

- بس يادكتور شريف ماشى على العلاج اللى كتبتهوله من بعد موضوع
العينة وبيقولى انه ما بيحبش معاه نتيجة

تعجب الدكتور أكثر :

- علاج ايه ؟ أنا قولت لهلة توقف العلاج كله ونستنى كام يوم كده ونشوف يمكن تتحسن ويكون تضارب العلاج وكترته هى اللى مسيبالك الصداع وقلة التركيز

صحت بغضب :

- لما انت موقف العلاج أمال ايه الزفت اللى كنت باخده ده

تعجب الدكتور :

- ما أعرفش , هاتهورى وأنا اشوفلك ايه ده

نظرت فى شرود وتذكرت ذاك الحلم الذى رأيت نهلة فيه تأخذ ورقة من الممرضة ووقتها أخبرتنى أنها تعليمات الطبيب , فاتجهت بنظري للطبيب متسائلاً بشك :

- طيب انت خليت الممرضة بتاعتك تدى نهلة ورقة تعليمات

- لأ طبعاً , لو كان فيه حاجة محتاج أقولها لك كنت هاجى أقولها لك بنفسى

لم أشعر بجسدى إلا وأنا أندفع خارج المكتب ذاهباً لتلك الممرضة , جذبتها من ذراعها وأنا أسألها بغضب وصرامة :

- ايه اللى بينك وبين نهلة ؟

ردت الممرضة بفرع :

- فيه إيه يا أستاذ شريف انت ماسكنى كدا ليه

ضغطت يدها بقوة أكثر :

- انطقى وقولى ايه بينك وبينها أحسنك , لحسن أرتكب جريمة دلوقتي
وأودى أهلك فى داهية

اضطربت الممرضة وأزاحت يدي :

- انت لو ما إحترمتش نفسك أنا هطلبك الأمن

- مش هيلحقوا ييجوا , هكون خنقتك قبل ما يوصلوا , أنا كده كده
ميت ما يهمش بقى أموت موتة ربنا ولا بحبل مشنقة

خافت الممرضة أكثر وبدأت بالبكاء :

- طيب ايه مخليك تفتكر ان بيتي وبين مدام نهلة حاجة

- شفتكم وانتوا بتتفقوا مع بعض

- شفتنا ازاي يعنى .. ق ق قصدى محصلش

- لأ حصل , بأمارة الحلق اللى وقع منك فى العمليات وانتي بتجرى
تجيبى جهاز الصدمات

اتسعت عين الممرضة وتلعثمت :

- الحلق , انت عرفت موضوع الحلق ده إزاي

المخ وتخلى مخهم يشتغل أكثر , كتبت الإسم فى ورقة واديتهاولها , بس والله والله هى عرضت عليا فلوس وأنا رفضت أخذها وكنت فاكراه انى بعمل لها خدمة , بس لما جيت دلوقتى وشفت البشر فى عينيك حسيت انها عملت فيك حاجة وحشة وخفت أقولك تأذيني , بس أنا مليش ذنب والله

وانهارت الممرضة فى البكاء واضعة كفيها على وجهها , نظرت لى أمانى متسائلة ومندهشة :

- أنا مش فاهمه حاجة يا شريف , نهلة هتعمل كده ليه ؟

اجب عليها مصدومًا :

- علشان يزيد تعبى ومخى ما يبطلش تفكير وما أعرفش أنام ويقل تركيزى وتزيد كل أعراض مرضى ويمكن فى الآخر أنجن واترمى فى أى مصحة

ردت أمانى مصدومة :

- وايه مصلحتها ؟ وهتحاول تأذيك اصلاً ليه ؟

ابتسمت فى شرود :

- طار قديم

- طار ؟

- حسابات قديمة في دفاتر ملاحا التراب , طلعتلى نهلة من وسطها
علشان تنتقم منى

هزت أمانى رأسها غير مستوعبة :

- أنا مش فاهمة أى حاجة يا شريف

- هفهمك كل حاجة بس استنى

تذكرت شيئاً فنظرت للمرضة مجدداً وسألتها :

- انتى ادتها إسم دوا واحد ولا اتنين

ردت الممرضة :

- واحد بس والله

نظرت باتجاه النافذة فى شرود :

- بس أنا باخد اتنين

ركضت مسرعاً وأمانى لحقت بى إلى السيارة , حتى أوقفتنى لاهثة :

- فيه ايه يا شريف بتجرى كده ليه , فهمنى ايه اللى بيحصل

أجبتها وأنا أخبط بيدي فوق السيارة :

اتجهت لدولابها , أزحت الملابس قليلاً فوجدت علبة مليئة بتلك البودرة الغربية , تعجبت وأنا لا أرى أى بيانات على تلك العلبة ولا حتى اسم الدواء , وإنما هي علبة صماء .

ناديت أمانى , وأخذت تلك العلبة واتجهت لصديقى مصطفى صاحب معمل التحاليل الموكل باختبار عينات الأدوية المستوردة, أعطيته تلك العلبة وأخبرته أنى وجدتها ضمن شحنة أدوية استوردتها من الخارج وأريد تحليل مفصل لها وبأسرع وقت ممكن .

انتظرناه فى الخارج وفى قلبى تتطاير شظايا الانفجار المرتقب , ساد صمت طويل حتى جاء صديقى يحمل فى يده ورقة النتيجة وتبدو عليه علامات الإندهاش :

- غريبة يا شريف أنا مش عارف المادة دى كانت ضمن أدويتك ليه

هنا سقط قلبى فى قدمى وشعرت بقرب موتى لا محالة , فسألته وأنا أرتجف :

- هيا ايه المادة دى يا مصطفى ؟

رد صديقى ومازال مندهشاً :

E 621-

حركت رأسى ولم أفهم شيئاً :

- يعنى ايه ؟؟

استطرد مصطفى شارحًا :

- دى غلوتامات أحادية الصوديوم ودى مادة بتستخدم بكمية قليلة فى صنع المواد الحافظة اللى بتبقى موجودة فى الاكل المحفوظ والمعلبات والنكهات الصناعية فى بعض المنتجات و الأطعمة المختلفة , والدراسات أثبتت إنها مادة خطيرة جدًا ..

- خطيرة ازاي ؟

ألقي مصطفى عبوة ناسفة أخرى :

- الباحثين لقوا إن الإستعمال المتكرر للمادة دى بيعمل تسمم للمخ على المدى البعيد

فجأة صممت كل ما حولي لا أسمع إلا دقات قلبي وصوت أنفاسي , ظننت في البداية أن قلبي توقف لولا شعوري بيد تهزني في كتفي , استفقت من صدمتي فوجدت أمانى تسألني مرعوبة :

- شريف انت سامعني , انت كويس؟

أجبت في شرود وصدمة :

- كويس

اضطرب صديقي وسألني :

- فيه ايه يا شريف

أجبت بنفس الشroud :

- ولا حاجة , كمل

استطرد مصطفى بقلق :

- المادة دى على المدى البعيد وبكمية كبيرة بتعمل تسمم فى المخ , لكن استخدامها بكمية قليلة بصفة مستمرة بيعمل فقد تركيز , زهايمر مبكر , صداع مزمن , دوخة مستمرة , اضطرابات عصبية , مشاكل فى الغدد والإنجاب , واضطراب فى جميع أجهزه الجسم وممكن كمان تسبب اورام وسرطانات , وعلشان كده دلوقتى بيحذروا من استخدامها ولو بأقل القليل فى حفظ المنتجات

اتسعت عينا أمانى وجلست على المقعد من الصدمة وشعرت أنا كأن أطرافى شُلَّت تماماً ولم أشعر بنفسى وأنا أصرخ :

- يابنت الكلب

سأل مصطفى وهو لا يدرى ماذا يحدث :

- فيه ايه يا شريف فهمنى

صرخت بانهييار :

-أنا كنت باخد المادة دى يامصطفى

ظهر الذعر على وجه مصطفى :

- بتاخذها ازاي يعني

ضحكت بجنون :

- تخيل إن مراتي كانت بتدويهاى فى مية وتسقيهاى على إنها علاج , كانت بتموتنى بالبطء , كانت بتشوفنى وأنا بتعذب وما صعبتش عليها

انهرت فى البكاء , لا أدري هل صعبت علىّ نفسى المسكينة أم أنى
أحببتها ؟

تسائل مصطفى بتعجب :

- طيب وهى تعمل كده ليه

- علشان إنسانة مريضة عايزه تنتقم منى فى حاجة مليش ذنب فيها , بس ورحمة أبويا لأدفعها تمن العذاب اللى عيشْتنى فيه ده غالى أوى

قفزت أمانى من مقعدها واتجهت نحوى تهدئنى :

- متوديش نفسك فى داهية يا شريف علشان واحدة زى دى , احنا نبليغ عنها ونطلب شهادة الدكتور إبراهيم والدكتور مصطفى وناخد عينة من البودرة دى والعلبة اللى عليها بصماتها وأكد هتتسجن

نظرت لها فى تحدى:

- لما اسقيها من نفس الكاس الأول

تسائلت أمانى فى دهشة :

- يعنى ايه

أجبت وأنا أنصرف :

- هتشوفى ...

لحقت بى أمانى وشكرت مصطفى الذى نسيت شكره فى خِصَمِّ
تفكيرى واستقللنا السيارة :

- انت رايح فىن يا شريف

- الشهر العقارى

- الشهر العقارى ؟؟؟؟ تعمل ايه هناك؟

- هعمل توكيل لنهله

- انت اتجننت يا شريف

- لا ما إتجننتش أنا هعملها اللى هى عاوزاه

- طيب فهمنى هتعمل ايه ؟

أمام الشهر العقارى ..

جلست باتجاه أمانى شارحًا لها ما إنتويت فعله :

- اسمعى يا أمانى , أنا هعمل لنهلة توكيل النهارده وعلى بالليل هقولها بحكاية التوكيل دى وكأنى بعنذر لها عن رجوع " على " الشركة مرة تانية , وهقولها إنى تعبت أكثر وعاوز أرتاح يومين وعلشان أثبت لها حسن نيتى هخليها تمضى عقود الشراكة بيننا وبين الشركة اللى هى اقترحتها , علشان أوضحلها قد أیه أنا بثق فيها, وبعد ما أتأكد إنها مضت العقود عن طريق " على " طبعًا اللى هيتابع كل حاجة من الكواليس , هروح على الشهر العقارى والذى التوكيل , بحيث لو حبت تبيع لنفسها حاجة يكون التوكيل ملغى

استطردت وأنا أنظر للأمام والشريتطاير من عيني :

- ولما تمضى العقد هكون اتصلت بالبوليس وحكيت لهم كل حاجة وفهمتهم إنها استغللت التوكيل وراحت تستورد أدوية فاسدة ومركبات كيميائية بتسبب سرطانات , وطبعًا البوليس هيقبض عليها وعلى الشركة اللى اتعاقدت معاها , وبعد ما يلاقوا فى شنتها علبه البودرة اللى كانت بتدينى منها هيتأكدوا من كلامى , وبعد ما أظمن إن الأمور كلها مشيت زى ما خططت هطلب شهادة الدكاترة

ضابقت حدقتا عيني وضاغطت على أسناني قائلاً :

- وهرفع عليها قضية شروع فى قتل , وتبقى تقابلنى لو طلعت منها ,
ورحمة أبويا ما هسيبها إلا لما تحصل أمها

- طيب اهدى يا شريف وفكر فى اللى بتقوله دى مش حاجة سهلة دى
حياة بنى آدمه

- وأنا يا أمانى , ما فكرتيش ليه فى اللى بتعمله فيًا , لآخر لحظة كانت
بتسقينى السم علشان تخلص منى وتنتقم , هو أنا كنت عملت لها ايه
علشان تعمل فيًا كده , أهو على الأقل أنا عارف هى عملت فيًا ايه
كويس

أسندت أمانى رأسها للوراء فى أسى :

- حاسه إنى فى فيلم مكتوب بعناية متحدد فيه أدوار الممثلين كويس
أوى , مستحيل ده يكون واقع بنعيشه ..

نظرت لأمانى فى حزن :

- يا ريته كان فيلم , كنا هنطفى التليفزيون ونروح ننام فى حضن اللى
بنحبهم , لكن دى حقيقة أفضع من إننا نقدر فى يوم ننساها

- وليه بيحصل لنا كده , هو إحنا وحشين

- لأ مش وحشين بس كان قدرنا نقابل ناس وحشين

- طيب واحنا إيه ذنبنا

- ذنبنا إننا عايشين في زمن الحلو فيه بسيوسة

ضحكت أمانى رغم حزنها :

- حتى وانت في الظروف دى بتنكت

أجبت بسخرية :

- واحد عارف انه ممكن يجيله أورام وسرطانات وتسمم في المخ وفي
الأخر يموت , متوقعة منه إيه غير إنه ينكت علشان ما يموتش مقهور

ربتت أمانى على كتفى مواسية :

- هتتعالج وهيقدرنا يطلعوا السم ده من جسمك وإن شاء الله تيجي
على شوية التعب اللي فات ومش هيطلع فيه حاجة أكثر من كده

نظرت للسماء مبتهلاً :

- يارب يا أمانى ... يارب

فتحت باب السيارة وأشرت لأمانى بالبقاء فيها حتى أنهى ما خططت له
بعناية

السادسة مساءً ..

في مقهى فيروز ..

لم أستطع مواجهة على بما فعلته بأخته فاتصلت به وأخبرته بكل ما فعلته بي نهلة , وأخبرته ما انتويت عمله وبدأته بالفعل ..

لم يعترض على قرارى بعد معرفته بمدى انتقام نهلة القدر, ولم ينطق إلا بجملة واحدة :

- انت اللى اتوجعت يا شريف والموجوع هو بس اللى يقرر يعمل ايه مع اللى وجعه....

أغلقت الهاتف وأنا أعلم بمدى حزن على ولكنه على الأقل يعلم وجعى وسيَقْبِرَ موقفى ..

أجريت اتصالاً آخر بنهلة أكمل به باقى خطى ..

- ألو , ازيك يا حبيبتي

- ازيك إنت يا حبيبي عامل ايه

- تمام جدًا

- انت فين ؟

- عند واحد صاحبي

- ولسه هتتاخر؟

- والله يا نهلة شكلى هبات عنده النهارده

- ليه كده؟

- حاسس إني تعبان ومش هقدر أسوق وهو ماسك فيا أوى إني أبات
معاه

- اوك يا حبيبي

- على فكرة يا نهلة

- ايه

- أنا عملتلك توكيل عام زى ما كان نفسك

- بجد؟!!

- هيا دى حاجة ينفع الهزار فيها

- ??? غريبة أوى , بس انت كنت رافض الموضوع ده , ايه اللى خلاك
تعمله فجأة

- حاسس انى تعبان ومحتاج أرتاح يومين , ماما كانت طالبة متى من
فترة إني اخدها تزور قرايبها , فاحتمال اخدها بكره ونقعد عندهم
يومين وطبعًا مش معنى إني رجعت " على " يبقى أثق فيه وأسلمه رقبتي

, فقولت أعملك التوكيل تديرى بيه الشركة على ما أرجع , وكمان أنا
اتصلت بشركة الأدوية اللى كنتى اقترحتها وحددت معاهم ميعاد بكره
نمضى العقود , فياريت تخلصى الموضوع ده لو أنا ما جيتش .

تلعثمت نهلة واستطردت :

- ما انت قولت اننا مش مستعجلين ايه اللى خلاك تكلمهم

- المفروض انك تفرحى مش تزعلى

- م م ما أنا فرحانة

- هتصل بيكى بكره بعد الضهر أتأكد انك مضيتى العقود , على فكرة
هتوحشينى

- وانت كمان هتوحشنى أوى يا حبيبي , بجد ميرسى

أغلقت الهاتف للمرة الثانية بعد أن أحبكت خطى حين حضر إيهاب
مضطربًا :

- ايه يا شريف الكلام اللى قولتهولى فى التليفون ده

أشرت له بالجلوس:

- طيب أقعد أقعد

جلس إيهاب بجانبى وقد كسا وجهه الإصفرار :

- طمئني يا شريف الله يرضى عنك الكلام اللى حكيتهمولى ده حقيقة

ابتسمت ساخرًا :

- تفتكر هكذب فى حاجة زى دى

خبط إيهاب على رأسه مصدومًا :

- يادين النبى , دى حكاية ولا فى الحواديت , معقول تكون حقيقة

- كل حاجة فى الدنيا دى معقولة

- ولسه ناوى تكمل اللى بدأته

- لازم

- بس دى نهلة يا شريف

- ماهى علشان نهلة هعمل فيها كده

- انت بتحبها ؟

- كنت

- متأكد؟

- مش هنكرانى لسه بحبها , أنا كنت ما صدقت إنى حبيبها بجد , وكان

ممکن أغفرلها اللى عملته فيا لو كانت وَقَفَتْهُ بعد ما حسبت بحبى

واهتمامى , لكننت كانت مُصِرَّةً إنها تكمل فى اللى بدأته , مالهأش حاجة
تغفر لها عندى

- وكان رد فعلها إيه لما عرفت بحكاية التوكيل

- طبعاً فرحت حتى لو كانت بتحاول ما تبينش , لكن بعد ما قولتها
على حكاية التعاقد مع الشركة القذرة اللى جابتها لينا زعلت طبعاً ,
لأنها خلاص طالما طالت التوكيل فهى هتبيع لنفسها كل حاجة وهتلغى
خطتها الثانية انها تسجننى وتقفل الشركة , لكن بما إنى عارف مخ نهلة
الوسخ فأنا متأكد إنها قالت أنا كده كده هاخذ الشركة ومش هتضر
بحاجة عملية مشبوهة كده فى الأول نكسب منها وبعد كده نمشى عدل
أحسن نتكشف

- ومفيش أمل تسامحها

- أمل ماتت يا إيهاب , فاكر لما قولتلك جوازة تفوت ومحدث يموت

- فاكر

- أهو أنا كنت هموت بقى يا عم إيهاب , تفتكر أسامح فى الموت

نكس إيهاب رأسه ولم يُجِبْ فهو يعلم أنى على حق .

قضيت ليلتى فى منزل إيهاب وفى الصباح عدت للجلوس على ذاك
المقهى حتى اتصل بى على وأخبرنى أن نهلة انتهت لتوها من توقيع
العقود , ذهبت للشهر العقارى وألغيت التوكيل واتجهت للشرطة ..

وفي المساء كنت أقضى ليلتي مع زوجتي الفاتنة في قسم الشرطة ..

لأول مرة منذ زواجي بها يتحدث كلانا بصدق ..

نظرت لي نهلة بغیظ عندما رأتی أَدْخِلُ غرفة التحقيق التي تم احتجازها بها إلى أن يتم عرضها على النيابة في اليوم التالي ..

- انت تعمل فيا كده يا شريف , دا أنا مراتك يا واطي

ابتسمت وأنا أجلس واضعاً قدمًا فوق الأخرى :

- إذا كنت أنا واطي فإنتي حقيرة , إطلعي بقى من الدور اللي بتمثليه بقالك سنتين ده وخلي عندك شجاعة مرة واحدة في حياتك وواجهيني , ولا انتي فاكراني لسه ما إكتشفتش لعبتك الوسخة اللي عملتها فياً

نظرت لي نهلة بعينان انفجرت فيهما أكياس دماء :

- تستاهل كل اللي عملته فيك انت واخوك ولو بإيدي كنت طلّعت جتة أبوك وقطّعتّها بأسناني علشان يدفع تمن اللي عمله معايا أنا وأمى وأخويا

نهضت وأمسكت يدها بقوة :

- فوق بقى من الفيلم اللي انتي عايشه فيه ده , إنتي انسانة فاشلة فشلتی فی تعلیمك واشتغلتی فی الشركة النجسة اللي جبتها تتعاقد معايا واللى قولتی علیها معارف أبوكی وهناك عرفتی المكونات اللي

بتسبب أمراض بالهبل ومع ذلك كنتوا بتستخدموها في تصنيع الأدوية من غير ما يبقى عندكم ذرة دين ولا ضمير بأنبكم ع اللى بتعملوه في الناس , ولما شفنى عمایل أبوكى اللى ما تفرقش عن عمایلک کثیر قولتى إن أبویا هو السبب , مع إنى ما أعرفش إزای أبویا السبب فى دنائة أمک وجریانها ورا الجیب الدفیان, ولما أمک حبت تلعب على أبویا واترمت فى السجن لحد ما ماتت , کبر جواکى الغلّ والغُرّه والإنتقام وبدل ما تنتقمى من أبوکى اللى عدّببکم جيتى عاوزه تنتقمى من أبویا اللى مات بسبب إحساسه بالذنب تجاهک , بس للأسف على ما جيتى كان مات فقررتى تنتقمى من أولاده , واستخدمتى أساليبک القذرة علشان تشتغلى فى الشركة اللى انتى فيها وتظهرى قدامى بمظهر بنت الناس وارضى اتجوزک , وبعد كده قررتى إنک تکملى انتقامک بأبشع صورة ولما لقيتى إن " على " عرفک وهيکتشف قذارتك قولتى تزيجيه من قدامک , مع إنه قالک إنه ما إتظلمش وأمک قالتک إن أبویا حتى بعد طلاقهم عاملها بما يرضى الله , بس الفشلة أمثالك دایمًا يدوروا ع الشماعة اللى يعلقوا عليها فشلهم , وبعد ما إنتقمتى من هشام المسکین ومراته جه الدور علیّ علشان تکملى انتقامک من بنى آدم ما عملش فيکى أى حاجة , وعمومًا انتى كده كده لبساک , من ناحية استيراد أدوية فاسدة ومن الناحية الثانية شروع فى قتل , وابقى ورینى هتکملى انتقامک إزای

- بس أنا ما كنتش ناوية أكمل

صرخت :

- كدابة , انتى لأخر لحظة كنتى عايزه تكلمى , لأخر ليلة نمنا فى جنب بعض سقيتينى السم علشان قولتلك طلّعى نفسك برا الشركة , انتى لو كان جواكى ذرة تراجع عن اللى فى دماغك كنتى رفضتى التوكيل مش ريقك يجرى زى الكلبة اللى اترمى لها عظمة , إنتى الغدر فى دمك أساس

إنهارت نهلة فى البكاء و جلست على أقرب مقعد وقالت باستعطاف:

- بس أنا حبيبتك بجد

ابتسمت بتهكم :

- لعبة جديدة دى ولا دور ناوية تاخديه فى مسلسل

نظرت لى نهلة باستعطاف :

- والله العظيم بحبك

صمّت فاستطردت :

- انت ما شوفتش نفسك كنت بتعاملنى إزاي , من يوم ما إتجوزتك و انت بتحاسبنى على غلطة ما عملتهاش , بتعاقبنى إنك ما حبتنيش , عايش مع أطلال قصة حبك القديمة , مش هكذب عليك وأقولك اتجوزتك علشان بحبك ولا هقولك بعد ما إتجوزتك حبيبتك , لكن هقولك إنى حبيبتك بعد ما إعتبرتى مراتك بجد , إعتبرتى حبيبتك ,

عاملتني على انى إنسانة بحس ولىا مشاعر مش حاجة خدتها غصب
عنك , حبيتك لما حبتنى يا شريف

أمسكت بذراعها وواجهتها :

- أنا يمكن أكون ما حبتكيش وما إدتكيش حقك كزوجة بس ما
قتلتكيش , ما نمتش فى حضنك وأنا بدبحك بسكينة تلمه , ما
سقتكيش السم بإيدى وعليه نقطة عسل , ما إستمتعش بعذابك
ونزلت دمعة كداية أضحك بيها عليكى , انتى خائنة وحقيرة وما
تستاهلش حتى يتزعل عليكى

أمسكت بيدى مستعطفة :

- طيب سامحنى المرة دى

نظرت لها بحرقة :

- أسامحك على ايه بالظبط ؟ على انك سبب فى موت أخويا ؟ ولا
أسامحك على إنك بردو سبب فى موت أبويا ؟ ولا أسامحك انك كنتى
هتكونى سبب فى موتى ؟ ولا يمكن أسامحك على العذاب اللى شفته
أشكال واللوان ؟ هو ايه بالظبط اللى ينفع يتسامح عليه ؟

استطردت ومازالت منهارة فى بكائها :

- طيب ما إنت كمان كداب , قولتلى انك بتحببنى

أجبتها بتألم :

- أنا فعلاً حبيبتك , ودلوقتي كرهت نفسى علشان حبيبتك , أنا حبيبت صورة الزوجة الطيبة الصبورة اللى صبرت عليا واستحملت قرفي وتعبي , مش الزوجة اللى كانت سبب في عذابى , يعنى من الآخر حبيبت الدور اللى مثلتيه ومستعد أديكى عليه جايزة كمان , لكن انتى شخصياً بقرف من نفسى لما افكر إنى لمستك .

استطردت وأنا أتجه نحو الباب :

- انتى طالق يا نهلة وكل اللى هقدر أعمله علشان أسجنتك هعمله وأنا ضميرى مرتاح

فى منزل الدكتورة تيسير ...

طرقت الباب , ففتحت لى الدكتورة وعلى وجهها علامات التعجب والدهشة :

- شريف ؟؟ ... فيه حاجة حصلت تانى ولا إيه ؟

أجبتها بهدوء :

- طيب مش هتقوليلى ادخل

إنزاحت جانباً وأشارت بيدها للدخول :

- اه طبعًا اتفضل

جلست الدكتورة على مقعد الصالون وظللت أنا واقفًا :

- قولى بقى ايه اللى حصل تانى ؟

أسندت ظهري ورأسى للحائط مبتسمًا :

- ما حصلش حاجة

تسائلت الدكتورة بفضول وكانها تريد أن تضيف الفصل الأخير من ذلك المسلسل الغامض :

- يعنى ايه ما حصلش حاجة ؟ انت آخر حاجة قولتهاى لما اتصلت بيا وحكىتى الجزء الغامض اللى ما كناش فاهمينه وقولتى على خطتك اللى نويت تعملها فى نهلة

- بالظبط

- طيب وبعدين؟ حصل حاجة تانى ؟

- حصل كل خير

نظرت لى الدكتورة بتربق :

- إزاي ؟

ابتسمت وأنا أستقيم فى وقفى وأتمشى ذهابًا وإيابًا :

- واحد : رجّعت لى على حقه فى ميراث أبوه ورجّعتة شغله تانى وخليته
النائب بتاعى وليه كل صلاحيات رئيس مجلس الإدارة

- اتنين : نفذت خطى اللى دبرتها لنهله والشرطة قبضت عليها هى
والشركة الفاسدة وصادرت الأدوية اللى كانت جايه على حس العقد ,
ومع شهادة الدكاتره والأوراق اللى تثبت إنها كانت بتحاول تقتلى , ما
أعتقدش إن فرصتها فى إنها تشوف الدنيا من تانى موجوده أصلاً ,
والحمد لله "على" قَدَّر موقفى وساعدنى أوقف شرها .

- تلاته : أمانى أخيراً ارتاحت من العذاب اللى كانت عايشه فيه بقالها
سنة واتأكدت إن هشام ما خانهاش , ورجعت القاهرة تانى ونقلت
شغلها وراحت تعيش هى ويوسف فى شقتها القديمة

كل حاجة ماشيه تمام , هشام ما بقاش يجيلى تانى وأبويا شكله إرتاح
فى العالم بتاعه وأمى طلّعت اللى فى قلبها وارتاحت

تعجبت الدكتوراة وسألتنى بدهشة :

- امال جايلى تانى ليه ؟

أجبتها ببطء وأنا أقرب وجبى منها هامساً :

- عايز أرجع أنزل البيير

رفعت حاجبها متعجبة :

- ير إيه ؟

اتجهت نحو باب الغرفة المغلقة وفتحتها وأنا أنظر للدكتورة بابتسامة
غامضة :

ير الأرواح .

تمت .

obeikandi.com

شكر خاص

الأب الروحي الأستاذ / حسام حسين

الأستاذ / خالد رمضان

الكاتب / ابراهيم السيد

الكاتبه / شيماء زايد

الأستاذة / امنيه مجدى

الأستاذ / محمد رمضان نور الدين

الأستاذة / الاء محسن

الأستاذ / مراد محمد

الأستاذ / عمر سعيد

الكاتبة في سطور

نهى مجدى وهبه

- مواليد محافظة المنوفية

- مؤلفة كتاب " حظر إرادة " الصادر عن دار ليليت للنشر والتوزيع
لعام 2014

- كاتبة صحفية لها العديد من المقالات في الصحف المختلفة (اليوم
السابع - روزا اليوسف - الأهرام - الوفد - جريدة world news
البريطانية - جريدة المصريون - بوابة فيتو - جريدة الأسبوع - جريدة
كل شيء - news جريدة النبأ - وكالة أنباء القاهرة الآن - جريدة حب
مصر - جريدة دنيا الرأي - جريدة موطئ نيوز - جريدة شباب مصر
وغيرها من الجرائد المحلية

- تم تكريمها ضمن أفضل الشخصيات الناجحة لعام 2014
- قامت بالعمل في العديد من المجالات الإلكترونية من حيث النشر
والإدارة

- قامت بالعمل في بعض الإذاعات الإلكترونية الشبابية

للتواصل مع الكاتبة :

<https://www.facebook.com/fajr.alnhda>

obeikandi.com

جميع حقوق الطبع والتوزيع محفوظة للناشر



Noon_publishing@yahoo.com

ت - 011-27772007 - 02 35860372